

صوت الأهل



تقديم

لا يكتمل توثيق "ما حدث" و"يحدث" إلا بأصوات كافة أطرافه.. الكلمات التالية أصوات مواطنين ومواطنات ليس لهم مكان على شاشات الإعلام ولا صفحات الجرائد.. لم يتبق لهم سوى صفحاتهم على وسائل التواصل الاجتماعي.. يقصون فيها حكاياتهم، ومعاناتهم، يناشدون عليها السلطات، يناجون عليها ربهم ويتوجهون له بالدعاء بالفرج الذي لا يأتي. يستمرون في الكتابة باعتبارها آخر مخرج ومنفذ لما يحملون في قلوبهم من أحزان، زوجات وبنات، أخوة وأخوات، آباء وأمّهات

يتحدثون عن أحبائهم المفقودين أو المعتقلين أو عن ظروف السجن الذي حرّمهم له الشمل، في غياب قانون أو منطق يفسر الغياب وتجديد الغياب واستمراره بدون سقف.

إنها أصوات الأهالي. أصوات لا يكتمل توثيق المرحلة بدونها.

ليس لدينا شك إنها قليل من كثير لم نتمكن من متابعته ولذلك نعتذر لمن غابت مناشداتهم ومعاناتهم عن هذا الملف.

أهالي 35 معتقل ومعتقلة يطالبون بالحرية لذويهم، أو على الأقل احتجازهم في ظروف أكثر إنسانية.. يطالبون بتطبيق القانون. يناشدون السلطات بالاستماع إليهم. يدعو بالحرية والحياة لأحبائهم.

يشمل الملف ما نشره الأهالي ما بين يناير ومارس 2022 عن:

- ذويهم في السجون
- ذويهم المختفين قسريا
- ظروف الزيارة
- إضافة الى بعض ما نشره الأهالي عن سجن العقرب سيء السمعة

نود أن نوضح أن ترتيب "أصوات الأهالي" جاء بناء على الترتيب الأبجدي لأسماء أفرابهم المحرومين من الحرية. فليس بينهم من هو أهم من الآخر، ولا معاناة أسرة منهم أقل من غيرها.

كل التضامن معهم جميعا

والحرية لكل الغائبين والغائبات في السجون.

من الفنانين والفنانات في المسجون

عن ابراهيم عز الدين



رسالة والدة
المهندس إبراهيم عز الدين
في عيد الأم

يا إبراهيم وحشتني يا حبيبي دا هيكون تالت عيد أم متكونش معايا يا أبني.. أكثر من ألف يوم وانت بعيد عن عنيا يا ضنايا. وحشتني يا حبيبي وحشني كلامك وطلتك عليا. ميكفيش الكلام يا حبيبي وحشتي ليك. عامل ايه يبني عامل ايه يا حبيبي موحشكش أكلي موحشكش القعاد معايا موحشكش هزارنا موحشكش حكاوينا وحشتني اوي يا حبيبي وانت كمان وحشتني نفسي تخرج العمر مباحش فيه كثير يا إبراهيم وحشتني يا حبيبي وحشتني اوي. في عيد الأم كل أم بتكون نفسها تشوف ولادها متهنين وفي احسن حال وانت يا حبيبي في سجن من غير ذنب. بعيد عني وعن كل حبايبك من غير ما تعمل حاجة انا لسا مستنياك يا حبيبي وهفضل مستنياك مستنية رنه الجرس بتاعتك الي عرفاها وعمري ما نسيتهما بحضرك اكلك الي بتجبه مستنية دخلتك عليا يا نور عينيا. ربنا يجمعني بيك يا حبيبي ويطفي نار قلبي قبل معادي مستنياك يا نور عنيا مستنياك يا إبراهيم. أنا أم المهندس إبراهيم عز الدين بطالب كل مسؤول مصري بأنه يرجعلي أبني وميحرمني منه كلكم عندكم ولاد متحبوش تحسوا الي حصلي بطالبكم نفسي ابني يفطر معايا أول يوم رمضان ويكون

معايا في عيد الأُم دا طلب من أُم مصرية لمسؤولين مصريين في أيدهم القرار دا ارحموا قلبي
وارحموا مستقبل إبراهيم.

<https://bit.ly/3MSPLtZ>

عن أحمد دومه



الظباط اللي على بوابة منطقة طرة رافضين تماما الكلام ولا حتى سامحين يوصلوني بإدارة السجن... ف الأول بلغوني ان الزيارة يوم 1-29 بعد شوية بلغوني انها يوم 1-12 واحنا من حقنا نزور من يوم 12-26 قالولي لا ماهو لو فوت يوم الزيارة بتضيع عليك وتستحق ثاني بعدها بشهر. طلبت اقابل الأمور أو رئيس المباحث أو ظابط الأمن الوطني، اللي على البوابة رفضوا يوصلوني بأي حد وردهم التعليمات كدا وبس. امتى هنخلص من الخرا والقرف دا مش عارفين ولا عارفين ايه سببه حتى. <https://bit.ly/3ePmEb2>

النهاردة زرت أحمد هو مش كويس بسبب انه في حاجات ممنوعة ف سجن المزرعة كان مسموح بيها قبل كدا. اكثر من 22 ساعة ف اليوم مقفول عليه باب الزنزانة، 22 ساعة قاعد على السرير بخشونة الركبة ومشاكل الظهر والفقرات. غير انه ممنوع من الجرايد القومية والتلفزيون المصري اللي كان مسموح بيهم قبل كدا. غير القرف اللي بنواجهه ف الدخول للزيارة مش فاهمين بجد

نعمل ايه يعني 9 سنين سجن منهم اكثر من 6 سنين انفرادي وكم امراض بتيجي للناس بعد الستين
ف الشيخوخة عند احمد وهو يادوب 32 سنة

<https://bit.ly/3KXdKr9>

“زرنا أحمد من يومين زيارة استثنائية بتصريح من النيابة، شكى بعض الاجراءات اللي شايفها
تعسفية بحقه منذ انتقاله حديثا لسجن المزرعة.. زي منع الصحف القومية والتليفزيون الرسمي
وتقليل ساعات التريض لساعه ونص بس فاصبح بيقتضي ٢٢ ساعة ونص في زنزانه ضيقة جدا مع
مسجون ثاني (قبل كده كان بيخرج ساعتين تريض وساعتين او اكثر في طرقة بين الزنازين).. طلب
منا احمد اتخاذ كل الاجراءات الممكنة لتحسين الوضع ده واسترداد ما تم التوصل اليه قبل كده
من حقوق اساسية بعد مطالبات ومواقف ومعارك خاضها احمد واسرته وفريق المحامين طول ال ٨
سنين اللي فاتوا” “فوجئنا امبارح (أول أمس الأحد) برسالة من أحمد يبطلب فيها تقديم بلاغ
للنائب العام ضد أحد ضباط سجن عنبر الزراعة لتعديده عليه فزرناه ثاني النهارده الزيارة الاستثنائية
بمناسبة ذكرى ٢٥ يناير.” “احمد وضع أنه أثناء نقله لعيادة الأسنان بسجن عنبر الزراعة قام ضابط
الترحيلة بإيقافه في مكان معين حتى ينهي اجراءات دخوله، بعد شوية ضابط ثاني من مسؤولي
السجن قاله بطريقة مهينة: انت ايه اللي موقفك هنا امشي اقف هناك، احمد كان رده: اتكلم مع
الضابط المسئول عني متكلمنيش. ضابط السجن سأل ضابط الترحيلة مين ده؟ قاله يا باشا مسجون
وقفه مطرح ما تحب.” “بدأ الاخير بسحب احمد بالقوة مع فيض من الزعيق والهمجية وكأنه بيعاقبه
بس عشان قاله اسال الضابط متكلمنيش.” “الواقعة انتهت بعد قدر من الالهانات ولم تتحول لكارثة
لأن المأمور عرف احمد وانهاها”، “مين يضمن لو متمش إنهاها بالشكل ده كانت هتنتهي بأيه؟ مين
يضمن حماية مماثلة لمساجين أقل حظاً؟ مين يضمن عدم تكرار مثل هذه الالهانات وحماية احمد
وكل المساجين من غرور ورعونة النوعية دي من الضباط؟.” “ليه غريب او مستفد ان مسجون يتعامل
بندية ويقرر انه بني ادم له حقوق ويرفض التجاوز في حقه او معاملته كالقطيع؟ امتى هيكون في
ضوابط ورقابة على ادعاءات الضباط دي ويعرفوا انهم مسؤولي حماية وتنظيم مش اسياذ على

عيد؟” <https://bit.ly/3L1EkiF>

أحمد هيضرب عن الطعام بسبب سوء ظروف السجن ومقرر انه مش هيفك الاضراب الا لو كل الظروف اتحسنت، هيبلغنا بميعاد الاضراب ف اقرب زيارة. احمد حالته النفسية والصحية ف النازل مشاكل ركبتة وضهرة بيزيدوا كل يوم، كمان من وقت اصابته بكرونا وعندة حساسية على الصدر بتعمله كرشة نفس وكحه مع اي دخان او غبار، ممنوع من الجرائد والتلفزيون والترريض ساعة ونص بس و22 ساعة ونص قاعد ف زنزانة لا تسمح بأي حركة داخلها -قاعد على السرير طول الوقت دا.- احمد بلغني انه بقى مش قادر يصلي ولما بيقوم من على السرير ضهرة ور كبتة بيوجعه جدا. كمان من كام يوم في اكل اتحرق على السخان عمل دخان ف الزنزانة جاتله كرشة نفس وتعب جدا واكثر من ساعتين بيحاولوا يفتحوا الباب علشان يخرجوه لان الكالون بتاع الباب كان مش عاوز يفتح والحمد لله بعد اكثر من ساعتين قدروا يلحقوه وعملوله جلسات اكسجين لكن بيشكي لسنا من اله ف الصدر. 3017 يوم جوا السجن بينهشوا ف أحمد وصحته ونفسيته. 8 سنين و3 شهور منهم اكثر من 5 سنين حبس انفرادي... مطلوب ايه تاني احمد يدفعه؟

<https://bit.ly/3HVAHbd>

احمد دومة بيعد فالسنة التاسعة فالسجن، بشكل متصل، منغير فرصة واحدة في الخروج.. والمرة الوحيدة اللي كان مفروض يخرج فيها بعد قبول النقض تم اهدارها بالمخالفة للقانون.. فضل فالسجن شهرين ونص خارج اطار القانون "اعتقال". الرقم الضخم الكارثي ده منه ٦ سنين انفرادي بحجة انه خطر يقعد مع حد.. ٦ سنين بيكلم نفسه.. مشاكل صحية ونفسية بالكوم. فيعني معلى زيادة ساعات التريض بالنسباليه مش رفاهية، والسماح بالتلفزيون الرسمي اللي اصلا كان مسموح له بيه قبل نقله للسجن الجديد واللي حصلنا عليه بعد خناقات ومثابرة ومقابلات ومناقشات على مدار سنين .. حق وضرورة مش رفاهية. ده ردا على ضابط الامن الوطني اللي شايف ان احمد بيطلب حاجات مش مسموح بيها وبيتحجج بانه مينفعش يسمحله بحاجات مش مسموحه لباقي المساجين.. طب وهي ليه ممنوعه عن باقي المساجين؟ ليه مانعين عنهم حقوقهم؟ حاجة كمان عشان احنا فاض بينا ومش هنقف على حد، لو حقيقي ان في معتقلين واهالي معتقلين ماشين

يقارنوا بين اوضاعهم واوضاع غيرهم ويتخانقوا على "منع" حاجات متاحة لمعتقل لو مش هتتاح للباقيين (اتمنى يكون ده مش حقيقي).. فايه العفانة دي يا جماعه؟ ايه العفانة دي بجد؟ في كده؟ هل محتاجين نتكلم في بديهيات زي خصوصية كل حالة بكل ظروفها؟ والله انا لو عددت مشاكل احمد والحاجات اللي تحملها واللي لسه مضطر يتعامل معاها وحجم التعسف ضده هيطلع كسبان وبكتير.. بكتير جدا.. وكلنا كده جمعاء مدينين ليه.

<https://bit.ly/3J7hsx0>

أحمد باعت يأكد أنه ما ناخدش أكل معانا ف الزيارة علشان هيضرب عن الطعام.

<https://bit.ly/3L77mMZ>

وصلتلي رسالة أن أحمد بدأ إضراب عن الطعام من امبارح، ويطلب النيابة تحقق في الإضراب، وبعث مذكرة لمأمور السجن بأنه بدأ الإضراب. كمان عرفت إن أحمد حصلت بينه وبين مخبر مشادة ومفيش أي تفاصيل عن الموضوع. وبكرا هزور أحمد وأعرف منه التفاصيل وحقيقة الموضوع

<https://bit.ly/3DoO6lj>

من الساعة 8 الصبح وانا قدام السجن ف انتظار دخولي للزيارة ومستنين التعليمات لحد دلوقتي وكل الزيارات خلصت ومفيش غيري وكل ما أسأل بيقولوا لسا مفيش تعليمات بدخولك.

<https://bit.ly/35INzKz>

امبارح وصلتنا معلومة ان احمد بقاله يوم مضرب عن الطعام. احنا فاهمين من زيارات سابقة انه ناوي يعمل اضراب لسوء وضعه في السجن بس مكنش لسه قرر معاده وكان مفروض هيلبغنا في زيارة النهارده بالتفاصيل. وصلنا كمان ان حصلت مشادة بينه وبين مخبر يمكن تكون السبب في تعجيل قرار الاضراب بس منعرفش تفاصيلها ولا اذا كانت مشادة عادية ولا اتطورت لاعتداء. النهارده اخوه

قضى طول النهار قصاد السجن بيجاول يزوره ومقدرش، الادارة العامة لمنطقة سجون طرة ماطلت معاه بحجة انهم منتظرين تعليمات الامن الوطني لحد ما اليوم خلص . من ناحية ثانية مسئول ما قال لعضو في المجلس القومي لحقوق الانسان ان اخوه جاي متاخر عشان كده مش هينفع يدخل! اخوه ده اللي واقف قدام السجن من ٨ الصبح ! بكرة اخو احمد هيروح تاني ويجاول تاني .. يا رب احمد يبقى بخير ونتطمئن ومتكونش المماثلة دي لانه تعبان او معتدى عليه

<https://bit.ly/3NxqINC>

12 ساعة واقف على باب السجن علشان اطمن على احمد ومفيش غير رد واحد "منتظرين تعليمات الأمن الوطني. " أحمد مضرب من اكثر من 72 ساعة واثبت دا بمذكرة بعثها للمأمور.. أحمد حالته الصحية سيئة جدا من قبل الاضراب، بنطلب من النيابة العامة المصرية انها تحقق في الاضراب وأسبابه.

<https://bit.ly/3IKUAT3>

أحمد بلغنا في الزيارة كمان ان الباحث احمد سمير سنطاوي اضرب عن الطعام امبارح لتكرار اعتداءات الضابط احمد الوكيل على المساجين ومنهم سنطاوي وتعديه على دومة و نقله لزنزانة انفرادية بالقوة، تلاه النهارده الصحفي هشام فؤاد

<https://bit.ly/3qNkkYx>

تعرب أسرة أحمد دومة عن قلقها الشديد إزاء ما يمر به ابنها منذ نقله من سجن طرة تحقيق إلى سجن المزرعة بمنطقة سجون طرة. حاولنا أن ننتظر حتى تتحسن الأوضاع ولو قليلا دون جدوى، حيث طالب دومة بالحد الأدنى من حقوقه داخل محبسه إلا أن كل محاولاته باءت بالفشل ما بين تجاهل ووعود واهية بتحسين الوضع، وفي ظل هذا الانتظار ازداد الأمر سوءاً ما دفعه إلى إعلانة إضراب مفتوح عن الطعام، الشراب وحتى المحلول الطبي بعد حرمانه من حقوقه الأساسية وزيادة التضيقات وصولاً إلى تكرار التعدي عليه وزملائه، مما يشعرنا بقلق بالغ على حياته . منذ وقت طويل

يعاني ابننا من ظروف صحية شديدة الصعوبة دون أن يتحرك أحد لإنقاذه، فعلى مدار ثماني سنوات ونصف من الحبس حتى الآن قضى معظمهم بالحبس الانفرادي الذي أثر سلباً على صحته النفسية والجسدية.

على المستوى النفسي عاني دومة الكثير من المشاكل وأصبح منذ أكثر من ثلاث سنوات يعاني من اكتئاب حاد وفقاً لتشخيص طبيب السجن، صاحب هذا الاكتئاب مؤخراً نوبات هلع. وقد تقدمنا بعدة طلبات للنيابة العامة حتى نتمكن من استقدام طبيب متخصص في مثل تلك الحالات ليقدم الدعم الطبي الملائم حيث اشتكى أحمد من أسلوب الطبيب الذي قامت إدارة السجن باستقدامه ووصف جلسة العلاج بالهزلية، فكيف يتم تقديم جلسة دعم نفسي في غضون خمس دقائق وسط عشرات المرضى المحتشدين في صفوف أمام الطبيب؟ لكن لم يتم الاستجابة لأي من طلباتنا.

وعلى مستوى الصحة الجسدية يعاني دومة منذ عدة سنوات من خشونة شديدة في المفاصل ارتقت لحد التآكل في الشهور الماضية، تلى ذلك انزلاق غضروفي يسبب له آلام دائمة. وقد طالبنا وناشدنا المسؤولين بحل تلك الأزمة بعرضه على متخصصين فقد خسر أحمد الكثير في فترة حبسه الماضية الأمر الذي يهدد قدرته على المشي إذا استمر الوضع كما هو عليه.

لا تتوقف معاناة أحمد عند هذا الحد بل يعاني أيضاً من مشكلة في أنفه نتيجة كسر نجم عن محاولة بعض المساجين المتشددين قتله بجلسة محاكمة سابقة، وتسببت تلك المشكلة في ضيق وصعوبة شديدة في التنفس خاصة في الأماكن الضيقة وحالات الطقس المحمل بالأتربة مما يفاقم من معاناته على جميع المستويات.

نظراً لكل تلك المشكلات طالب دومة مراراً بحقوقه الأساسية كسجين وفقاً للقانون، ومنها تغيير زنانه حيث يقبع الآن بزنازة شديدة الضيق تتسع تقريباً بمقدار مترين خارج السرب محل نومه، مهدمة وشديدة القدرة. كما طالب بزيادة ساعات التريض المسموح له بها بما يتفق مع لائحة السجن وبالصحف القومية والجهاز الكهربائي الذي كفله القانون للمحكوم عليهم وصولاً إلى الرعاية الصحية اللازمة. إلا أن إدارة السجن تجاهلت كل طلباته بل واتخذت أسلوباً عدائياً حين أعرب أحمد عن عدم قدرته على تحمل تلك الظروف ورغبته في الإضراب عن الطعام. فقام أحد مخبري السجن بافتعال مشكلة مع أحمد والتعدي عليه ما دفعه بتعجيل قرار إضرابه عن الطعام.

اختصم دومة في محضر اثبات إضرابه عن الطعام مفتش مباحث منطقة سجون طرة ويدعى العميد أحمد الوكيل بصفته المسئول المباشر عن مباحث السجن التي تقوم بكل تلك الانتهاكات بالإضافة لتكرار التعدي عليه وزملائه بمحبسهم من أفراد المباحث الذي يرأسهم أحمد الوكيل تارة ومنه بنفسه تارة أخرى حيث سبق وتعدي هذا العميد على أحد زملاء أحمد بالحبس واصابه بظهره. ترتب على هذا المحضر أن حضر العميد أحمد الوكيل بصحبة القوى الضاربة لزنزانة أحمد وتعدي عليه وقامت القوى الضاربة بنقله من زنزانتة لزنزانة انفرادية عنوة. ما دفع أحمد للإضراب حتى عن الماء والمحاليل الطبية ودفع عدد من زملائه للإضراب عن الطعام اعتراضا على ما حدث.

نحن نتحدث عن انتهاكات جسيمة وغير مسبوقه للقانون وحقوق الإنسان وحقوق السجناء بعهدة وزارة الداخلية، وتحت رقابة النيابة العامة وبسلطة مطلقة للأمن الوطني في ادارة السجون وتسيير اوضاع المحبوسين. ولا نعلم لماذا كل هذا الكم من البغض والكراهية تجاه ابننا. ألا يكفي البعض من كل تلك السنين التي قضاها أحمد وحيدا خلف القضبان وهو لم يسع يوما إلى شيء سوى مشاركة البسطاء حلمهم في تحسين أوضاعنا وبناء وطن أفضل.

أنا كأسرة أحمد نحمل مسؤولية حياته وسلامته الصحية والنفسية وهو المضرب الآن عن الطعام والشراب والمحاليل الطبية، لرئيس الجمهورية كرئيس للسلطة التنفيذية ولوزير الداخلية والنائب العام ونطالب بتحقيق عاجل وعادل في ملابسات التعدي على احمد وحرمانه من حقوقه الأساسية. كما نطالب أعضاء المجلس القومي لحقوق الإنسان، مروجي الاستراتيجية القومية لحقوق الانسان، بزيارة عاجلة لسجن مزرعة طرة للاستماع لأحمد وزملائه والوقوف على حقيقة أوضاعهم وما يعانونه وملابسات واقعة التعدي، والقيام بدورهم في مصارحة الرأي العام وسؤال المسؤولين عن هذه الانتهاكات. كما نطالب نواب البرلمان المصري المخول لهم الدفاع عن حقوق كل المصريين بسؤال وزير الداخلية عما يحدث بهذا السجن ومدى إنفاذ القانون ومحاسبة المسؤولين وحماية المسجونين تحت سلطته، فكيف يقوم سجين باختصام عميد في محضر رسمي لتعديه على زملائه فيكون الرد بتعديه عليه هو ايضا دون أي تردد أو خوف من المسائلة القانونية؟

لا نملك إلا الاستمرار في سلك كل الطرق لحماية ابننا القابع في محبسه تحت سلطة المعتدين عليه دون رقيب، وبدورنا سوف نقوم بتقديم بلاغ للنيابة العامة وللمجلس القومي لحقوق الإنسان

وبإرسال خطابات بعلم الوصول لرئاسة الجمهورية ولأعضاء مجلس الشعب المصري وكذلك بالتواصل معهم شخصياً، عل مسئول منهم يقوم بدوره في وقف هذه الانتهاكات. يحدث هذا كله بعد أن منينا أنفسنا بأن نجد أحمد أخيراً وسطنا في رمضان ليشاركنا أيامه لأول مرة منذ ما يزيد عن ثماني سنوات ونصف، لنجد أنفسنا نطالب فقط بتحسين أوضاعه داخل محبسه وحمايته من الاعتداءات كحد أقصى لسقف طموحنا الضئيل.

<https://bit.ly/387drLc>

عن أحمد سبيع



المفروض كنت أنزل البوست ده أول امبارح لكن رجعت تعبانة جدا أولاً لإنني كنت مطبقة يومين ،
ثانياً لإنني رجعت جسمي كله شرب الهوا الثلج فكنت مكسرة جدا.. المهم أنا رحتموعد الطلبة
ومع وعد واتصالات من النقابة لتمكيني من زيارة أحمد ولكن.

لما بلغتهم بذلك عند السجن كان رد سريع وتلقائي وبدون مناقشة ” ممنوع ” ، طب ايه يا جماعة
والاتصالات ” ممنوع ” طب أفهم طيب هو كل اللي علي نفس القضية ممنوعين ولا زوجي بالذات؟
، قالولي دي تعليمات اللي ممنوع من أول ما جه عندنا ممنوع واللي مسموح له يزور ييزور.

طب هو أنا المفروض أعرف أي حاجة عنه ازاى؟ اعرف تعبان ولا كويس محتاج علاج ولا محتاج
ايه ازاى؟ طب هو يظمن علينا ازاى؟ طب هو ايه اللي هيضركم من زيارة لا تتعدي دقائق؟

طب أقولكم مش عايزة أزوره أنا أصلا مش بتطلع للحاجات الصغيرة أنا عايزاه يخرج علي طول
بس المطلوب ده برفعه لرب العالمين ووثقة انه لن يردني بدون إجابة وهيخرج بإذن الله وبحوله
وقدرته. هيخرج لإن ده ظني بربنا

عن أحمد صبره



تجدید حبس مصطفیٰ اخویا ٤٥ یوم تانی. و کده ده هیكون تانی رمضان و هو مش معانا . حسبنا

الله و نعم الوکیل فی کل ظالم

<https://bit.ly/37FVaEH>

سنة ونص بیتنا ماعرفش الفرحة شکلها ایه و بیوت تانیة کتیر فی شهر مایو الماضي و ف تالت یوم العید والدی اتوفی مقهور علی ابنه اللی اتحبس ظلم و ماہانش علیکوا تخرجوه یدفن ابوه و یاخذ عزاه . انتوا عایزین مننا ایه تانی؟! مش خلاص خدتوا البلد و سرتوها و خلیتوها الجمہوریة الجدیدة و فلسطونا و کرهتونا فیها . مبروک علیکوا .. خرجوا اخواتنا وأصحابنا و مش عایزین منکم حاجة تانی . کفاية ضغط علینا لحد کده. لأن کتر الضغط بیولد الانفجار.

<https://bit.ly/3ihTaoc>

عن أحمد عبد العاطي



آخر مرة زرتك فيها منذ خمس سنوات، كانت ابتسامة وجهك المشرق لا تفارقه ويقين قلبك أراه
على وجهك وطيب كلماتك، فها نحن على العهد يا أحمد نللم شتات قلوبنا باليقين ونصرف غربة
أرواحنا بالأمل .

زوجة المعتقل الدكتور أحمد عبد العاطي

<https://bit.ly/3sVHrSg>

عن أسامة ياسين



اجعل زنزانتة دفئا وسلاما يارب..

ابنة المعتقل الدكتور أسامة ياسين

<https://bit.ly/3rZCUg0>

عن إسلام عامر



أخي حبيبي..


أشعر بحاجة ملحة وشوقٍ جارفٍ إليك، عناق طويل وحديث لا ينتهي ودموع مكتومة أسمح لها بالخروج لتخبرك أنك لا تفارق خيالي لحظة واحدة،

مرت أعوام كثيرة وعمر طويل وما تزال بعيداً خلف تلك الأسلاك،

تمنيت يا أخي لو كنت معي يوماً واحداً من أيامي التي أعيشها بعيدة، بئصةٍ في قلبي، قلبي الذي مازال يتلفت، مازال ينتظرك، وينتظر أن ننجو مرةً أخرى بمعجزةٍ وعض كبير.

<https://bit.ly/3Kimpno>

عن أنس البلتاجي



النهارة يوم ميلاد انس الحبيب ٢٩ سنة انس معتقل قبل ما يكمل ٢٠ سنة، زهرة شبابه بيقضيتها وحيدا داخل الحبس الانفرادي بعد أربع أحكام براءة وكثير من الأخلاءات ثم تدوير على قضايا أخرى بعزتك وقدرتك يارب فرج عن انس وكل المظلومين كفاية ظلم حسبنا الله ونعم الوكيل

<https://bit.ly/3sssyXg>.

قلنا أننا مش هنتكلم عن أنس ثاني، لكن الحقيقة أن في جديد.. أن أنس يوم ١٢ فبراير الماضي... تم سنتين حبس احتياطي... من ساعة آخر قضية اتضاف عليها... الي فات كله مات مش هنتكلم فيه.. قضية الماريوت و ٦٤٠ و التظاهر و الانتماء وغيرهم خد فيهم براءات... السبع سنين قضايا مش هنتكلم فيهم .. حق أنس علينا أن نذكر الجهات المعنية .. أي جهات معنية...سواء

مجتمع مدني..أوجهات تنفيذية .. امبارح بالمناسبة كان ذكري ميلاد أنس ال ٢٩ ...أنس دخل
السجن ٢٠ سنة .. و الحقيقة لو كان موظف السجل المدني كتب اسم أنس أنس محمد محمد
إبراهيم بدون اللقب الخامس..يمكن مكانش أنس مشي المشوار ده .. يمكن مكانش اتشاف.. احنا
مش عايزين أنس يتميز...احنا عايزينه ميتشافش...يتهمش فيخرج... <https://bit.ly/3IFcx6h>

عن أيمن عبد المعطي



٣ سنين و٤ شهور حبس احتياطي!

<https://bit.ly/3r9BFdR>

“أيمن عبد المعطي عبد الرسول، باحث وناشر ومدقق لغوي، محبوس احتياطيا من أكتوبر ٢٠١٨. قضى حوالي سنة و١١ شهر على ذمة القضية ٦٢١، ثم تم حبسه مجددا على ذمة القضية ٨٨٠ ومحبوس على ذمتها من حوالي سنة وخمس شهور. لحد امتى ممكن يستمر الوضع ده لأيمن واللي زيه.. لحد امتى؟!“. وطالبت زينب الجميع بالمشاركة في حملة “الحبس الاحتياطي مش عقوبة.“

<https://bit.ly/3J8oeCd>

تجديد حبس ٤٥ يوم كمان.. رابع رمضان هيقيضه أيمن في الحبس الاحتياطي

<https://bit.ly/3qhIRor>

بعد 1245 يوم تجديد الحبس لنصل إلى 1290 يوم. رحمتك يا رب

<https://bit.ly/3qf4BRU>

عن جعفر الزعفراني



الظلم ظلمات في بلادى اليوم تمر ثمانى سنوات عجاف على ابنى جعفر وكثيرين أمثاله داخل سجون الظلم والقهر والتشفي والانتقام . تم القبض عليه يوم ٤ من مارس عام ٢٠١٤ وتم إخفائه قسريا حيث تعرض للتعذيب. ثم حوكم أمام ناجى شحاتة فى محاكمة شهودها جميعا من أفراد الشرطة الذين كانت إجابتهم جميعا على اسئلة المحكمة أو المحامون، لا أذكر وأحيلكم إلى ما قلته في أوراق النيابة. ولم يسمح لشهود النفي بالحضور، وانتهى بصدور المؤبد على جعفر يوم ٢٢ من شهر اكتوبر عام ٢٠١٧. تقدم أ.د محمد سليم العوا بالطعن إلى دائرة النقض بتاريخ ٢٠١٧/١٢/١١ وقدمت نيابة النقض الرد على مذكرة النقض بمذكرة رفعتها لمحكمة النقض تؤيد فيها ما ورد بمذكرة نقض الحكم الذي قدمه د. العوا لذات المحكمة، مطالبة المحكمة بالحكم بالبراءة لجعفر أو إعادة محاكمته بسبب ما شاب حكم محكمة الجنايات من بطلان. لأن محكمة الجنايات بنت حكمها ليس على ما استقر فى عقيدتها التى كونتها من تلقاء نفسها بناء على ما أمامها من أدلة. لكنها بنته فقط على تحريات جهاز الشرطة الذى لا يقوم بذاته دليلا على ثبوت التهم . (صورة من مذكرة نيابة النقض آخر هذا البوست) ولكن محكمة النقض لم تلتفت لشيء من هذا

ورفضت الطعن وقضت بتأييد المؤبد على جعفر وكل من معه فى القضية . اللهم عجل بفرج
المظلومين واربط على قلوبهم وقلوب أهليهم اللهم عجل بعقاب الظالمين عقابا يشفى صدورنا
ويطفى نار غضبنا ويخفف من آلام معاناتنا ، اللهم كف أبصارهم وشل أيديهم وابتليهم بأشد الأمراض
وأكثرها ألما ، وأرنا فيهم عجائب انتقامك فى الدنيا ثم فى الآخرة، اللهم أحصهم عددا وأقتلهم
بددا ولا تغادر منهم احدا ، وأحنهم اليوم أو غدا .

<https://bit.ly/3IOqGy7>

يوم زي ده مينغش يعدي وهو معلم فى حياتنا بداية وجع وظلم كبير ٤/٣ من ٨ سنين جوزي
اتخطف واتحبس ظلم خدنا حكم مؤبد ٨ سنين سرقوا حياتنا وفرحتنا بنتنا. جعفر النهارده يبدأ
السنة التاسعة فى السجن ظلم حسبنا الله ونعم الوكيل

دعواتكم

<https://bit.ly/3IQHJzx>

أمونه الصغيره حبيبة قلبك يا جعفر لبست نظارة يمكن تفصيله صغيره لناس كثير بس لينا لا.. كل
موقف بيكون كبير أي حاجة خاصه بآمنة من وقت ما كانت صغيره وكل ال ٨ سنين اللي فاتوا ليها
معنى ووجع كبير جوانا يمكن الكلام مش يفرق مع ناس كثير لانه عادي بس بكتب يا آمنة عشان
لما تكبري تعرفي ان باباكي احسن أب فى الدنيا وبعد عنك غصب عنه ظلم معملش حاجة يستاهل
يبعد عنك بالسنين وياخذ مؤبد ويتحرم منك كان نفسه فى كل لحظه وكل خطوة وكل ضحكة
وزعل يبقي جنبك.. ياخذك من ايدك ويمشيكي أول خطوة يسمع منك حكاوي المدرسه يلعب
معاكي يوديكي للدكتور وقت ما تتعبى يختار معاكي لون النظارة ويشيلك ويقولك ياعيون الغزال
انتي حلوة فى كل حال يقولي عادي وكله بيعدي يكون بس هنا.. جعفر ميعرفش ان البندقة لبست
نظارة ميعرفش حاجات كثير لانه بعيد غصب عنه بتمني قريب يرجع وكل الظلم ده يخلص بتمني
يعيش كل تفاصيل حياة آمنة ويشاركها كل حاجة حقيقي ملناش غير ربنا هو الرحيم القادر ودعواتكم

<https://bit.ly/3tbGFR7>

عن حمدي الزعيم



“النهاردة عيد ميلاد مالك، تم خمس سنين اتولد وباباه مش موجود كان معتقل، ولما خرج حمدي كان مالك عنده سنة ونص مكنش يعرف باباه، وبعد فترة بدأ يعرفه واتعلق بيه وبعد كده حمدي اتقبض عليه تاني 2021/1/5 بعد عيد ميلاد مالك ب 3 أيام ميلحقش حمدي يقعد مع مالك. النهاردة عيد ميلاد مالك الخامس، مالك اتظلم واتبهدل كتير معايا، كنت بروح الزيارة في عز البرد، وهو عمره أيام، حبيبي يا مالك، كل سنة وأنت طيب يا حبيبي وبخير، وبتمنى في السنة الجديدة بابا يخرج على خير ويكون معنا كلنا”

<https://bit.ly/32VGy1o>

“حضرت اليوم أنا والأستاذة المحامية سحر علي مع والدي المصور الصحفي حمدي مختار، طلبنا إخلاء سبيله بأي ضمان تراه هيئة المحكمة، وأن يراعوا ظروفنا العائلية، حيث إن والدي هو العائل لنا، بالإضافة إلى خلو أوراق القضية من أي دليل أو أحراز. طلبت أشوف بابا، الرئيس قال أقدم طلب، وبعد انتهاء الجلسة دخلنا للرئيس مرة أخرى، وأكدت عليه أنني عاوزة أشوف بابا، وشوفت بابا في غرفة المشورة، وتكلمت مع الرئيس مرة أخرى لأوضح له أننا نحتاج والدي، وأنه ليس هناك ثمة دليل أو أحراز بالقضية، فقال لي يا أستاذة أنتي تكلمتي 3 مرات وأنا سمحت لك تقابلي والدك مراعاة لبكائك ولموقفكم أنتي ووالدك، فقولي الله المستعان. إحنا في غاية الحزن والوجع لأننا كل 45 يوما نقف ونكرر نفس الكلام، ونأمل خروجه لينا بالسلامة.”

<https://bit.ly/3ImqmfD>

عن خالد غنيم



“سنتين حبس احتياطي بسبب كورونا، موجة وراء موجة، تجديد وراء تجديد، سنة بعد سنة واحنا زي ما احنا. ” “عمر يتاكل خلف الجدران بدون أسباب سوى أنه حبها قوي وخاف عليها.. عمر منه ومننا.. من عيالي اللي بقه مفيش كلام حتى بقه مفيش السؤال ايه يا ماما بابا عمل ايه. بقينا بنخاف نسأل بعض لان الدموع دايمًا تسبق الكلام بقينا بنخاف نقول لبعض إنه اتجدد له.. بقينا عايشين على أمل الخروج في أي وقت.. فكرة الـ٤٥ يوم إننا اتعودنا عليها احساس مميت وأسئلة كتيره ليه وبعدين وايه الهدف وعمل ايه. مع كل زيارة لوالده المريض اهرب من سؤاله وأصبح الكلام محفوظ وجمله خايف اموت وابني الوحيد ماياخدش عزائي كلمات وحروف عاجزه عن التعبير عن الوجع عن القهر على الألم سنتين علشان قال إصابة طبيب بكورونا في الوقت نفسه ان حوالي ٧٠٠ طبيب ماتوا بكورونا. فين الأخبار الكاذبة في الخبر.. تعبنا من الكلام والانتظار وفقدان الأمل مع كل تجديد. صعب رسالة وصلتنني منه لما طلب مني صور لينا قالي هاتي صور لكم كلكم اصل انتم

بتوحشوني قوي.. ياااااه على الوجع. أمنيات اسره طال غياب عائلهما إن يكون معنا في رمضان
السنة دي بعد غيابه عامين أملنا في الله وفي انتظار فرج الله وكلنا ثقة في عدل ورحمة ربنا.

<https://bit.ly/3Iziq4N>

عن زياد العليمي



٩٩٦ يوم على خطف زياد العليمي والقبض على هشام فؤاد وحسام مؤنس! يوم الخميس الجاي يكون فات الف يوم!!.. احداث كثيرة حصلت ، وهمه بعيد عنا، وعن أولادهم: فاطمة وسيف هشام فؤاد، وفيروزة ومجد حسام مؤنس، ونديم زياد العليمي، وبسام العليمي، وأليس وآسية بسام العليمي، كلهم داقوا مرار ما كانوا يستاهلوه، وهمه في عمر الحلم والأمل والفرشة والانطلاق!! .. كل حد فيهم كان محتاج لحضن الحبيب الغايب!! كل حد فيهم كان محتاج السند الحقيقي اللي يضمن له الأمان! ربنا يرجع لنا الحبايب بخير عاجلا. ويحرق قلوب كل اللي يبعد حد عن ضناه أو ابن عن أهله. النهارده سمعت ست عند السجن بتدعي بصوت عالي "ربنا يحرمهم من نور عينيهم ، لا يطولوا يشوفوا عيل ولأم ولا مَرَّة، كل اللي حرموا حد يشوف عيُّه .." احذروا دعوة المظلوم

<https://bit.ly/3i8lyl3>

مفاجأة ما تخطرش على البال ❤️ .. لقيت بنوثة حلوة بتخبط على الباب وشايلة شيلة. وبتقول لي ان زياد سحب فلوس من الامانات بتاعته واداهها لوالدة مسجون زميله، توصلها للبنوثة 😊 ووصاها تجيب لي هدايا بمناسبة عيد الأم: "علبة تمر" - طبعاً ، عشان عارف اني باحبه- ومعها هدوم!! ❤️ انا لسة مش قادرة استوعب المفاجأة!!.. ربنا يسعد قلب اللي وصلت الفلوس واللي اشترت الهدية وجابتهالي وبارك لهم ، وينجي زياد وكل سجناء الرأي ويرجعهم لاهلهم بخير عاجلاً 🙏 . ويارب انت عارف بقى حتعمل ايه مع اللي بيحرموا حد من ضناه او ابن من اهله ومن أحبابه

<https://bit.ly/3lyExHW>

عارف يعني ايه الف يوم وانت مبعد قسرا عن بيتك وفرشتك وحصن ابنك واحبابك وعن شغلك وعن اهتماماتك؟ كام مرة في كل يوم من الالف اشتقت لحصن ابنك او حد من احبابك؟ كام مرة حنيت لمكان نفسك تروحه؟ كام مرة كان نفسك بس تمشي رجلك في الشارع حوالين البيت؟ كام مرة كان نفسك تروح مع اصحابك فيلم او مسرحية او رحلة؟ كام مرة اشتقت لاكله معينة متعود تاكلها في مكان بعينه؟ كام مرة كان نفسك تبقى على راحتك في البيت، تمام وقت ما تعوز وتصحى وقت ماتحب وتدخل تاخذ دش لما يبجي لك مزاج او حتى تدخل الحمام وانت حاسس بخصوصية؟ كام مرة حسيت ان نفسك تقرا كتاب معين او تسمع اغنية معينة، من غير ما تبقى تحت رحمة رقابة حد ثاني لازم تستأذنه ويا يسمح يا يرفض؟ كام مرة حسيت إنك عايز تستقبل حد صاحبك في بيتك او تروح له بيته عشان تفضض له او تدردش معاه او تاخذ رأيه في قضية شخصية؟ كام مرة تفكر في عبثية السبب المعلن لابعادك عن حياتك الطبيعية وتعطيل مسيرتها!! "الإيحاء"!!!! أولادنا واخدين أحكام بالسجن، وسنوات من العمر بتضيع، حتى مش لأنهم قالوا رأي مختلف! لأ، لأنهم قالوا كلام، وشخص ما لقي في الكلام ده "إيحاء" مش عاجبه!! ربنا ينجي ولادنا ويحفظهم ويحميهم وينتقم من كل من حرم حد من ضناه او حرم شخص من أهله وأحبابه! وكل من برر هذا الظلم او طبل له! اللهم عدلك وانتقامك

<https://bit.ly/36ffexk>

عن صبحي صالح

 Doaa Sobhi Saleh
@DaaaSobhi83 21h  

دي كانت آخر صورة لبابا مع عمر ابني في يونيو 2013 كان وقتها عنده 4 سنين و نصف تقريبا ، عمر دلوقتي قرب على 14 سنة!! بابا مايعرفش شكله بقه ازاي ، يمكن لو شافه أصلا مش هيعرفه بابا ممنوع من الزيارة من 5 سنين مش بنشوفه و لا بيشوفنا و لا نعرف عنه أي حاجة

#سجن_العقرب
#افتحوا_الزيارة



"بابا ممنوع من الزيارة من 5 سنين مش بنشوفه و لا بيشوفنا و لا نعرف عنه أي حاجة"

-ابنة المعتقل صبحي صالح

<https://bit.ly/336yJXf>

عن صفوان وسيف ثابت



صفوان ثابت .. المواطن العاشق لوطنه .. الذي لم ينفصل يوماً عن واقع بلاده و مشاكل ابناءه .. دائماً مهموم بقضايا هذا الشعب .. لم يستغل يوماً منصبه في حل مشكلاته الشخصية بل كان دائماً مهموم بالقضايا العامة .. هكذا عاش و عمل من أجل بلده الحبيب و هكذا ربي أبناءه .. هل هذا يكون التكريم ؟ اتهامات باطلة و تصفية حسابات متى يرفع الظلم عن صفوان و سيف ثابت ؟!

<https://bit.ly/3AhvJDL>

زرت بابا وكان بردان !! بابا اكثر من ٧٥ سنة !! أبويا صفوان رجل □ الاقتصاد الغني عن التعريف ! هو وأخويا في زنازين انفراديه في أسوأ سجون مصر ! شبابيك الزنازين مفتوحة في البرد دة ! أهالينا وحبابينا اللي غالين علينا أوي عايزينهم يتدفوا في بيتوهم ووسطينا ! خرجوهم كفايه كده!

<https://bit.ly/3KxNjrw>

الجلسة بكرة! جلسة بابا وسيف .. زي كل مره عندنا أمل في ربنا يفرجها.. نتمنى ان القانون يتم تطبيقه: ١- بابا يظهر في الجلسة ما يفضلش خفيه عن الكل تحت.. ٢- بابا يشوف ابنه سيف اللي محبوس عشان ذنبه إنه واقف في ظهر أبوه ٣- بابا وسيف يشوفوا محاميهم ويتكلموا معاهم ٤- ندخل الجلسة وما نتمنش زي المرات اللي فاتت رغم ان المحكمة بتسمح لنا بالدخول

<https://bit.ly/3qT2dRs>

شكراً لكل اللي بيدعي وبيسأل بعد انتظار خارج المحكمة لاكثر من ٦ ساعات! لم يتم النظر وتم التأجيل ليوم الاربعاء! بابا وسيف ما ظهورش أصلاً.. بيتقال انهم تحت وماحدش يعرف شافوا بعض ولا لا!

<https://bit.ly/3nZEDAR>

انعقدت الجلسة اليوم! - كانوا رافضين يطلعوا بابا وسيف من تحت! - بعد انتظار طويل طلوعوا بابا بس لمدة دقائق! - رفضوا ان المحامين يتكلموا معاه الا من ورا الازاز بالاشارة بحجة خايفين عليه من كورونا!! 😊 - المحامين ماشافوش سيف أصلاً!! - لم يسمح لنا بالدخول.. خرجوهم. كفايه

كده <https://bit.ly/3G58Q7Q>

سنة فاتت .. سنة من غير سيف.. سنة اكنها عمر بحاله! العيال كبرت اوي في السنة دي، إل طول وإل بدل سنانه.. مفتقين ابوهم اوي بس شايفينه البطل بتاعهم سيف، الابيض في شعره زاد، بس لسة ضحكته حلوة زي ما هو ولسة قوي و ثابت.. الحمدلله سنة عدت.. سنة من الوجع والافتقاد، سنة من القوة واليقين سنة من الرضا باللي ربنا اصطفانا بيه من ابتلاء.. الحمد لله سنة محروم من عياله وحياته هو في حد اصلاً "تحت التحقيق" يتحبس في سجن انفرادي تحت الأرض ماشافوش بني ادم ولا حتي يشوف الشمس؟ هو في "تحت التحقيق" لمدة سنة؟؟ برغم كل دة.. يقيني في الله وفي دعوات حبايبه الكثير مخليني متأكدة ان فرج ربنا جي جي .. ان شاء الله

<https://bit.ly/3IYE3v5>

رفضوا زيارتنا ل بابا وسيف! الرد كان غريب المره دي!! مالكوش استثنائه ودي التعليمات اللي جاتلنا! واحنا مالناش غير اننا ننفذ التعليمات! الجو برد اوي! يا ترى عاملين ايه؟ سيف ما اتشافش حتى الجلسة اللي فاتت!! يا ترى كويس يا حبيبي؟ امتى الكابوس ده يخلص يا ربي؟

<https://bit.ly/3B5Kkm8>

انهارده رحتمكتب النائب العام، ما قابلتوش شخصياً، بس قدمت نفس الطلب اللي قدمناه للمحامي العام والنيابة: وهو إخلاء سبيل بابا وسيف نظراً لظروف ماما الصحية الحرجة نتيجة لحالتها النفسية السيئة بعد حبسهم من اكر من سنه بدون سبب! في انتظار الرد يا رب صوتنا يتسمع المرة دي دعواتكم

<https://bit.ly/3JRYVog>

لمدة تزيد عن سنة و ٣ أشهر عانت عائلة ثابت الظلم و سلب حقوقهم الإنسانية.. كل الطرق الشرعية طُرقت.. حاولوا كل حاجة لاخذ ابسط حقوقهم حتى للدفاع عن النفس او الزيارات القانونية للاهل او المحامين كل يوم ظلم بياخذ من عمر



وصحة من نجهه... ندعوا الله لها ولهم بالشفاء والثبات والفرج العاجل إن شاء الله

<https://bit.ly/3KsrzwJ>

امبارح في نص الليل.. خرجوا بابا وسيف
زاروا ماما لمدة ٥ دقائق وهي غايبه تماماً
عن الوعي. انا بس كان نفسي تحس
بوجودهم.. شكراً لكل اللي يساعد
ومتضامن معنا ويبدعي. الحمد لله
عقبال اخلاء السبيل. لعلها البداية ل
<https://bit.ly/3w0yhps> ..إنفراجة..



بعد زيارتنا ل بابا وسيف وبعد زيارتي ل بابا (من ورا الازاز وفي السماعه) وبعد توصيات كتيره منه بعد ما شاف ماما .. بابا طلب من المسؤل: ممكن أسلم عليها ؟ الرد : لا ما سمحوش ! بابا: خلاص حسلم عليها هنا كان يحصل ايه اذا كنتم سبتونا نطبطب على بعض ؟ يحصل ايه اذا بابا وسيف خرجو؟

<https://bit.ly/3CMTOUg>

تم إلغاء العزاء في مسجد الشرطة الشيخ زايد نظراً لظروف خارجه عن إردتنا !

<https://bit.ly/3Jujam>

"اجمدي يا ههبوب" "البقية في حياتك يا ههبوب" هكذا عزاني خلسة كل من أخي و أبي في وفاة أمي رحمة الله عليها. بعد محاولات و مطالبات من أصدقائي و أقاربي لرجال القوات الخاصة المصاحبة لأبي و أخي في جنازة و دفن أمي. لم يوافقوا رجال القوات الخاصة لمحادثة أبي و أخي عبر تطبيقات التواصل الاجتماعي لكي اعزيهم و يعزوني و بعد صراخ الكثير من احبابي هناك قائلين "دي بنته - هي بره مصر - من فضلكم عاوزه تسلم علي ابوها و اخوها- طيب دقيقة واحدة - الخ الخ الخ" كله قبل بالرفض. حتي في احلك الظروف اتمنعت. راضية يا رب بقضائك و لا نقول الا ما يرضي ربنا انا لله و انا اليه راجعون. صابره و مؤمنة و محتسبه يا أمي كما تربيتنا و قوية

وصامدة و ثابتة مثلك يا أبي . وظني فيك يا رب جميل ❤️ وادعو لامي بالرحمة و المغفرة و
الرضوان. و ادعو من كل قلبي علي كل ظالم يا رب اللهم عليك بكل من ظلم و استباح قهر الناس
و عليك يا الله بكل من أيد هذا الظلم أو سكت عنه او استنفاع منه و قبل علي نفسه مال حرام و هو
يعلم انه حرام. اللهم ارنا آيات قدرتك في كل حاكم ظالم يا رب اللهم ارنا فيهم آيات قدرتك اللهم
آرنا فيهم هم و زوجاتهم و ازواجهم و ابنائهم و بناتهم و احفادهم و كل نسلهم كل فقر و تشريد و
مرض و قهر عاجلا يا رب العالمين ☐ بهيرة ☐ الشاوي ☐ اسفة ☐ يا ☐ امي ☐ بهيرة

<https://bit.ly/3wi9c2V>

" انا خايفة يا بنتي اموت و اخوكي و ابوكي ميسلموش عليا" هكذا كانت اخر كلمات امي عندما
زرتها في مصر في الصيف! من ٢٠٥ يوم قبل وفاتها! بابا و سيف سلموا عليكي يا أمي بابا و سيف
حضروا الجنازه و الدفنة يا أمي سيف حبيب قلبك هو من أم الناس كلها في الصلاة عليكي يا أمي
سيف حبيب قلبك ال نزلك لمثواكي الاخير و آخر من قبل وجهك يا أمي من بدأ المحنة من
ديسمبر ٢٠٢٠ الناس بتدعي ليك يا أمي نشرتي الفيديو الاول، الناس كلها دعيت لك يا أمي
نشرتي الفيديو الثاني، الناس كلها دعيت لك يا أمي استدعوكي لاكثر من ١٠ ساعات تحقيق و
الناس كلها دعيت لك يا أمي و دعيت علي الظالمين (و ما كان له هذا التحقيق من أثر قهر عليكي
يا أمي) عمليتي العمليه و في المستشفى تعبانه، الناس كلها بتدعي لك يا أمي و بتدعي علي كل
ظالم. توفيتي، بشر بشر صلوا عليكي يا أمي في مصر و خارجها ليس باقل. ماذا بينك و بين ربك
يا أماه ❤️ ❤️ ❤️ ❤️ احسبك يا أمي شهيدة في أعلي العليين بإذن الله - بمرضك و قهرك و
ظلمك يا أمي. احسبك شهيدة بحسب قول رسول الله صلي الله عليه و سلم "مَنْ قُتِلَ دُونَ مَالِهِ
فَهُوَ شَهِيدٌ، وَمَنْ قُتِلَ دُونَ دَمِهِ فَهُوَ شَهِيدٌ، وَمَنْ قُتِلَ دُونَ دِينِهِ فَهُوَ شَهِيدٌ، وَمَنْ قُتِلَ دُونَ أَهْلِهِ فَهُوَ
شَهِيدٌ. و أنت يا أمي كنت تدافعي عن مالنا و أهلنا يا حبيبتي ❤️ ذهبتي يا أمي إلي الرحمان
الرحيم ذهبتي يا أمي ال من هو أحن و لطيف بيكي من جموع الناس كلها في حنيتهم. يصعب
علينا فراقك يا أماه و لكن علي لقاء - ان شاء الله - ليس ببعيد يا حبيبتي و أدعو من الله ان يكون
رحيلك سبباً في فك الكروب عن الناس أجمعين و عن كل الشعب المصري بل و عن الامة
الاسلامية والدول العربية بأجمعها و تكون نهاية كل الظلمة و المستبدين. اللهم امين الحمد لله انك

هتختصمي من كل من ظلموك يا حبيبتى عند رب العباد القادر القاهر فوق عباده سبحانه و تعالى
أبلغني ربي أنني أشكو اليه و أقول (ان غير المسلمين في الغربة كانوا علي ابني و علي أحن من
المسلمين في بلادى- كانوا أحن يا أمي) حسبنا الله و نعم الوكيل راضون يا الله بقضائك و ادعو
علي كل ظالم يا أمي. اللهم ارينا فيهم عجائب قدرتك علي ظلمهم يا رب اللهم جبراً لنا عظيماً يا
الله يليق بعزتك و جلالك مش قادرة اشوف كرسكي يا أمي فاضي في البيت. اللهم انتقم منهم يا
رب. يا رب اقهرهم و افقرهم و اكسرهم يا رب. اللهم لا يروا اي انتصار لهم يا الله. يا رب انهم قتلوا
أمي و انت علي أخذهم قادر يا الله. ♥ و ظني فيك يا رب جميل ♥ كل سنة و أنت طيبة يا أمي
و عيدك في الجنة أحلي يا حبيبتى

<https://bit.ly/36Smk11>

ثاني عيد ميلاد ليك و انت مش وسطنا يا سيف كبرت سنة، و كل سنة بتكبر في نظري و نظر الكل..
كان نفسي نكون سوا و طنت حبيبتى -الله يرحمها- معنا بنحتفل بيك.. بس ربنا مش بيعمل الا
الخير و احنا علينا الحمد الحمد لله كل سنة و انت مبتسم ابتسامتك الحلوة يا حبيبي حتى في
اصعب الظروف، كل سنة و انت رمز الرجولة و بتلهم الكل كل سنة و انت اسم على مسمى.. "ثابت"
واحشنا اوي اوي معاك و معنا اللي مفيش ارحم منه معنا الله.. فمن علينا؟

<https://bit.ly/3x1gwqu>

سيف تم ٤١ سنه انهارده .. من يومين زرتة وبعدها زرت بابا .. الحمد لله بخير رغم الحزن الكبير
اللي هما فيه .. محتسبين .. صابرين .. ثابتين .. رؤيتهم لناس كثير جاين يعملوا الواجب من قلبهم
اسعدهم جدا .. الناس دي ما كنتش عارفة انهم حيشوفوهم! كأنهم جاين يردوا غيبتهم .. سيف
باعث رسالة يشكر كل الناس اللي جات وصلت و عزت و الناس اللي دعت و ما قدرتش تيجي ..
وقالي .. شكراً يا شدة عرفتيني مين معنا

<https://bit.ly/3iQ0gR2>

عن عبد الرحمن طارق (موكا)



بقالي فتره كبيره مش بتكلم عن موكا مش قادره اكتب بس هو وحشني اوي كنت محتاجاه اوي الايام اللي فاتت قضيتها في المستشفى وكنت في حاله وحشه طول الوقت بفكر لو كان هنا كانت هتفرق كثير كلنا محتاجينه وكلنا مستنيين اي امل تعبنا وكل حاجة بقت صعبه اوي وبستنزننا سواء انا او ماما اللي مبقتش عارفه تعمل ايه وتروح فين تفضل تجري معايا في المستشفيات ولا تفضل تجري وراه في السجن مفيش اي حد عنده رحمه ينهي ولو جزء بسيط من المطحنه اللي عمالين نتضرب فيها كلنا طول الوقت عرفت ان موكا قال في الجلسة امبارح كل ظروف حبسه السيئه واللي بدون مبرر اتمني ان القاضي يفكر شوية فيه كأنه ابنه حتى وحياته بتضيع بالشكل دا جوا السجن

□ الحرية □ لموكا

<https://bit.ly/3I4eqZj>

النهارده كانت زيارة موكا بعد ما تنقل سجن المزرعة هو الحمد لله بخير وطبعاً كالعاده لازم يرجعو اي حاجة من باب ان هنرفهه جوا ولا ايه فرجعو الشوكولاتة والخميره ودرا الفشار احتمال يكونو خطر على ان الامن يكون مستتب جوا السجن

<https://bit.ly/3rvkdR0>

بقالي فتره كبيره مش بتكلم عن موكا مش قادره اكتب بس هو وحشني اوي كنت محتاجاه اوي الايام اللي فاتت قضيتها في المستشفى وكنت في حاله وحشه طول الوقت بفكر لو كان هنا كانت هتفرق كثير كلنا محتاجينه وكلنا مستنيين اي امل تعبنا وكل حاجة بقت صعبه اوي وبستنرنا سواء انا او ماما اللي بمقتش عارفه تعمل ايه وتروح فين تفضل تجري معايا في المستشفيات ولا تفضل تجري وراه في السجن مفيش اي حد عنده رحمه ينهي ولو جزء بسيط من المطحنه اللي عمالين نتضرب فيها كلنا طول الوقت عرفت ان موكا قال في الجلسة امبارح كل ظروف حبسه السيئه واللي بدون مبرر اتمني ان القاضي يفكر شوية فيه كأنه ابنه حتى وحياته بتضيع بالشكل دا جوا السجن

<https://bit.ly/3I4eqZi>

بقالي كثير ما اتكلمتش مع موكا مفيش جوابات رايحه وجايه بينا ولما ماما بتروح زياره بتبقا من ورا سلك يا دوب بيسمعو بعض وتطمئن عليه صعب توصل كلامي يادوب بنوصل سلامات وظروفي الصحيه منعاني اعرف اشوفه اخر مره كنت بعرف امشي كام خطوه شوفته في القسم وحصنته ومكنتش شوفته ولا حصنته من ساعه ما اتحبس كان فات اكثر من سنة وقتها دلوقتي والدتي فأسوء ظرف صحي ليها مش عارفه هتكمل تزوره ازاي اما انا فمش عارفة امشي خطوتين بسبب العمليات اللي بتفشل ولسه بحاول وحشني اوي نفسي اشوفه او اسمع صوته دا انا حتى جواب مش عارفه ابعثله علشان ممنوع محدش فينا قادر يساعد الثاني ومحتاجينه طول الوقت ليه مينفعش يخرج ليه الموضوع صعب كدا اصله مش ارهابي مثلا وخطر ولا قت ل حد ولا سرق ولا اغت صب مع ان كل دول بيخرجو عادي بياخدو عفو وافراج لعدم كفايه الادلة بس طبعا اخويا اللي معملش حاجة

وكان بس طفل متحمس لحلم انتهى وخلص من زمان خطر جدا على الامن العام حد يحس بينا بقا في البلد دي طولت اوي المده وتعبنا وهو تعب سبع سنين من عمره بين السجون كفاية

<https://bit.ly/3sc1PNw>

مستنية خبر النهارده يطمني على موكا بعد الجلسة مش قادره استوعب انه مضرب ثاني موكا اخر مره عمل اضراب لاكثر من 50 يوم كان هيموت شكله كان مرعب مش بيقدر يقف كانت اول مره اشوفه من اكر من سنة وقتها وبعدها عرفت انه اتنقل المستشفى اكر من مره مفيش رحمه ولا عدل مفيش حاجه توقف كل دا اروح اقول لماما ازاي الخبر دا اقولها معلىش يا ماما النهارده عيد ميلادك بس ابناك حياته في خطر ثاني لانه تعب من الظلم ومش قادر يعيش كدا بؤس وتعب ملوش نهايه ولا منطق يارب

<https://bit.ly/34XNYm6>

ماما لسه جاية من الزياة وقالت ان موكا نفسيتة وحشة جدا وصحته تعبانة ومش قادر يستحمل الوضع جوا

<https://bit.ly/3v7VeGQ>

النهاردة اليوم ال ١٤ لاضراب موكا و ١١ سجين غيره من يوم ١١ فبراير حياتهم في خطر والسجن والنيابة ماثبتوش اضرابهم في محضر كل مطالبهم مكان احتجاج ادمي على الاقل ل ما يخرجو بعد مرور اكر من سنتين حبس احطباتب على معظمهم من غير تهمة حقيقية من غير اي جريمة يستحقو انهم بخرجو ويستمرو في حياتهم مش حباتهم تنتهي جوا السجن بالكريقة البشعة دي ياريت لو حد يسمع صوتنا ياريت حد يحس بينا وبأهل كل واحد منهم تعبنا وصوتنا اتبجح من الكلام عنهم وانهم مظلومين ووجودهم جوا طول الوقت دا حرام

<https://bit.ly/3sjx8Hi>

لسه معاد زياره موكا مجاش وكل الايام دي مش عارفة اتظمن عليه او اعرف حالته الصحية واذا كان
لسه مضرب او لا اتمنى بس يكون بخير ويبقا معنا قريب يارب

<https://bit.ly/3KYdaZr>

موكا مريض يخرج للزيارة النهاردة موكا في خطر ونفسيته في الأرض ودي حاجه اول مرة تحصل
احنا مش عارفين نعمل ايه او نتظمن عليه ازاي واخدو منا الاكل بس حتى الجبن مريضوش
يدخلوها

<https://bit.ly/3D37Lxg>

احنا كدا مش هنقدر نتظمن على موكا ل يوم التلات الجاي في معاد الجلسة بتاعته وحتى منعرفش
اذا كان هيرضى يحضر الجلسة أو المحامين ماتقدرش تشوفه وتتكلم معاه بسبب القفص الزجاجي ..
فمش هنعرف نتظمن عليه خصوصا بعد الإضراب عن الطعام وما نعرفش هوفك الإضراب ولا لأ بعد
واقعة الضرب والتعدي عليه

<https://bit.ly/3tx28Ej>

بما ان اضراب موكا مستمر واننا مش هنقدر نتظمن عليه حتى بسبب نفسيته السيئة النهاردة موكا
بقاله ٤٠ يوم مضرب في ظروف احتجاز وزيارات اسوء من المرات اللي فاتت

<https://bit.ly/3qCeKbA>

موكا بقاله ٤٣ يوم مضرب ومنعرفش عن حالته الصحية ولا النفسية اي حاجة كفاية كدا
خرجولنا اخوبا بقا مينفعش يبجي رمضان وهو وسطنا بدل ربعنا عليه طول الوقت ؟

<https://bit.ly/3DfPvB1>

المرة اللي فاتت استمر اضراب موكا ٥٣ يوم علشان تحسين أوضاعه بس جوا السجن المرة دي بقاله ٤٤ يوم مضرب واتعرض للضرب في السجن وقدمنا بلاغ بدا وعملنا تيليغراف للنائب العام في بداية إضرابه وحالته الصحية متدهورة انا مش مستعدة اخويا يموت جوا بيطالب بأبسط حقوقه وهو مش مجرم حتى ولا مدان بأي حاجة غير إنه مر على حبسه الاحتياطي أكثر من سنتين موكا اتاخذ سبتمبر ٢٠١٩ بعد ما كان بقاله أقل من سنة برا السجن وبعد ما كان قضى أربع سنين جوا السجن ولسه كان بيقضي مراقبته اللي هي ٣ سنين من ٦ مساء ل ٦ صباحا وخلص مده المراقبة وهو جوا السجن شهر ١٠ اللي فاتت لحد امتي هيفضل يتنكل بيه بالطريقة دي يعني قضى شبابة في السجن بداية حبسه من وهو عنده ١٩ سنة موكا عنده النهارده ٢٨ سنة المفروض يقضي باقي عمرة جوا مبقاش عنده أي طريقة يقاوم بيها غير جسمه غير انه يا يموت جوا يا يخرج ويعيش

<https://bit.ly/3LruWnQ>

عبدالرحمن محضرش الجلسة النهاردة وزمايلة في القفص قالوا انه كان جاي على كرسي بعجل ورجعوه لان حالته الصحية لا تسمح وعلقوله محاليل

اليوم ٤٤ للاضراب عن الطعام

<https://bit.ly/3NwTmhJ>

ماما راحت الزيارة النهاردة ثاني لموكا وبرضو مشافتهوش وانهارت في السجن وقالت انه مستحيل يرفض الزيارة لما يعرف ان هي اللي جت الا لو هو فيه حاجة واستنت لآخر الزيارة ومعرفتش تشوفة ولسه راجعة في الطريق بتكلمني وبتعيط لو عبدالرحمن جراه حاجة نتيجة الظلم اللي بيتعرضله مين هيتحاسب عن كل دا

<https://bit.ly/3uH44JP>

النهارده اليوم ال ٤٦ لاضراب موكا عن الطعام، وفي الحقيقة ما عندناش أي معلومة عن طبيعة الاضراب وحالته الصحية لغياب المعلومات. وغياب المعلومات دي بشكل اساسي علشان ادارة

السجن رفضت من البداية اثبات حالة اضراب موكا عن الطعام في أي محضر رسمي وبشكل قانوني كالمعتاد من السجون في الحالات دي، علشان يكون فيه تقرير صحي يومي بيتبعت للنيابة عن حالته الصحية اليومية ونقدر نطلع عليه، وده اللي خلانا كأسرة نقدم بلاغ للنائب العام عن طريق برقية تلغرافية في يوم 14 فبراير اللي فات يوم ما موكا بلغ المحامين واعلن اضرابه قدام المحكمة في جلسة تجديد حبسه والتلغراف كان رقمه (٢٥٣٩٩٨١٢٧) وبعدها تم التعدي بالضرب على موكا وزمائله من مسير السجن قدام ضباط السجن علشان رفض يستلم التعيين (الواجب الميري) لانه مضرب عن الطعام، فقدمنا بلاغ جديد بواقعة التعدي بالضرب عليه ورقمه ١٢٩٠٣ لسنة 2022 عرائض النائب العام، والنهاردة المحامي محمد فتحي قدم ببلاغ جديد للنائب العام رقمه ١٥٥٨٣ لسنة 2022 عرائض النائب العام، وده بعد ما المحكمة بلغته يوم الثلاثاء اللي فات في جلسة تجديد حبس بتعذر حضور موكا الجلسة لاسباب طبيه، وبعد ما عرفنا ان موكا حالته الصحية متدهوره، وعبدالرحمن دلوقتي في مستشفى السجن وحياته في خطر وكل يوم في وضع اسوء من اللي قبله، وبيجي على دماغنا كل دقيقة احتمالات كتير مرعبه حولين حياته بنحاول بصعوبة نبعدها عن تفكيرنا طول الوقت علشان محدش فينا يتجنن. كفاية ان ماما انهارت امبارح وهي بتحاول تزوره في السجن والسجن بلغها ان موكا رافض الزيارة، و مافيش اخبار بتجيلنا غير ان حالته الصحية بتسوء. بناشد سيادة الرئيس او اي مسؤول في البلد دي يخرجها، احنا عملنا كل حاجه وقدمنا طلبات وبلاغات لكل الجهات، وهو ماعدوش اي طريقة يحتج بيها على كل اللي بيتعرض ليه من تدوير من قضية لقضية غير جسمه وبالاضراب عن الطعام. عبد الرحمن المفروض يكون معانا دلوقتي في دخلة رمضان ومش المفروض نكون بنكتب كلام زاي ده عنه ولا المفروض نكون عايشين في القلق ده على حياته وكفاية كدا موكا فاضله شهرين ويتم ٢٨ سنة في السجن، احنا مش مستعدين نعيش قلبنا محروق عليه.

<https://bit.ly/3qNjDP9>

عن عبد الرحمن عامر



400 يوم حبس ظلم محروم من حريتك بتهمه انك صحفى!! ربنا يحفظك بحفظه ويردك إلينا سالما معافا فى دينك وبدنك عاجلا وجميع المظلومين. زوجه الصحفي عامر عبد المنعم

<https://bit.ly/35oDEUj>

“لا حول ولا قوة إلا بالله، أمرنا بيد الله وحده، والله غالب على أمره”، نتمنى أن يقضى معنا رمضان وسط بناته اللاتي حرمن منه طوال فترة اعتقاله . عقب اعتقال زوجي في 13 ديسمبر 2020 ، بعد اقتحام منزلنا وتفتيش محتوياته واصطحابه مع قوات الأمن لمكان ظل مجهولا حتى ظهر يوم 20 ديسمبر في نيابة أمن الدولة العليا للتحقيق معه حيث قررت حبسه. “حيات انقلبت تماما، ، لم أكن أتصور أن الأمر بهذا السوء”، معاناة عام من الحبس الاحتياطي والغياب، بين زيارات لا تتعدى الـ20 دقيقة، والتي تبدأ كل أسبوع أمام ليमान طره من الثامنة صباحا من أجل التسجيل في

الواحدة أو الثانية ظهرا، والتي تكون مرة واحدة شهريا، إلى جانب الطبلية لإدخال العلاج والأكل والمستلزمات". "زيارة كل شهر لا تتعدى تلت ساعة، بيننا مترين وأسلاك من ناحيتي وناحيته في غرفة سيكون فيها أكثر من ثلاثين شخص بيزوروا، فتخلوا الوضع بيبقى أزاى ده غير اللي بيحصل أثناء التفطيش ومش هتكلم عنه لكن بأمانه كل التعب بيزول لما بشوف عامر واطمن عليه واسمع منه كلام الثبات والصبر وترك أمره لله كعادته دائما منذ عرفته". "تعب أكثر من مرة، أصيب في رمضان الماضي بالتهاب فيروسي في عينيه نتيجة ظروف السجن وتفاقم الأمر مع وجود السكري عنده وتحول التهاب مزمن لا يستجيب للعلاج". "بدأ يشعر بالآلام شديدة أسفل الظهر نتيجة النوم على الأرض وعدم الحركة واشتدت الآلام عليه، حاولت أدخله لحاف فاير ينام عليه ومخدة طبية رفضوا، قدمت طلب للنقابة اللي هو عضو فيها من ثلاثين سنة عشان تساعدني أدخل الحاجات دي دون جدوى ولحد الآن يتغلب على الآلام بالمسكنات".

<https://bit.ly/3w3HwoX>

زرت عامر النهارده

السجن لم يزدته إلا تسليما لله وتوكلا عليه

السجن لم يزدته إلا جمالا

فيارب فرجا عاجلا بحولك وقدرتك

<https://bit.ly/3wLF9rl>

عن عبد المنعم أبو الفتوح



النهاردة أبويا بلغنا في جلسة المحاكمة انه ممتنع عن الزيارة لحين عودتها بالشكل الطبيعي في سجن المزرعة. حاولنا بالفعل زيارته ٣ مرات خلال الاسبوع الماضي ولم نتمكن من زيارته، في المرة الأخيرة (الخميس الماضي) إدارة السجن بلغتنا أنه رفض الزيارة ولم يتم إبلاغنا بالأسباب وقتها، والنهاردة بلغنا انه امتنع عن الخروج بعد عدم سماح إدارة السجن بالزيارة الطبيعية المباشرة في سجن المزرعة. بقالنا أكثر من ٤ سنين في حبس احتياطي وحبس انفرادي وعزلة من فبراير ٢٠١٨. في ٢٠١٨ الزيارة كانت زيارة مباشرة في سجن المزرعة وفي حضور أحد ضباط الأمن الوطني. ومن أول ٢٠١٩ بدون أسباب اتغيرت الزيارة وأصبحت غير مباشرة بدون تلامس بالتليفون من خلف حاجز زجاجي، وكل زيارة يتم نقله من سجن المزرعة في ترحيلة لسجن شديد الحراسة ٢ علشان الزيارة. سنين بتمر في حبس احتياطي بلا أي مبرر وفي ظروف صحية في تدهور مستمر كان اخرها إصابته بانزلاق غضروفي للمرة الثانية (وهو لم يعالج في الأصل حتى اليوم من الإصابة الأولى اللي أصيب بها أثناء نقله في سيارة الترحيلات لأحد تحقيقات النيابة عام ٢٠١٨). هنفضل

نحاول زيارته طول الوقت على أمل استجابة إدارة السجن في أقرب وقت لطلب عودة الزيارة بشكل طبيعي يحميه من أي تدهور في قدرته على الحركة.

<https://bit.ly/3MSHMNK>

حاولت اليوم زيارة أبويا للمرة الرابعة ولم أتمكن لإمتناعه عن الزيارة لحين عودتها بالشكل الطبيعي، زيارة مباشرة بسجن المزرعة. خلال محاولات الاسبوع الماضي ادارة السجن كانت بتسمح بدخول الطبلية والجوابات لكن اليوم منعت دخول الطبلية ومنعت الجوابات. هحاول ثاني بكرة بإذن الله

<https://bit.ly/37zb0Rt>

الطبلية دخلت النهاردة واستلمنا جواب طمنا عليه الحمد لله .. لسة الزيارة .. يارب قريب

<https://bit.ly/3w9LBYD>

هو جدو لسه حقيقي موجود؟! ابني الصغير بيسألني وهو بيقلب في الصور لما شاف صورته و هو صغير مع جدو. بيسألني و هو مش مصدقني انه لسه موجود. مش مصدق انه ينفع حد يكون موجود و مش عارف يشوفه او يكلمه او يلمسه او حتى يسمع صوته في التلفون اكر من ٤ سنين .

بيسألني و مستغرب ان جدو اللي كان بيحبه كل الحب ده مسألش عنه كل السنين ده!!! هو جدو مبقاش يحبه، بس مش ممكن!؟

قتله يا حبيبي موجود بس في السجن، مش انا شرحتك الموضوع قبل كده. و انه ليه مش عارف يشوفك. هو بعد ما فهمته مش مستوعب ان ممكن يكون حد زي جدو في السجن !!

حتى لو في السجن ازاى معرفش اكلمه في التلفون ؟ و ليه لما نزلنا مصر معرفش يشوفه ويقعد معاه و يحضنه؟

بصراحة انا معرفش ارد باي اجابه منطقيه !! لان انا نفسي مش فاهمه و مش مستوعبه لحد دلوقتي
ازاي ده حقيقي .

فليس عندي اي تفسير منطقي ازاي ده بيحصل و ازاي كم الظلم في منع والدي من حقوقه
الاساسيه في الزياره الطبيعیه. و ازاي كل المسؤولين عن هذا الوضع من اصغر عسكري لحد رئيس
الدوله و ما بينهم من ظباط بيقدروا يناموا بالليل و هما سبب في سرقة عمر والدي بالشكل ده سرقة
٤ سنين من وقته مع احفاده و ولاده. ٤ سنين مش هيعرف يرجعهم خلاص ضاعوا من العمر و لسه
الوضع مستمر.

٤ سنين مشافش ولادي و محضنهمش و ما باسهمش و متكلمش معاهم و ماكلش معاهم و معرفش
يقلمهم كل سنه و انتوا طيبين و مفطرش معاهم في رمضان □ ازاي ازاي انا مش مستوعبه.
ازاي جدو في السن ده اكبر من ٧٠ سنه و اوضاع السجن والزياره تكون بالشكل ده!!! اكيد في
حل ... معنديش رد يا ابني...

هل مفيش اي حد من المسؤولين عن وضع والدي عنده احساس بالظلم ده وقادر يحسن اوضاع
الزياره؟! هل المسؤولين عن الوضع ده من ضباط و مسؤولين في البلد عندهم اولاد و احفاد!!!؟؟
مش متخيله ازاي ممكن اي حد منهم يكون عنده اولاد و احفاد و مش بيعمل حاجه عشان وضع
الزياره بالشكل ده.

<https://bit.ly/3qygDWv>

حاولنا النهارده الزياره لكن أبويا لسه ممتنع عن الزياره لحين عودة الزياره المباشرة بصورة طبيعیه.
اول امبارح، الاثنين، الطبلية دخلت والجوابات ومكنش فيه زياره. اخر زياره تمت في السجن
كانت يوم ٢٩ يناير الماضي، وكان موعد الزياره اللي بعدها يوم ٢ مارس، (مكنش فيه زياره مقرره
لينا في شهر فبراير). ودي كانت اول زياره يمتنع فيها فعليا عن الخروج لعدم الاستجابة لطلب عودة
الزيارات بشكل طبيعي بدون حاجز زجاجي في سجن المزرعة. واللي كان بالفعل طلبه اكثر من

مرة في الشهور الاخيرة، بل وتكرر على مدار ٣ سنين الزيارة فيهم كانت بالشكل ده بعد ما تغيرت بشكل مفاجيء في بدايات عام ٢٠١٩، لكن لم يتم الاستجابة له في اي وقت حتى الان . اخر مرة شوفناه فعليا كان في اخر جلسة محاكمة يوم ١٣ مارس، ومستمرين في المحاولة لحين الاستجابة لطلب عودة الزيارة الطبيعية المباشرة زي ما كانت قبل كدة.

<https://bit.ly/35eLEHO>

حاولنا الزيارة النهاردة لكن أبويا لسة ممتنع عن الخروج للزيارة اللي بتكون بشكل استثنائي مستمر بقاله اكثر من ٣ سنين. كل مرة يتم نقله في سيارة الترحيلات لسجن شديد الحراسة ٢ لزيارة بتكون بالتليفون من خلف حاجز زجاجي بدون تلامس، ولا يسمح له بمجرد السلام على أسرته. ده في الوقت اللي الزيارة مازالت مرة واحدة فقط شهريا لمدة ٢٠ دقيقة بس ولفرد واحد فقط من أفراد أسرته . الطبلية دخلت النهاردة لكن مستلماش منه جواب يطمنا عليه من اخر جواب استلمناه الاثنين اللي فات.

<https://bit.ly/3JVxABW>

عن عبد الناصر مصطفى سلامة



"أخي عبد الناصر مصطفى سلامة

وشهرته عبد الناصر سلامة رئيس تحرير جريدة الأهرام سابقاً

بالتزامن مع إعلان نبأ وفاة عدد من السجناء في السجون المصرية علمنا أثناء زيارتنا لعبد الناصر سلامة يوم الاثنين الموافق ٢٠٢٢/١/١٧ بتعرضه لوعكه صحيه شديده وارتفاع في درجة حرارته وإلتهابات في الامعاء والقولون وخشونة في المفاصل ترتب عليها تنميل في الأطراف وربو بسبب برودة السجن مما أصاب أسرته بحزن شديد .

وبالرغم من خطورة الوضع الصحي لعبد الناصر فقد كذبوا عليه بميعاد محكمه يوم ٢٠٢٢/١/١٦ وقد حضر المحامين ولم يحضر عبد الناصر من محبسه ولم يكن على كشوفات المحكمه في ذلك اليوم .

وساءت حالة عبد الناصر الصحية بصورة كبيرة بسبب ظروف اعتقاله، حيث انه محتجز في عزلة وليس مجرد حبس انفرادي، لاتريض وشمس ولانور ولا يتحدث الى أحد على مدار ٢٤ ساعة . ويعاني عبد الناصر من تعذيب نفسي عبر عزله من جهة، ومنعه من اللقاء المباشر بأسرته من جهة أخرى؛ إذ

تمت الزيارة عبر الحاجز الزجاجي، ولا يسمعون إلا عبر الهاتف وفي حضور أفراد من وزارة الداخلية، فضلاً عن منعه من معظم حقوقه كسجين، إذ أنه ممنوع من القراءة والاطلاع، وصلاة الجمعة والجماعات، ومُنع من إدخال جهاز التدفئة وغطاء ثقيل له خلال فصل الشتاء. أستغيث وأناشد سيادتكم بالإفراج الصحى عنه حيث أنه مريض ويحتاج رعايه ومتابعة وزوجته وأولادهم لم يروه منذ ان تم إلقاء القبض عليه يوم ٢٠٢١/٧/١٨ بواسطة قوة أمنيه من منزلة بمدينة الاسكندرية حسب ما علمنا من الصحف وتم التحقيق معه بواسطة النيابة العامه وتم حبسة لمدة ١٥ يوماً على ذمة التحقيق ويتم التجديد له منذ ذلك التاريخ حسب ما علمنا من الصحف أيضاً بدون علم جريدة الأهرام أو نقابة الصحفيين او حضور محامى خاص به أو محامى نقابة الصحفيين مع إستمرار إعتقاله فى سجن طرة ٢ شديد الحراسة ويتم التجديد له كل اسبوع او أسبوعين منذ إعتقاله بدون حضور محامى أو تحديد موعد للمثول أمام قاضى العدل والتهمة هى تمويل الارهاب ودعم جماعات محظوره ونشر أخبار كاذبة وحضراتكم تعلمون جيداً والجميع فى مصر ووطنية عبدالناصر سلامة منذ تخرجه من الجامعة وعمله بالصحافة لمدة أربعون عاماً فهو لن ولم ينتمى الى اى حزب او كيان او تيارات ودائماً كان يمثل مصر وينتمى لمصر ويكتب من أجل مصر والصالح العام فقط. ونحن عائلته ونيابة عنه نعتذر عما كتب ونعدكم بأنه لن يكتب على الفيس أو أى وسيله اعلاميه أخرى حيث انه مريض الآن ويحتاج رعايه فى المنزل . أناشدكم بفتح صفحه جديده معه وأيضاً بقية المعتقلين حتى يعود إلى أسرته وأولاده وأملنا كبير فى الله وفى سيادتكم والاستجابة الى ندائنا. واليوم إذ يمر على إعتقاله ستة أشهر، أناشدكم الاسراع بالإفراج عنه بضمان نقابة الصحفيين وجريدة الأهرام ومحل اقامته وسرعة التحرك حفاظاً على سلامته ولكم جزيل الشكر .

شقيق عبدالناصر سلامة عارف مصطفى سلامه "

<https://bit.ly/3nCu3zr>

عن علاء عبد الفتاح



صوتها خفيف ومزقطن بشكل

وكل اللي بتقوله "الزيارة حلوة اوي ❤️❤️❤️"

انا مبسوطه، وعارفة ان علاء النهاردة مبسوط اوي .. رغم كل حاجة

حب مبعتر لحد ما نتجمع كلنا كعائلة في مكان آمن وبراح

<https://bit.ly/31L5jNO>

الأحد 9 يناير 2022 كانت جلسة تجديد حبس علاء على ذمة القضية 2019/1356 امن دولة عليا.

علاء قدم أثناء الجلسة عدة بلاغات للمستشار عصام أبو العلا .

مرفق النقاط التي تطرق لها وأجزاء من كلامه:

1- أنه سيتم نقله بشكل منفرد من الحبس بترحيلة خاصة بقاله 5 جلسات، لعزله عن باقي المساجين، ولمنعه من الكلام عن أي انتهاكات يبشوفها. النهاردة احتجزوه داخل عربية الترحيلات - مش في الحبسخانه- لحد ما احضروه لقاعة المحكمة لحضور الجلسة، وده قرار من الداخلية لتكديره. الجلسة السابقة هو كان شاهد على جريمة تهديد واعتداء على جهاد الحداد، ولأنه شاهد فضابط المباحث هددده انه ما يقولش على اللي شافه، وامعانا في التكدير جاب مخبرين يفتشوه، وبدأ يفتشه ذاتي، وبدأ التفتيش يتطرق ل "اقلع دي والبس دي" وافتعل خناقة معاه كأنه رفض يمثل للتفتيش!!

علاء النهاردة قال للمحكمة "لما أفضل محتجز ساعات في عربية الترحيلات فأنا كدة باتهدد" وطلب حضور قائد حرس المحكمة عشان نستعلم على اسم ضابط المباحث اللي ارتكب جريمة بحق جهاد الحداد وهدده الجلسة السابقة عشان نقدم فيه بلاغ رسمي بالاسم .

2- قدم بلاغ أن وهو داخل بعربية الترحيلات شهد جريمة بترتكب في مساحة معهد أمناء طرة، وهي ان الداخلية بتستخدم عمالة أطفال -اطفال سنهم لا يتعدى 15 سنة- في اعمال بناء وتطوير، وان دي عمالة خطيرة على الأطفال ومجرمة بالقانون. وان هيئة المحكمة ممكن تكون ما شافتهمش لأنهم بيدخلوا من بوابة مختلفة، لكن هو بيقدملهم بلاغ رسمي لاتخاذ اللازم .

3- اتكلم عن ظروف حبسه :

"أنا محبوس في شديد الحراسة 2 من سبتمبر 2019، اتسكنت في الأول في زنزانة 11 عنبر (أ)، وفضلت متسكن فيها لغاية من 10 أيام بس تم نقلي. خلال الفترة دي كلها اتنقلت مرة واحدة من الزنزانة اللي في البدروم فقط أثناء اضرابي عن الطعام -ولما كان الضابط أحمد فكري في أجازة- وأول لما رجع من الاجازة طلب اعادة نقلي للزنزانة اللي أنا متسكن فيها اللي هي في البدروم تحت مستوى الأرض .

من بداية شهر أكتوبر في الزنزانة اللي كنت فيها في البدروم، من قبل حتى دخول الشتاء واحنا بنقل الشبايبك كلها بكراتين وأكياس بلاستيك للعزل، ورغم كدة كنا تعبانين وبردانين جدا.

انتقلت مؤخرا بسبب ترميمات في السجن للدور الثاني. لما اتنقلت من 10 أيام، تم تجريدي من الكراتين والأكياس البلاستيك اللي أقدر بيها اقل الشبايك وامنع البرد .

المحكمة سألته "بتنام على سرير؟"

رد " بأنام على مصطبة خرسانية، وبيتصرفلي بطاين وممنوع ان يتصرفلي مرتبة ميري "*"

واستكمل

"الغريب اني بعد ما اتنقلت نمت من غير ما احتاج أسد الشبايك ومن غير ما اتعب. وده بيؤكد ان البدروم اللي أنا فضلت متسكن فيه لمدة سنتين، غير صالح للتسكين وان بني ادمين يناموا به. ولما أفضل سنتين محبوس في الزنزانة دي، ده ما أقدرش أوصفه غير أنه تنكيل وتعذيب متعمد. وعازب أقدم بلاغ في أحمد فكري لأنه تم تسكينني عامين في هذا العنبر. واطول فترة قعد فيها مجموعة في البدروم ده 4 شهور، ولحد قبل وصولي السجن كان بيتعامل مع العنبر ده على انه "ايراد"، بيستقبلوا فيه المساجين بشكل مؤقت لحين تسكينهم في عنابر أخرى ... كل ده وأنا محروم من التريض، محروم من القراءة، محروم من أبسط حقوقي المنصوص عليها في لائحة السجنون".

علاء كمان فكرهم انه عنده خصومة قانونية مع أحمد فكري، وانه ماكانش يعرف عن الخصومة دي غير بعد احالة القضية لما عرف انه محال لانه عمل شير لبوست والبوست كان بيتكلم عن موت سجين من التعذيب على يد أحمد فكري.** والداخلية والنيابة كانوا عارفين بالخصومة دي، ومع ذلك تم تسكينه في سجن شديد الحراسة 2 تحت ادارة أحمد فكري المباشرة.

وطالب بنقله من سجن شديد الحراسة 2 أو نقل أحمد فكري. وأن لما بيتسجن شخصين بينهم خصومة سابقة، ما بيتحطوش مع بعض ولا في نفس السجن من أساسه !

4-علاء وجه سؤال للمحكمة "ايه الاتهامات اللي بيواجهها؟"

القاضي رد :

-الانضمام لجماعة ارهابية

1- ارتكاب جريمة من جرايم تمويل الارهاب

-تعمد نشر أخبار كاذبة

-استخدام حساب خاص على شبكة المعلومات الدولية لنشر أخبار كاذبة

فعلاء وضح انه ماينفغش يتهم في القضية باخر تهمتين، لأنه اتحال بالفعل بهم وخذ حكم على أساسهم. أما بالنسبة لباقي الاتهامات فهو لحد اللحظة دي ما يعرفش ايه الجماعة المفترض انه انضم لها، وايه هو نوع التمويل وايه كيان الجماعة دي، وتقدم بطلب للمحكمة بالسماح لنا بنسخة من أوراق القضية أو الاطلاع عليها أو ان القاضي يقوله تفاصيل التهمتين دول. وأكد على ان طلب معرفة التهم، مش معناه مجرد نص الاتهام لكن تفاصيل التهم نفسها .

"مع العلم باني كنت محبوس في قضية تظاهر، فمالحقتش ولا انضم ولا أموال ولا اعمل أي حاجة!"

5-علاء وجه كلامه للمحكمة وطالب بأن من حقه طبقا لقانون الاجراءات الجنائية ان النيابة تقوله هي بتطالب بايه بشأنه. ولما القاضي أكد على ان كلام علاء يبقى معاه هو، والنيابة ما افصحتش عن موقفها علاء قال

"أنا هافترض ان النيابة بتطلب تجديد حبسي، وبناء عليه أنا باطلب بحبس عضو النيابة لمخالفته القانون، لأنني محبوس احتياطي أكثر من عامين وده مخالفة صريحة لنص القانون"

النيابة خرجت عن صمتها في اللحظة دي وطلبت اثبات كلامه في محضر الجلسة، في تهديد واضح لعلاء .

علاء ختم كلامه ب" من يخالف صحيح نص القانون فهو لا يصلح لمنصب قضائي. أنا باطلب بتمكيني من تقديم طلب لرفع الحصانة عن المحامي العام تمهيدا لاختصامه. أنا دلوقتي عايز اشتكي النيابة بالمخاصمة، وأنا غير مسموح لي بعمل التوكيل الخاص اللازم لاتخاذ اجراءات المخاصمة في سجن شديد الحراسة 2. أنا باتهم المحامي العام مع آخرين، والآخرين دول داخل مبنى نيابة أمن الدولة، بتعطيل مواد الدستور وتهديد المواطنين/المتهمين "

دي بلاغات علاء المثبتة بشكل رسمي في محضر الجلسة. كالعادة ننتظر جهة رسمية واحدة تتخذ أي اجراء جاد في بلاغاتنا -غير حبس علاء طبعا!

*ملاحظة: سبق وقدمننا بلاغ بتفاصيل ظروف حبس علاء للنائب العام، ومن ضمنها امتناع ادارة السجن عن توفير مرتبة ميري لهم للنوم عليها، رغم توفرها في مخازن السجن. البلاغ قدم في يناير 2020 اخذ رقم 4117 عرائض المكتب الفني وحتى الآن لم يلتفت له النائب العام!

** ملاحظة: البوست المتهم علاء بعمل "شير" له هو عن ظروف وفاة المعتقل حسام حامد في زنازة التأديب بسجن شديد الحراسة 2 تحت اشراف أحمد فكري، رئيس المباحث وائل حسن. مرفق رابط بمطالبات العفو الدولية لفتح التحقيق في وفاته

[/...https://www.amnesty.org/.../egypt-calls-for](https://www.amnesty.org/.../egypt-calls-for)

<https://bit.ly/3fhpvKo>

المنطق انتحر من زمان على ابواب مؤسساتهم، تمسكنا به هو مجرد مسألة مبدأ مش اكثر. من كلام علاء في جلسة تجديد النهارده (لسا بينزلوا تجديد وهما محكومين عادي اه):

" من يخالف صحيح نص القانون فهو لا يصلح لمنصب قضائي. أنا باطلب بتمكيني من تقديم طلب لرفع الحصانة عن المحامي العام تمهيدا لاختصامه. أنا دلوقتي عايز اشتكي النيابة بالمخاصمة، وأنا غير مسموح لي بعمل التوكيل الخاص اللازم لاتخاذ اجراءات المخاصمة في سجن شديد الحراسة 2. أنا باتهم المحامي العام مع آخرين، والآخرين دول داخل مبنى نيابة أمن الدولة، بتعطيل مواد الدستور وتهديد المواطنين/المتهمين "

وبردو قدم بلاغ أن وهو داخل بعربية الترحيلات شهد جريمة بترتكب في مساحة معهد أمناء طرة، وهي ان الداخلية بتستخدم عمالة أطفال -اطفال سنهم لا يتعدى 15 سنة- في اعمال بناء وتطوير، وان دي عمالة خطرة على الأطفال ومجرمة بالقانون. وان هيئة المحكمة ممكن تكون ما شافتهمش لأنهم بيدخلوا من بوابة مختلفة، لكن هو بيقدملهم بلاغ رسمي لاتخاذ اللازم.

<https://bit.ly/3HOBk6N>

بالرغم من كل تفاصيلهم: حرمان سنة و ١٠ شهر، ٢٠ دقيقة، الكابينة، سماعة الباناسونيك اللي بتغلوش، طبقتين الألوميتال اللي كارف على فاميه.. شديد نجاسة على بعضه شاكب راكب . شفت علاء وكان افشخ احساس في الدنيا. تلت ساعة بنتنطط. تلت ساعة بنتكلم في كل واي حاجة بحماس كأنك مسرع يوتيوب فيديو x2 . تلت ساعة من السعادة البيور. النهارده بس بدأت احس اني خرجت

<https://bit.ly/3Gkllqp>

من جواب علاء لماما امبارح: كل سنة وانتي طيبة ويارب اشباح يناير تفضل حاضرة على طول

<https://bit.ly/3AyCcu2>

لسة مخلصه زيارة علاء. رغم كل حاجة طالعة من الزيارة مبسوطه، اتكلمنا وهرجنا وقتله اخبار العائلة والدنيا عالسرير وكنا واحشين بعض اوي. باستغرب لما بنلاقي سعادة في عالم طرة التعيس، بس طبعا ماهما كانت زيارة حلوة دايمه فيه تفاصيل تنغز القلب

١ -علاء لبس كحلي، ده معناه ان الحكم عليه هو وباقر واكسجين اتصدق عليه

٢ -علاء كان بيحاول يقنعني النهاردة ان كفاية كدة المفروض اسافر وامشي من هنا. واما قتلته اني عايزة امشي بس معاه، رده كان "أنا لسة قدامي كتير "

*ملحوظة للاهالي بخصوص الزيارات: يخلوا بالهم ان يبقى معاهم شهادة التطعيم، ماعرفش كل السجنون بتطبق فعلا القرار ولا لأ بس شديد ٢ ما بيدخلوش غير اللي معاه الشهادة

<https://bit.ly/3sAfQF4>

سواء راحت تودي طبليه لعلاء من الصبح وجواب زي العادي. استلموا منها الجواب، وبعدها بمدة اخدوا الاكل والحاجات وبقالها ساعات منتظرة جواب منه. اتمنى تبقى عطلة بيروقراطية مش سبب

للقلق او ان علاء او حد جوة حصله حاجة، خاصة وان كل يوم عندنا اخبار تعيسة من السجون.
دعواتكم

<https://bit.ly/3rOq8SH>

طيب، إحنا وصلتنا الورقة دي النهارده. بتقول إن
الحاكم العسكري صدق على الحكم بسجن علاء ٥
سنين يوم ٣ يناير ٢٠٢١، وبالتالي الإفراج عنه
هيكون في ٣ يناير ٢٠٢٧. طيب والسنتين و٣ شهور
اللي هو قعدهم في السجن من ٢٩ سبتمبر ٢٠١٩
إلى ٣ يناير ٢٠٢٢؟ هيقولوا طبعا إن ده كان حبس
احتياطي على ذمة قضية تانية. وده حقيقي: قضية
١٣٥٦ لسنة ٢٠١٩ حصر أمن دولة، والتهم هي



(مشاركة جماعة ارهابية في تحقيق أغراضها، نشر أخبار وبيانات واشاعات كاذبة، اساءة استخدام
وسائل التواصل)، وطبعاً (مشاركة جماعة ارهابية في تحقيق أغراضها) دي جناية. اللي عملوه إنهم -
لما انتهت المدة القانونية للحبس الاحتياطي، يعني السنتين - أخذوا واحد من الاتهامات، (نشر
أخبار وبيانات واشاعات كاذبة)، وده جنحة، وعملوا بيه قضية لوحده: ١٢٢٨ لسنة ٢٠٢١ جنح أمن
دولة طوارئ. طبعاً ماحدث منكم، وانتو بتقروا الكلام ده، غايب عنه أوجه الظلم المختلفة اللي
علاء (وباقر وأكسجين، وزباد، وحسام، ووليد شوقي، وموكا....) بيتعرضوا لها. طيب أنا باكتبه هنا
ليه؟ لسبيين، واحد عام وواحد خاص. الأول: ده توثيق لعملية تجويف القانون، أو تفرغه من معناه.
القانون مش بطبيعته خيّر، يعني وارد جدا تكون فيه قوانين ظالمة، لكن في الحالة دي تحديدا
القانون لو طبق صح هيكون قانون عادل ويؤدي وظيفة حماية المجتمع إلى آخره. تفرغه من
معناه، واستعماله كأداة للظلم والقهر يؤدي إلى نتائج سيئة جدا، التبدلي الغرائبي بتاعها شغناه في
المحكمة: قاضي مش عايز أو مش قادر يُمكن المتهم ودفاعه من ورق القضية!! وفي الآخر مش عايز
أو مش قادر ينطق بالحكم ويبعت الحاجب يقوله بداله !!

التاني: إن أنا حاسّة إن لازم أقول دلوقتي إن أنا مقتنعة - وده كلام صعب قوي - إن أنا مقتنعة إن طول ما النظام ده في إيده إنه يحبس علاء هيجبسه . حكموا عليه بـ ٥ سنين ظلم، وقضاهم. حكموا عليه بـ ٥ سنين مراقبة، والتزم. بعد ٦ شهور قبضوا عليه من داخل المراقبة. اتهموه بالتهمة المجهزة اللي بيوجهوها لكل وحبسوه سنتين احتياطي. اجتزأوا تهمة وحاكموه محاكمة هزليه وحكموا عليه بـ ٥ سنين. من سنتين و٤ شهور مانعين عنه الكتب والشمس والرياضة والتفاعل الاجتماعي من سنتين و٤ شهور حطينه تحت إمرة ضابط متسجلة عليه وقائع عنف مخالفة للوائح السجون النظام ده مش هيسيب علاء، ومش هيسمح له حتى يبني في محبسه حياة تطاق طيب، إيه؟ مش عارفة. لكن أكيد هيكون فيه رد، وهيكون فيه مخرج، وهنلاقيهم.

<https://bit.ly/35tnAkk>

سواء كانت في زيارة لعلاء النهاردة . علاء مش كويس وغضبان جدا وتاني حالته النفسية على الحافة. الوضع عمال يزداد سوءا مش بس في سجن شديد الحراسة ٢ لكن في كل سجون طرة، والتنكيل بالمعتقلين مستمر كأن فيه حد عايزهم ينفجروا وعايز الوضع يبقى أسوأ . لسة هنتناقش مع بعض كأسرة ونستشير المحامين في ايه نعمله بكل الشكاوى والحاجات اللي علاء قالها في زيارة النهاردة. بس حقيقي ربنا ينجي كل اللي في السجون من المجرمين اللي بيديروها ومن النائب العام اللي مختار طواعية يتجاهل بلاغات بانتهاكات جسيمة متكررة واهدار متعمد للقانون . ربنا يعينا

<https://bit.ly/34sn5Xl>

اول امبارح في الزيارة علاء حكالي ان حصلت خناقتين بينه وبين مخبر اسمه محمد الوكيل . المخبر دا في كل شيفت له يبجر شكل مع علاء في ابسط احتكاك، آخر مشكلة حصلت وعلاء يشتري مياه من الكانتين (يبيلغ حد يشتريه لأنه مش بيخرج من الزنانة). المخبر محمد الوكيل وضابط امن الوطني احمد فكري الاتنين بينهم وبين علاء خصومة واضحة وصريحة مثبتة في ورق

القضية. الإصرار على ان علاء يبقى محبوس تحت سلطة الاشخاص دول بالتحديد هو قرار مقصود للتكدير احسن لا سمح الله التكديرة الأساسية بتاعت انه في شديد نجاسة لوحدها مش كفاية. زي ما عملنا قبل كدا هنتخذ كل الاجراءات اللازمة وهنعمل بلاغات وشكاوي بالواقعتين. اتمنى انه ميبقاش زي كل مرة وحد يعبرنا ويستجيب للشكوى وعلاء او هما يتنقلوا من سجن شديد حراسة ٢. الوضع التافه اللي احنا فيه دا لو محدش عاقل اتدخل ووقفه هيوصلنا لأن في مرة مشادة من دول هتفتل وعلاء والمخبر هيمدوا ايديهم على بعض. وتقريبا دا اللي نفسهم يوصلوله . أنا بجد منبهرة بمستوى ضبط النفس اللي اخويا عامله، برغم النكش المستمر والتفاهة والمرازية #FreeAlaa.

<https://bit.ly/34DKk0T>

بردو من الحاجات اللي علاء حكهالي ان في مجموعة جداد اتنقلوا من سجن الاستقبال كعقاب وقاعدين في زنزانة تحت الأرض (اللي هي نفس الزنزانة اللي علاء قضى فيها سنتين في ظروف زبالة ابسط حاجة مثلا انه كان يبقي بردان طول الوقت، كان ساعات بيطلعنا الزيارة بيتعرش من البرد). القصة المتداولة عن المساجين دول : في مسجون "نفسى" (دا بيتقال على اي حد متشخص بمرض نفسي رسمي ومكتوب كدا في التذكرة يعني متسجل في ورق السجن) اتخانق مع فرد امن والمشادة وصلت لمد الأيد وفرد الامن دا اتعور وخيط غرزتين. بناء عليه قرروا يعاقبوا كل الحالات النفسي بأنهم ينقلوهم لسجون مشددة يتكدروا، فا ٩ منهم اتنقلوا على شديد نجاسة ٢. ويقال ان في ٣ راحوا شديد ١ / العقرب. كومبو كدا من الجهل بالصحة النفسية على التخلف بتاع العقاب الجماعي والسيئة بتعم، مش عارفة يتقال عليه ايه ولا ايه بصراحة. للتذكرة: سجن الاستقبال دا اتوثقت فيه اكر من محاولة انتحار في اخر سنتين.

<https://bit.ly/3q0Pg7q>

للزيارة الثانية على التوالي سناء تزور علاء وتطلع شكلها قلقان .علاء لسة مش كويس، نفس حالة الغضب، جايب اخره، كل حاجة بزعيق ونفاذ صبر ومش شايف نهاية للجنون اللي هو فيه. علاء محروم تماما من الكتب والقراية من سبتمبر ٢٠١٩ (ماعد ا اسبوع واحد بالتمام والكمال في مايو

٢٠٢٠) محروم تماما من الكتب ودي حاجة هتجننه، وهم عارفين كدة كويس، وأنا كل شوية بأصدق انهم يمكن عايزين يجننوه، يمكن عايزينه ينهي حياته بنفسه ويريحهم ويجننا بلا رجعة. من ٢٠١٩ واحنا بنقدم بلاغات وطلبات وبنحاول نتفاوض على ان علاء يدخله كتب، (حقه بالقانون ولائحة السجون على فكرة مش اختراع) ودايما فيه حد سلطته اعلى من النيابة ومساعد وزير الداخلية بكل الضباط اللي تبعه بيمنع الكتب. لما بنقول كتب قصدنا أي كتب فعلا، أي مادة مقروءة: ميكي ممنوعة، قصص مصورة كوميكس ممنوعة، روايات أدبية كلاسيكية ممنوعة، كتب علمية ممنوعة، مجلات ممنوعة، جرايد ممنوعة .. فيه قرار سيادي متاخذ باطفاء عقل علاء تماما أو دفعه للجنون ولسبب ما كل ما نكلم حد مسؤول يتعاملوا مع الموضوع على انه شئ هامشي أو تافه. والله نسا بقالنا فوق السنة بنقولهم "ماتكلموش في خروجه دخلوا له كتب" لأي حد بيسألنا . في واحدة من جلسات محاكمته، علاء وصف ان جاله ضباط ميري غالبا من مصلحة السجون في لحظة كان يبدو فيها محاولة ل "تحسين" الأمور. وسألوه عايز ايه وقالهم "هاتولي اي رواية انتو تنقوها من مكتبة السجن" وتعاملوا على ان ده الموضوع حله بسيط أهو وراحوا عملوا مكالماتهم .. ثم اختفوا !! بجد بني ادم عايز كتب يقرأها لحد ما تفرج ويخرج من بؤرة اللاقانون اللي اسمها طرة وشديد الحراسة بالأخص، وهم بشكل متعمد بيحرموه من أي حاجة تحفظ اتزان عقله . وده كله بيحصل وهم طالقين عليه وليد الدهشان (أحمد فكري) ضابط الأمن الوطني اللي استقبله أول يوم بالضرب والتعذيب والوعيد انه عمره ما هيخرج من هنا، ضابط الأمن الوطني اللي بينه وبين علاء خصومة قانونية لأنه اسمه في نص البوست اللي علاء محبوس اصلا عليه دلوقتي، والمخبر محمد الوكيل - نفس الخصومة- اللي في الرايحة وفي الجاية بيحاول يستفز علاء، وطبعا ده كله بيحصل بالمباركة المستمرة لنايبنا العام حمادة الصاوي Egyptian Public Prosecution النيابة العامة المصرية اللي هيدخل موسوعة جينيس للأرقام القياسية باكثر بلاغات ضد ضباط سجون تم تجاهلها في فاصل زمني متواصل !

نعمل ايه ونروح لمين؟

<https://bit.ly/3870T6J>

يمكن في يوم من الأيام نقدر نحكي عن القلة القليلة من الضباط - يتعدوا على صوابع الايد- اللي اظهروا جانب انساني وتعاطف حقيقي - مش تمثيلية علاقات عامة- خلال السنين اللي فاتت. شئ عجيب جدا ان الواحد يبقى في لحظتها ووقتها مش قادر يحكي عنهم لأحسن يتعاقبوا على انهم يسعوا يفضلوا بني ادمين!

<https://bit.ly/35rBeoc>

علاء Al بقاله كثير بطل يرسم لخالد في جواباته 😞 هو كمان بقاله مدة رافض تماما خالد يزوره في السجن ده لسببين

-من يوم ما شاف مساجين متغميين نازلين في عز الظهر مع أفراد داخلية رسمي كأن ده بقى "اجراء عادي" و "قانوني" وهو قلقان خالد يشوف حاجة كدة تعمله صدمة أكثر من اللي هو متعامل معاه أصلا لحد دلوقتي

-ضابط الأمن الوطني احمد فكري (وليد الدهشان) بيحضر زيارة خالد!! تقريبا ده فرد العائلة الوحيد اللي هو مستعد يوريه وشه عشان عارف انه مش هيقوله حقيقته. وأحمد فكري ضابط ارتكب انتهاكات وجرائم كثير، وكل البلاغات المقدمة ضده بيتم تجاهلها من النائب العام وبالتالي عنده حصانة شخصيا مباشرة من المستشار حمادة الصاوي لسبب لا يعلمه الا هو ما هما كان شناعة الجرائم المتهم بها، وبينه وبين علاء خصومة شخصية مستمرة، وبالتالي علاء مش مستعد ان ابنه اللي عمره ١٠ سنين يبقى مع الشخص ده في مساحة واحدة

<https://bit.ly/3tVJqGH>

عن عمرو امام



عمرو بيسلم على كل الناس اللي بتسال وبتسلم وفي الزيارة النهاردة كان افضل من الاسبوع اللي فات هو بيطمئن الكل أنه الحمد لله بخير هو صحيا الحمد لله نفسيا افضل من المرة اللي فاتت بيطلب من كل الناس تدعيلاوا يبقوا في وسطنا قريب. وأنهم يتكلموا عنه دائما ويفتكروه.

<https://bit.ly/3t5Ub7D>

عن محمد الباقر



في جلسة غرفة المشورة النهاردة في القضية رقم ١٣٥٦ لسنة ٢٠١٩ .. هيئة دفاع الباقر طلبوا الإفراج عنهم وقدموا شهادة تثبت إن باقر اتحكم عليه في تهمة نشر أخبار كاذبة المحالة من نفس القضية .. وقالوا أنهم قدموا تظلم يطالبوا بألغاء العقوبة .. والقاضي سمح لباقر يطلع يتكلم عن نفسه

<https://bit.ly/3FeyOVT>

باقر اتجدد حبسه ٤٥ يوم!!! بالرغم من انه اخذ حكم ٤ سنين حبس في التهمة اللي اتحالت محكمة! أنا حقيقي مش بعرف اشرح للناس الوضع المعقد والمنافي لكل عقل ومنطق في النظام القانوني المصري اللي بيتجرب فينا .. كان فيه نكته زمان بتقول .. (الصلاة ما تنفخ من غير وضوء.. فواحد رد وقال "جربتها ونفعت") .. ده ملخص كل العبثية اللي عايشينها ..

<https://bit.ly/3FgbkQ6>

أمتي أمتي أمتي يا باقر.

مش كفايه كده سنين تضيع.....أه يا بلد.....

<https://bit.ly/3FVcrVZ>

حقيقي كابوس عدم وجودك حر يا أخي بس ها نقول ايه عايشين في ظلم وقهر و جونا غضب
وعجز .. اه يا بلد اه..

<https://bit.ly/3uxh8Dm>

اخت باقر زارته النهاردة .. وكان لابس أزرق .. واتصدق على حكمه .. كل مرة يبقي عندي امل
غصب عني .. لما اتأخر التصديق على الحكم .. كان عندي شوية أمل صغيرين أن يمكن باقر ينجو
من الحبس ٤ سنين في سجن شديد ٢ .. لكن للأسف زي كل مرة .. مع كل محطة نجاة .. حد
بيقرر أنه هيستمر التنكيل بباقر ..

<https://bit.ly/34RyzDF>

آخر قصصنا مع باقر..

من وقت باقر ما اتحكم عليه ظلم ب ٤ سنين .. في يوم ٢٠ ديسمبر ٢٠٢١ .. حاولنا نعرف القرار
بالحبس يبدأ امتي وينتهي امتي .. النيابة قالت الملف راح للحاكم العسكري .. فقدمنا طلب لباب
الشكاوى الالكترونية لمجلس الوزراء عشان نطلب نسخة من القرار والملف .. واترد علينا بعد فترة
اننا نتوجه للمسار القانوني القضائي الطبيعي الخاص بالأمور دي .. ورفعنا قضية في مجلس الدولة
عشان نسخة من القرار والملف .. ونطلب كمان اغلاق القضية الاصلية اللي اتقبض عليه على ذمتها
وهوه رايح يحضر تحقيق النيابة مع علاء عبد الفتاح .. وبقاله سنتين ونص على ذمتها .. ومفروض

احتساب مدة الحبس ضمن مدة الأربع سنين اللي اتحال عليهم في قضية جديدة لكن منسوخة عن القضية الاولى بتهمة نشر أخبار كاذبة واللي اخذ فيها ظلم ٤ سنين .. واتحددت جلسة يوم ١٩ مارس الجاي .. وكمان طالبنا بالافراج عنه عشان تجاوز مدة الافراج الشرطي بنص المدة .. عشان باقر محبوس من يوم ٢٩ سبتمبر ٢٠١٩ .. النهاردة عرفنا مدة الحبس .. تبدأ من ٣ يناير ٢٠٢٢ يوم ما اتصدق على حكم ال ٤ سنين .. وتنتهي يوم ٣ يناير ٢٠٢٦!!! كأن مش كفايه حبسه ظلم! .. ولا السنين اللي ضاعت من عمره في السجن لمجرد أنه محامي حقوقي بيقوم بشغله ورايح يحضر مع واحد مقبوض عليه! .. لأ كمان الحكم محسوب من أول التصديق على الحكم من شهر وكام يوم!!!!.. كأن السنين ونص اللي فاتوا كان محبوس في سجن شديد الحراسة ٢ زكاة عن عفيته وصحته .. من أجل الله والوطن .. بدون ما يطلع من الأوضة للشمس!! ليه بجد؟ انا مش بتكلم عن بديهيات زي اصلاً ليه بداية الحكم من يوم التصديق على الحكم مش من يوم قرار القاضي .. عشان طبعاً اللي هيحبس باقر بالسنين ظلم مش هيفرق معاه الأسابيع .. ما حدش فارق معاه وفاة والده وهو في السجن!!؟ طب ما حدش شاف والدته في المحكمة عاملة ازاي!!؟ طب ما حدش شاف باقر النوبي الأسمر بقى لونه بهتان ازاي من غير شمس! طب ما حدش صعبان عليه أني مش بشوفه غير كل كام شهر! وأناي هتجنن في الزيارة واحضنه ونتكلم من غير حديد ما بينا ! أنا مش بتكلم في حياة كالحياة .. مش في أولاد ولا سفر ولا أي حاجة .. أنا عايزا باقر بس معايا في بيتنا .. واتكلم معاه لحد ما اشبع منه .. وأنا مطمئن عليه أنه في أمان ومتدفي وشبعان وباله رايق ويضحك .. بس كدا والله..

<https://bit.ly/3JEENpw>

امبارح في جلسة القضية المرفوعة لباقر ادم مجلس الدولة .. المحامي ا. أحمد راغب طلب تعديل الطلبات والجلسة اتأجلت ل ٢٣ إبريل .. طالبين في القضية نسخة من ملف القضية اللي اتحكم فيها عليه وان القضية الاصلية اللي قضى فيها سنتين ونص حلس احتياطي تتقفل وتتخصم السنين ونص من حكم الاربع سنين في تهمة نشر أخبار كاذبة .. وكمان طالبين الإفراج الشرطي عشان باقر قضى

أكثر من نص المدة .. بتمسك بكل هفوة أمل في أي باب في القانون يخرج باقر النهاردة قبل
بكرا .. دعواتكم ..

<https://bit.ly/36ydEXg>

زرت باقر النهاردة .. أول مرة اشوفه لابس أزرق .. عشان اتصدق على حكم حبسه .. اتاخدت كدا
لوهلة .. وبعد كدا قعدنا نضحك ونهزر على اد ايه هوه قمر في الأزرق .. بيسلم على الناس كلها
ومفتقد كل أهله وأصحابه .. دعواتكم يطلع في عفو رمضان ..

<https://bit.ly/3iFJFPJ>

العقل البشري مش عارف يستوعب ان واحدة جوزها نظرياً معاها في نفس المنطقة السكنية .. اقل
من ١٠ دقائق بالعربية .. ومش بيقدروا يتقابلوا غير تلت ساعة مرة كل شهرين تلاثة .. لمجرد أن
انسان تاني قرر يفرقهم .. وبحبس جوزها في أوضة ما بيخرجش منها للشمس .. بالسنين .. ونظرياً
مفروض ترجع تكمل حياتها وشغلها عادي .. ولا كأن فيه حاجة .. لحد ما تقابله من تاني .. وتحس
لمدة تلت ساعة أنها رجعت بني آدمة مكتملة .. ويتكرر نفس السيناريو عبر السنين .. وتشوفه ٧ ولا ٨
مرات بالكثير في السنة ومش قادرة تخيل هتقدر لحد امتى تستمر في تمثيلية الحياة
المزدوجة بدون أدنى سبب منطقي .. وعقلها لسه مش قادر يستوعب كل اللي بيحصل .. ولسه
بيحاول يلاقي مبررات أكثر رحمة وادراكاً واستيعاباً وتحليلاً .. من مجرد تسليمه للحقيقة المختزلة
في كلمة "الظلم" .. عشان يقدر يتعايش ويكمل ..

<https://bit.ly/3qHnrRY>

عن محمد القصاص



انهاردة كانت جلسة محكمة لمحمد القصاص في القضية ١٠٥٩ لسنة ٢٠٢١
شوفنا محمد واتطمنا عليه وشاف الولاد بعد تقريباً سنة مشافهمش بسبب ظروف الزيارة في السجن .

والقاضي أجل ليوم ٢٠٢١/١/٢٢

<https://bit.ly/3txk9TH>

عن محمد بديع



Doha Mohamed Badie
@Doha Mohamed Badie

21h



FOLLOW

بابا يارب وكل المعتقلين والأميرات يارب
بابا 78 سنه ف البرد ده في زنزانه اسمنتيه ممنوع عنه كل شيء
يارب لطفك يارب
يارب انزل السكينه والدفء عليه وعلى جميع المعتقلين يارب
يا أبي يا نور عيني اني هنا
لست جوارك بجسدي ولا أملك أن أكون لكني بقلبي وعقلي معك
والله أتمني أن أفديك بنفسي وكل ما أملك
ينخر البرد روحي كلما تخيلته مع جسدك الضعيف
يا أبي لولا الله لقتلت نفسي من عجزتي و ألمي ولوعي وحزني ..
لكني اصبر نفسي بأن الله معكم لطيف رحيم عليم بحالكم.. هو
أرحم بك مني ولا حول ولا قوة لنا إلا به

بابا 78 سنه ف البرد ده ف زنزانه اسمنتيه ممنوع عنه كل شيء، يارب لطفك يارب

<https://bit.ly/34d8s9M>

"بأبأ 79 سنه كورونا شديده ترجيع سخونة كحه تكسير في الجسم. حبس انفرادى من 8 سنوات وحتى الآن. زنانه اسمنتية خاوية. جاي الجلسة ملفوف في بطانية مبرى ومش قادر يقف وببمشى بصعوبة، مش هقدر اطمن عليه ولا اعرف اى حاجه عنه وعن حالته الصحية غير في الجلسة الجاية بعد ٣ اسابيع من الازاز من بعيد بالإشارة"

<https://bit.ly/368PUbN>

"شوفنا بأبأ في القفص النهارده في جلسة المحكمة.. وصحته اتحسنت الحمد لله وبببمائل للشفاء مقارنة بأعراض التعب الشديد اللي كانت عنده في آخر جلسة شوفناه فيها.."

<https://bit.ly/3pvvM7a>

عن محمد عادل



ف أول دقائق السنة الجديدة، لوحدي كالعادة، كل أمنياتي تتخلص ف وجودك جنبي. يا رب السنة دي نكون ف بيتنا، يا رب السنة دي تكون سنة الخلاص والبعد عن السجون، يا رب قريب تكون هنا حر ومبسوط ❤️ مش بس كل سنة ده كل يوم وكل دقيقة وكل وقت وأنا بحبك ❤️ وفخورة بك ومعك ف كل خطواتك ❤️ فلتكن 2022 لنا بقى مرة تميل ع ميلنا ومرة تحلى لنا وكده يعنى 😊

<https://bit.ly/3sQrf5b>

من النصف الثاني من نوفمبر الماضي، بدأ محمد عادل يرفض استلام التعيين والزيارة ويدخل ف إضراب عن الطعام، وده ردّاً ع سوء معاملة رئيس مباحث سجن المنصورة له وده متمثل ف: سحب متعلقاته الشخصية: زي المجلات والكتب والجوابات والراديو- تأخير توصيل الجوابات له- تحريض السجناء الجنائيين ضده- مخالفة سيادته لللائحة ولما عادل حاول يتناقش معاه وقال له اللائحة بتقول كذا، رد الباشا رئيس المباحث قال له ** أم اللايحة، ده طبعا غير الاستفزاز بالقول

وده من زمان بالمناسبة يعنى وقت إجراءات كتب كتابنا كان بيقول له " ع جثتي لو الجواز دي تمت!" ومؤخراً بيقول له: أنا بوافق ع دخول الزيارة لك صدقة وإحسان مني! كل اللي قولت ده مثبت ف بلاغات رسمية البلاغ الأول يوم ٢٥ نوفمبر 2021 وده لمحامي عام نيابة جنوب المنصورة. البلاغ الثاني يوم 1 ديسمبر 2021 للنائب العام بالقاهرة. البلاغ الثالث كان امبارح 2 يناير 2022 وده لمحامي عام نيابة جنوب المنصورة، ثاني. عادل بقى له شهر تقريبا نفسيته ف النازل بشكل ملحوظ لنا كلنا، سواء احنا أسرته أو محاميه، ده ع غير عادته تماما، ع الأقل من أول الحبسة دي وهو هادي فعلا وصبور ومستحمل فوق طاقة أي إنسان، دلوقتي نفسيته ف خطر فعلا! عادل محبوس احتياطي من 3 سنين ونصف، معمول له 3 قضايا، تم إخلاء سبيله من واحدة، وفاضل 2، ايه المطلوب مننا عشان يخرج؟ ايه المطلوب منه هو عشان يخرج؟ يتجنن؟ ولا ينتحر؟ ايه المطلوب عشان النائب العام يحقق ف بلاغاتنا المقدمة له، سواء بلاغ 1 ديسمبر، أو قبله بلاغ قدمته أنا بنفسى يوم 22 فبراير 2021. حتى لما نيابة المنصورة اتحركت لتحقيق ف البلاغ المقدم يوم 25 نوفمبر 2021 رئيس المباحث المشكو ف حقه صمم يحضر التحقيق مش بس كده تدخل ف التحقيق كمان! الحل فين؟ أكلم مين ف البلد دي عشان تسببوا جوزي يخرج من السجن سليم وكفاية خسائر لحد كده، فين استراتيجية حقوق الإنسان! ولا احنا مش بني ادمين؟! فين مؤتمرات الشباب ولا احنا مش من شباب البلد، فين القانون مش بيطبق علينا ليه!؟

<https://bit.ly/3ePR3Gf>

هو خلاص كده مفيش حل؟ يعنى الناس اللي جوا السجن هيفضلوا ف السجن؟ واحنا كأهالي هنفصل نلف ف نفس الدائرة ونكتب نفس الكلام؟! الكلمتين اللي عبر بهم كل سجين رأي عن رأيه اللي مش عاجب النظام ثمنهم سنين من العمر ومرمطة للأهل؟ ثمن الكلمتين ضياع مستقبل ووقف حال لأسر كاملة؟! ليه؟ ده النظام تصالح مع كافة خصومه الخارجية، العفو الرئاسي يشمل قتلة ومجرمين! إخلاءات السبيل والإنفراجة المتحدث عنها طول الوقت والمساعي الحميدة ف النهاية بتخرج نفرين كل كااام شهر! ليه؟ ليه مفيش إخلاءات بالجملة ده لو تم إخلاء سبيل 100 بنى آدم كل شهر مثلاً آدامنا كذا سنة عشان السجنون تفضى من الناس المحبوسة ف قضايا الرأي! ليه مفيش

عفو رئاسي للمحكوم عليهم ف قضايا رأي؟! مؤتمرات الشباب واهتمام سيادته بالشباب ليه مش
يشمل الشباب اللي مرمين ف السجن بالسنين عشان رأيها بس عشان كلمتين فقط لا غير! أنا عارفة
إن كل اللي بقوله ويكتبه أنا وكل الناس اللي ف نفس وضعي مالوش لازمة، بس احنا طرقتنا كل
الأبواب وبردوا لا حياة لمن تنادي، وتمسكنا ولسه متمسكين بالقانون وبردوا ولا حد معبرنا، ف
أتمنى حد من المسؤولين يعبرنا ويقول لنا نعمل ايه عشان تخرجوا لنا الناس اللي لنا جوا السجن،
ومش هنطلب حاجة تاني. وبالنسبة لي عن نفسي أنا مش مهتمة لأي تغير يحصل ف البلد، مش
هقول مش عاوزة تغير ولا عاوزة تغير لا خالص، أنا فعلا مش مهتمة نهائي، وشكرا، وكفاية كده بقى!

<https://bit.ly/3FlebS1>

زُرت محمد عادل يوم الخميس، الوضع زي ما هو مع رئيس المباحث اللي صاحب منه الراديو
والكتب والمجلات ومانع الجرائد وبالتالي محمد ما زال رافض يستلم التعيين، لكن الحمد لله هو
حاليا فك الإضراب واستلم الزيارة عادى. لسه شكل الزيارة زي ما هي طبقات سلك معفنة ومسافة
وطبقات تاني و٣ أفراد حرس واقفين معنا. اه وكمان كل كام زيارة كده يبجي حد يصورنا بالموبيل
😊 مش عارفة ليه هل ف مسئول ما مهتم يلقط لنا صورة حلوة مثلا عشان يعنى ما لناش صور ف
كتب الكتاب 😊 ولا ايه مش عارفة، بس أنا المرة دي ضحكت وعملت باي للصورة 😊 متعودة
إني أكتب لمحمد كلمات لطيفة ع مذكرات وكتب الجامعة، يعنى زي وحشتني، بحبك، ذاكر
كويس عشان خاطري، وكده ليس إلا، يوم الخميس ف الزيارة بقول له المذكرات تمام؟ قال لي اه
بس مشطبين ع كل الكلام اللي أنت كاتباه! أنا مش فاهمة لما أكتب لجوزي وحشتني ولا بحبك
ده يزعل الدولة ف حاجة لا سمح الله! احنا خلاص بنتكلم ف 4 سنين إلا كذا شهر حبس
احتياطي، فاضل كام سنة بقى عشان تسيبونا نعيش زي البشر عادى؟! !

<https://bit.ly/3rK8Ep7>

فاضل أيام قليلة وأتم 31 سنة، من ديسمبر 2013 وأنا حياتي واقفة عند نفس النقطة، عمري اتسرق
حرفيا، أكثر من 8 سنين واحنا حياتنا مدمرة. 8 سنين فيهم ناس اتولدت وناس ماتت وناس اتجوزت

وناس خلفت وناس أطلقت وناس اتجوزت ثاني، وناس سافرت، وهكذا! احنا حياتنا مش بتتحرك، مش عارفين نفوق لشغلنا، مستقبلنا انتهى تقريبا، محمد عادل كمان كام شهر ويتم 34 سنة، عمري وعمره اتسرقوا بدون مبالغة! زمان كنا صغيرين، كان ف طاقة، طاقتنا خلصت، استنفذتونا تماما، ما بقناش عاوزين حاجة، عاوزين نعيش ف حالنا! أنا عاوزة أعيش حياة طبيعية ف بيتي مع جوزي، وعاوزة أكون أم، أنا عندي 31 سنة هخلف وأربي ولادي امتي؟! طلباتي ف الحياة بسيطة لا تضرب الدولة ف شيء، والبلد ربنا يهنيكم بها، أنا مش مهتمة وجوزي بمجرد خروجه من السجن هيكون مش مهتم فعلا، هيحاول يهتم بشغله وبيته، كفاية ارجوكم، احنا تعبنا، مش عيب نقول تعبنا، احنا بشر مش فولاذ، عاوزين ايه أكثر من كده؟!

<https://bit.ly/3sWLTJ4>

قررت جنابات المنصورة المنعقدة يوم 23 فبراير تجديد حبس محمد عادل ع ذمة القضية 4118 لسنة 2018، 45 يوم، ويعاد النظر في تجديد حبسه يوم 30 مارس!

<https://bit.ly/3HuSyFG>

ف يونيو 2018 وقت ما محمد اتقبض عليه بصراحة ما تصدمتش اوى، بس أنا كان ف مخيلتي إن آخر المدة القصوى للحبس الاحتياطي، اللي هي لامؤاخذة سنتين، ولك أن تتخيل أنني كنت وقتها بسهر أعيط طول الليل إن لا يا رب سنتين كتير علينا اوى، وكفاية علينا ال 3 سنين اللي قبلهم، والسنة ونصف المراقبة 😊 النهارده فاضل حوالي 3 شهور ونكمل 4 سنين، أنا بطلت أعيطت من زمان والله، دموعي نشفت، أو اللي أنا فيه أكبر من دمعتين هينزلوا من عنيا وكده.

ايه نهايتها، فاضل كام سنة؟ عاوزين ايه مننا عشان تسيبونا ف حالنا؟

<https://bit.ly/35yIG0w>

لما بيشتد البرد ف الشتاء والحر ف الصيف قلبي بيوجعني ع محمد عادل ومزاجي بيكون زي الزفت، مش هيفهم إحساسي غير أهالي المعتقلين. طول الوقت بفكر هو عامل ايه ف التلج ده من

غير لقمة دافية ولا هودوم ثقيلة ولا غطا ثقيل، عايش ازاي ف مكان كله رطوبة ومش بيدخل له شمس؟! كل شتا أقول ده آخر شتاء له ف السجن، كل صيف أقول ده آخر صيف له ف السجن، كل عيد، كل موسم لحد ما بقى لي 8 سنين بصبره ويصبر نفسي بكلام احنا الاتنين عارفين إنه كذب! فاضل كام شتاء وكام صيف؟ فاضل كام موسم وكام عيد؟ فاضل كام لحظة هحتاج وجوده فيها وأنتم سارقينها مني؟ عاوزينا نقدم كام سنة كمان قربان من عمرنا فوق ال 8 سنين؟

<https://bit.ly/3o6wY3B>

النهارده محمد عادل اتعرض بدون محامي أمام جنايات المنصورة، وده لأن المحامي الوحيد اللي بيحضر معاه باستمرار، وإحقاقا للحق مش بيتأخر عنه نهائي كان عنده مرافعة ف قضية تانية ومالحقوش. عادل محبوس من 3 سنين و7 شهور، اه جلسات ف المنصورة بس دي المنصورة مش أسوان عشان المحامين اللي هم أغلبهم أصحابه أو معارفه أو ع الأقل المدافعين عن حقوق الإنسان ما يفكروش فيه ويبقوا متخاذلين من ناحيته بالشكل ده، ده لو فكروا مثلا أن يتناوبوا ع الجلسات كل 45 يوم هتلاقي ف المحصلة أن كل محامي بيضطر يجي المنصورة مرة ف السنة مثلا، ما عتقدش مرة ف السنة كتير ف حق محمد عادل! طلبت من محامين كتير ع مدار 3 سنين و7 شهور إنهم يحضروا مش عشان يعنى وجودهم هيفرق قانونا، كلنا عارفين اللي فيها، بس عشان عادل يحس أنه مش منسي، أن ع الأقل أصحابه فاكرينه، أن فيه ناس مقدره اللي راح من عمره والتمن اللي بيدفعه، لكن لا حياة لمن تنادي! طبعا ف ناس تفضلت وحضرت مرة أو مرتين في وسط ال 4 سنين! تخاذل وتناسي بشكل سخيف ع مدار 4 سنين! المنصورة القاهرة ساعتين سفر، يعنى زي مشوار جو القاهرة عادى يعنى! كلامي طبعا قد يزعل بعض الناس، بس عادي يا جماعة اللي يزعل ف ستين داهية، وأنا مش أسفة لأي حد؛ عشان أنا مسكت نفسي عن الكلمتين دول سنين والله!

<https://bit.ly/3o5PadQ>

محمد عادل يعتبر أقدم محبوس احتياطي بعد إحالة قضية القصاص وأبو الفتوح. عادل محبوس احتياطي من 19 يونيو 2018، يعنى 3 سنين و8 شهور، متقسمين ع قضيتين : الأولى 5606 لسنة

2018 واتحسب عليها سنتين و7 شهور، والحالية 4118 لسنة 2018 واتحسب عليها لحد دلوقتي سنة وشهر والنظر في تجديد حبسه يوم 16 فبراير الجاري، والقضية الثالثة اللي المفترض يبدأ فيها بعد إخلاء سبيله من الحالية 467 لسنة 2020. لما بفكر إن عادل ممكن يُخلى سبيله من القضية الحالية وبفكر إن لسه ف ثالثة حرفيا بحس بانهييار عصبي، فاضل كام سنة حبس احتياطي، محتاجين قرار إفراج من النائب العام، مش هتفضل نعد سنتين ولا ثلاثة ع كل قضية، ارحمونا شوية أرجوكم!

<https://bit.ly/3J8oTDH>

بكرة 16 فبراير النظر في تجديد حبس محمد عادل، ع القضية 4118 لسنة 2018 إداري شربين الدقهلية. مابقاش عندنا أي تصور لنهاية الكابوس ده، بالنسبة لي أنا فقدت الأمل تماما ف أي حاجة كويسة ممكن تحصل، لدرجة إنني ف كل جلسة بسأل التجديد الجاي امتي، مابقتش أسأل ايه اللي حصل لأنني عارفة الإجابة مسبقة، محمد ما بقاش يسأل عن جديد عن فكرة خروجه، حتى لما تصدف ويجيب سيرة الخروج بقى يقول أنا عاوزة أبقى بره عشانكم، عشان تعبك أنت وماما وبابا 😊 التجديد المرة دي هيكون تقريبا آخر تجديد قبل رمضان، محمد آخر رمضان قضاه بحرية كان رمضان 2013! يعنى من 9 سنين، الناس حياتها اتغيرت بالايجاب أو بالسلب واحنا واللى شبهنا واقفين ف نفس النقطة من سنين! قولنا كتير اوى كفاية لو سمحتم، كفاية ما بقماش عاوزين حاجة والله، وخلص عرفنا إنها بلدكم وأنكم أقوياء أوي ومعاكم السلطة والمال والقانون وكل حاجة، تمام، ممكن نعيش بقى، ممكن نشوف حياتنا اللي واقفة من 2013، ومش هنزعجكم خالص!

<https://bit.ly/3HMrP8J>

سجن المنصورة العمومي من السجون اللي حق عليها القول ف الهدم وبيع أرضها؛ ربما نظراً لمكانه الحيوي مش موضوعنا! من فترة عرفنا إن كل من ف سجن المنصورة هيتنقله بسجون أخرى ع رأسها سجن جمصة. النهارده عرفت إن النقل غالباً هيكون خلال أسبوع أو أسبوعين. مفيش أي معلومة مؤكدة عن وضع محمد عادل تحديداً، لكن أنا قلبي مقبوض جداً زيارتنا لسه يوم 24 مارس. ادعوا لمحمد ربنا يحفظه ويسلمه ويصبره، ادعوا لنا نطمئن عليه. <https://bit.ly/3CiAuxL>

عقلي رافض يتخيل إن كمان 3 شهور هنبداً نعد ف السنة الخامسة! لا يا رب، كن فيكون يا رب، احنا بشر وأنت خالقنا وعالم بطاقتنا واللى جوانا 😊 مش ممكن بجد، يا اللي حابسين محمد عادل لو سمحتوا جربوا تخرجوه ولو أتكلم تاني احبسوه تاني سهلة أهى، يا باشا احنا عارفين إنها خلصت وانتهت، والبلد بلدكم واحنا مالناش سعر، وضعفاء اوى اوى، ممكن تسيبونا نعيش في حالنا!

<https://bit.ly/3IfuAyS>

محمد وحشني جداً 😊 آخر زيارة كانت يوم ٢٤ فبراير وكنت أنا اللي فيها، وصدفة أنا اللي هزوره يوم ٢٤ مارس، طول الشهر ده ما كان ف استثنائي، ولا كان ف جلسة، شهر كامل بدون زيارات. عادة بنقسم الزيارات بينا لأن الزيارة فرد واحد طبعاً، أحياناً بيحصل إننا مش بنشوف بعض بالشهرين، وده قاسي جداً ع نفسي 😊 الاجراءات الاحترافية الكورونا ما بقاش لها أي وجود ف البلد، اللهم إلا الكمامة اللي بقت تتلبس نازلة من ع الوش كده عشان ما حدش يقول علينا حاجة، غير كده الدنيا فل، طيب ليه الزيارة ما ترجعش أسبوعية ومن غير سلك، ليه ما ترجعش ساعة بدل 20 دقيقة، ليه ما ترجعش مسموح ب 3 أفراد بدل فرد واحد، ايه اللي هيجصل، هنتعدى من بعض ونموت يعنى؟ احنا موافقين والله واهو تتراحوا مننا! أنا عاوزة أعرف هل شكل الزيارة وتقليص مدته، وتخفيض عددها حالياً هل له أي فائدة غير التكدير؟ طيب لو مقصود به التكدير أتمنى وزارة الداخلية تقول لنا إنه للتكدير، عشان قصة الإجراءات الاحترافية دي شكلها مش حلو ومش لايقة عليكم والله!

<https://bit.ly/3u62iBW>

بكرة آخر تجديد قبل رمضان. محمد عادلفاضل شهرين ونكمل 4 سنين! يا رب يكون كفاية كده، وتكونوا مرضيين بكمية السنين اللي راحت مننا ف الهم والسجون، أرجوكم كفاية، أرجوكم!

<https://bit.ly/3tP9XW4>

عن محمد محيي الدين



هو امتي تخرجوا دكتور محمد امتي الفرج امتي حد يكلمني يبشرني هو 3 سنين دول ليه اصلا وحشني و وحش الاولاد اللي مبقاش عندهم 3 سنين و نص زي ما سابهم و كنت بعرف اضحك عليهم بكلمتين دلوقتي اي رد برده عليهم عن بياهم عقلهم رافضه كفاية بقى

<https://bit.ly/3rzb9Lc>

تخطى أقصى مدة للحبس الاحتياطي منذ 21 فبراير 2021، وقانونا كان يحق له الخروج وأن يصبح وسطنا منذ يوم 22 فبراير 2021. 1065 يوما من الحبس الاحتياطي، 3 سنوات إلا شهر، فعلوا استراتيجيتكم لحقوق الإنسان.

<https://bit.ly/3KNbKSj>

هو ممكن تسيبوا محمد يخرج يخرج خالص سيبونا في حالنا يطلع يواسي والده و يصبره على فقد رفيقة عمره و حياته والد محمد رافض ابنه يطلع ياخذ عزاء والدته و هو متكلبش كأنه قتل ولا سرق الناس اللي افنت عمرها في البلد دي متستحقش تتقهر و تتحرم من ولادها و يادوب يبقى املنا يطلعوا يدفنوهم محمد حقه الاخلاء و حبسه غير قانوني لو كنتم نفذتم القانون كان زمانه خرج من سنة كاملة عوض امه الله يرحمها عن غيابه و عاش معاها اخر سنة في عمرها كانت كل ما ازورها تقولي نفسي اشوفه قبل ما اموت و اهي ماتت ربنا يرحمها بحق قهرتها على ابنها و حبيبها محمد عمل ايه لكل ده محدش يستحق القهر ده ابدأ اخلوا سبيل محمد رجوعه لابوه يحضنوا بعض و يواسوا بعض يطبطبوا على بعض في المصيبة و الوجد ده محمد حقه حقه حقه بالعدل و بالقانون يكون حر دلوقتي حالا مش تبتوهولنا يوم ياخذ الصدمة و يرجع لوحده في سجنكم الظالم حسبنا الله و نعم الوكيل العدل لا سامحكم الله

<https://bit.ly/3gNQQV7>

"والدته توفت من غير ما تشوفه ولا مرة.. أنا محتاجة وجوده جنبي.. أولاده محتاجين وجوده كأب.. والده محتاج ابنه الكبير يواسيه" ..

<https://bit.ly/3heismw>

بعد انقطاع 24 شهر عن اي سلام و أحضان وافقوا اسلم عليه و احضنه لمدة دقيقة عشان ظرف وفاة والدته ... بس انا اللي قعدت اعيط و هو يسكتني كفاية بقى كده 3 سنين ظلم

<https://bit.ly/3hgS7BU>

الحضن اللي طلعت بيه النهاردة بعد سنتين مكنتش فرحانة بيه عشان اتمنع طفلين 6 و 8 سنين تقريبا ... من انهم يسلموا على باهم و خرجوا مقهورين و معرفتش محشش بالذنب و لو كان بأيدي كنت طلبت هما يبوسوا باهم و يحضنوه و انا و محمد كبار مش هيبقى في عقلنا 100 علامة استفهام

ليه ممنوع نحضن بابا زي ايااد و مازن سيد عبد اللاه (الصحفي) ارحموا الاطفال دي و اولادي و اولادنا كلهم و كفاية حرمان بالباطل و الظلم

<https://bit.ly/3HqhEWI>

كل حاجة من امبارح شيفاها وحشة حتى الهوا خانقني وريحته وحشة شبه كل حاجة مقرفة شوفتها امبارح. الدنيا كلها بتلف بيا كأني في حلم. ربنا ينتقم من كل حد موقف حياتنا و حياة كل اسياادكم المحبوسين ظلم.... اسياادكم و تاج راسكم اللي حبستوهم من جنبكم رغم ان عمرهم ما كانوا بيواجهوا الا بالفكر و الرأي . بكرهكم و مش مسامحة و بكره تدوقوا اكيد ... مهو ربنا عدل مش هيسيب حقنا

<https://bit.ly/3KcGs5V>

يا رب معجزة من عندك ، هيحصل ايه لو طلع قرار النهاردة بإخلاء سبيل محمد و حضر اربعين مامته بكره - حاجة تبرد قلبه بعد ما اتحرم منها 3 سنين - في الزيارة كل امنيته بقت ياخذ واجب عزاها و يزور قبرها حتى احلامه بقت اقل ما يمكن و توجع القلب. مبقيناش عايزين حاجة غير الظلم ده ينتهي و يتعوض بس بحضور اربعين مامته و رجوعه لحضن والده و اولاده

<https://bit.ly/3IFs317>

مش كفاية اكر من 3 سنين ظلم. رابع رمضان في الغم ده خلونا نعوض اللي فاتنا و كفاية كده. الناس اللي اتقبض عليهم فالاول و القضية اتعملت بيهم فالاصل كلهم طلوعوا من فترة. كفاية كده كفاية عمر ضايع و اولاد بتكبر و بيت مفيهوش حياة طبيعية

<https://bit.ly/3tW3V6j>

عن مصطفى جمال



4 سنوات على حبس مصطفى جمال

من قضية إلى أخرى، ومن سجن لآخر يقضي جمال أسوأ أيام حياته بعيداً عن أسرته وعمله وكل ما يهتم به

اسمعوا رسالة وقصة مصطفى وطالبوا بالحرية له

<https://bit.ly/3sW4c8y>

عن مصعب رجب

الحمد لله شفت مصعب امبارح بعد غياب أكثر من سنة مقدرتش أزوره خلالها، الزيارة قطعة من العذاب حقيقى وتعنت رهيب فى كل حاجة وأسلاك ورا أسلاك يدوب بنشوف خيالات وأكل الزيارات أكثر من نصه بيرجع والأهالى بيقلعوهم الجزم والشرابات وهما داخلين يعدوا الجزم على سير تفتيش لوحدها .. يبييييه احكى ايه ولا ايه بس ربنا يذلهم دنيا وآخرة ويجعلنا مخرج ويأذن بالفرج قريب بحوله وقوته الحاجة اللى بردت نار قلبى آخر اليوم إن مصعب منسيش عيد جوازنا وطلعلى كيس فى شيكولاتة واسورة هدية عملها بايده ليا

الحمد لله شفت مصعب امبارح بعد غياب أكثر من سنة مقدرتش أزوره خلالها، الزيارة قطعة من العذاب حقيقى وتعنت رهيب فى كل حاجة وأسلاك ورا أسلاك يدوب بنشوف خيالات!!

<https://bit.ly/3uHhJAJ>

عن معتز أحمد



سنين وسنين تفوت ما نحس بوجودها ولا وجودنا.. ولحظة فرح عشناها نعيش العمر تسعدنا.. ومين ينسى ومين يقدر في يوم ينسى.. حبايبنا أعز الناس.. حبايبنا .. يارب اجعله عام الحرية لحبايبنا .. يارب اجعله عام فيه يغاث الناس وفيه يعصرون..

<https://bit.ly/3sSrYTh>

٦ سنوات مضت على اعتقال معتز يوم ٦ يناير ٢٠١٦ وبدأنا في السنة السابعة .. ٦ سنوات وانا أجرى والهث خلف ولدى في كل مكان .. ٦ سنوات بين الأقسام والمحاكم والأمن الوطني والسجون .. ٦ سنوات بين الكلية والسجن ومصلحة السجون للتحضير للامتحانات .. ٦ سنوات تخرج فيها كل زملاء دفعته وشقوا طريقهم في الحياة .. ٦ سنوات من احلى سنين العمر ضاعوا داخل الزنازين لا يرى الشمس.. ٦ سنوات ما بين إخفاء ثم حبس ثم إخفاء ثم تدوير وحبس .. ٦ سنوات توفى الأب بعد

الاعتقال بشهور فكنت أنا الأم والاب معا .. ٦ سنوات مررمة وانهاك مادي ومعنوي لى ولولدى وأنا على حافة القبر ..

<https://bit.ly/3q6h1Mk>

أصبحت أحكام البراءة وانقضاء مدة العقوبة أو إخلاء السبيل ترعبنا بسبب إعادة التدوير .. عايزين ايه من عيال اتاخدوا وهما طلبة فى المدارس أو الجامعات .. وأيه الخطر اللى هيمثلوه على البلد وهما فى عمر الزهور .. وايه شكل شخصية اتشكلت تحت قبضة الأمن فى اهم مراحل العمر .. الله يهون علينا وعلى ولادنا ومحدث يصبرنا ويقول أننا ابطال

<https://bit.ly/34tVJAj>

سابع رمضان وانا لوحدى. سابع رمضان من غيرك ..

<https://bit.ly/3L14Sjv>

انباء عن انهم هيشيلوا السلك خلاص من الزيارة وانا هنعرض ولادنا ونلمسهم الناس كلها فرحانة وانا كمان بس اللى شاغلنى هو احساسى هيكون ايه وانا بحضن ابنى معتز بعد اكر من ٦ سنوات واحنا ممنوعين من الاقتراب حاجات كتير ملخبطة جوايا ومشاعر مضطربة بين الفرحة والدهشة والخوف والاستغراب حاسة أنى مش هقدر اتحمل الموقف وانى وقتها ممكن أقع من طولى

<https://bit.ly/34WubUi>

عن معتز عبد الوهاب



معتز طلب في آخر زيارة إن حد من النقابة يزوره و كتبنا ده و بلغناهم و لم يصلنا رد .. معتز مش مستوعب فكرة تخلي النقابة عنه كل المدة دي و محاولة توضيح موقفه..فهو ليس ناشط او مناضل سياسي و لم يقدم عمل يسئ للدولة هو فقط صانع افلام و شغله الشاغل تقديم اعمال فنية جيدة و اعضاء النقابة يعرفونه جيدا من وقت دراسته في معهد السينما.. ده غير أعماله اللي بتحظى بالتقدير دائما و مثلت مصر داخليا و خارجيا و حظيت بجوائز آخرهم جائزة الانتاج الثانية من المهرجان القومي للسينما في شهر مارس ٢٠٢١ وهو محبوبس !! مش لاقيين مبرر لحبسه حبس احتياطي كل الفترة دي اللي قربت على سنتين!!

<https://bit.ly/3szu09I>

عن هدى عبد المنعم



ده كان يوم عيد ميلاد بابا من ٣ سنين .. ١ يناير ٢٠١٨ وماما منورة حياتنا .. انهارة عيد ميلاد بابا ..
اول يوم في السنة .. بس ماما لا معنا ولا معا .. وكمان منعرفش عنها حاجة .. ! ولا نعرف يا حبيبي
هي حسة بأيه؟! يوم زي ده ماما كانت بتعلن حالة الطوارئ في البيت ولازم كلنا نبقى موجودين
عشان نفرح بابا كلنا .. احنا مش عارفين نبقى زيك يا ماما ولا حتى ربعك في اهتمامك بأدق
التفاصيل في حياتنا .. نفسي اقعد معاكي احكيك وارغي وافضض واسألك زي ما بسألك في كل
موقف مبقاش لاقية حل فيه واقلك ماما قوليلي اعمل ايه او اتصرف ازاي؟! كنت دايمًا بلاقي
الحل عندك يا ماما انا مش لقيتلكي بقالنا ١١٥٨ يوم يا ماما من ١ نوفمبر ٢٠١٨ ومفيش حاجة رجعت
زي الاول احنا بنبدا سنة جديدة واحنا مُحطمين بغيابك والله ماما عيد ميلادها يوم ٢٨ يناير ..
يارب تبقى وسطنا ليس عليك بعزير يارب .. كل سنة وحضرتك طيب يا بابا .. وربنا ما يحرمك منها
ولا يحرمنا منك انتو الاتنين ..

<https://bit.ly/3pMUNPe>

ماما حبيبي النحلة النشيطة .. سوبر ماما حبيبي اللي كانت بتصحى من الفجر بكل نشاط وحيوية..
تصلي وتطبخ وتغسل وتنشر وعالساعة ٧ تكون خلصت شغل البيت تعمل لكل واحد في البيت فطاره
وتشوف طلباتنا التي لا تنتهي وتوصل كل واحدة فينا للباب لشغلها وجامعتها ومدرستها وتبص علينا
من البلكونة تظمن علينا لحد ما نغيب عن عنيها وتستودعنا ربنا وبعد كدا تشوف شغلها المحامية
الحقوقية اللي يومها كله في الدفاع عن حقوق الناس كل الناس .. لا يمكن ترد حد خبط على
بابها، أو استقصدها في خدمة ، أو طلب مشورتها لحل مشكلة حتى مكالماتها في التليفون كانت كلها
لخدمة الناس اللي حوالها معارف جيران صحاب قرايب او حتى ناس متعرفهاش ماما حبيبي اللي
ساكنة في دور عالي ومن غير اسانسير اللي كانت يوميا تطلع وتنزل السلم اكثر من مرة معقولة
دلوقتي يوصلنا أخبار انها مش عارفة تتحرك وبتمشي بعكاز كليتها اليمين والشمال حالتهم في وضع
حرج وجالها اشتباه في ذبحة اكثر من مرة ازمة قلبية اكثر من مرة وكل ده بنسمعه اخبار في
الخلفية !!!! ماما حبيبي بسبب ظروف احتجازها غير الآدمية وعدم السماح حتى بالزيارة لأهلها
واننا نظمن عليها ٣ سنين و٣ شهور مسمحولناش بزيارة واحدة !!! ليه كل دا !!! ماما عمرها ما أذت
أي كائن على وجه الأرض ماما بلسم الجروح طيبة القلوب ماما روح المحبة والحنان والعطاء لكل
حد عرفها واتعامل معاها من حقها وهي فوق الستين سنة انها تعيش معززة مكرمة في بيتها وسط
بناتها وأحفادها تروح لدكاترتها وتتعالج وكلنا نظمن عليها احنا بنموت في اليوم ألف مرة واحنا
منعرفش حاجة عن ماما وعن وضعها الصحي خرجو ماما !!!! 😞😞😞😞😞

<https://bit.ly/3Alc0mt>

كل يوم بفتح صور ماما اتفرج عليها لكن قبل النوم دايماً هو اكثر وقت بحس ان خلاص ده الوقت
اللي هعرف أقضيه معاها اركز معاها أكلها ابصلها اركز أوي في ملامحها انا عارفة ان أكيد إحساسي
واصلها وانها بتحس بينا.. بستودعك كل يوم يا ماما وانام وحشتيني اوي يا حبيبة قلبي تصبحي
على خير ❤️ يا رب ترجعلنا بالسلامة ..

<https://bit.ly/32pelij>

صباح الخير .. ماما بقالها 1199 يوم محبوسة .. مشوفتش ماما خلال ال ث سنين و ٣ شهور دول الا
من بعيد او وانا بجري ورا عربية الاسعاف اللي ازازها متفيم او من ورا قضبان وازاز عازل للصوت
مجموع رؤيتي لماما خلال الوقت ده ميكملش ٦٠ دقيقة يعني ساعة .. !! ماما شافت حليلة بنت
هند مرة واحدة وهي عندها اسبوع متعرفش اي حاجة بتحصل في حياتنا واحنا منعرفش عنها ولا
عن صحتها اي حاجة .. خلال الفترة دي ماما جالها اشتباه في ذبحة جلطة مشاكل في القلب توقف
الكلى اليمنى كفاءة الكللى اليسرى ٢٥٪ خرجو ماما تتعالج خرجوها تبقى وسطنا ! ماما عندها ٦٣
سنة فاضل ايه عشان تخرج وتبقى وسطنا ونخلي بالنا منها؟! اكتبو عن ماما وانشروا عنها احنا
محتاجين كل بوست وكل كلمة وكل حرف محتاجين ماما تبقى وسطنا ..

<https://bit.ly/3BhZxkc>

بشم ريحتك في الهوا، زي الغريق متعلق بقشاية وافضل انادي وانادي لحد ما صوتي يتنبج جوايا
مجنونة يمكن وفقدت عقلها من لما خطفو أمها وغمو عينها وكتفو ايديها وسابوها اسبوع ورا اسبوع
ورا اسبوع ولا حتى حس ولا خبر وباينها اتقلبت الآية في الاصل محامية والآن لا قانون ولا عدل
وكإننا في غابة عدت سنين وشهور .. مش كنا قلنا هما بس يومين؟ ومسيرها ترجع وسطنا وتضمنا؟
ازاي كدا وازاي حصل فينا كل دا؟ ولا فيه زيارة ولا طريقة نطمئن .. ما هي أمنا .. مستنيين ايه مننا؟
عاشين ومش عاشين .. على أمل في أي لحظة ترجع لنا وتنام جوا حضننا.. عايزين نشوفها بخير..
معقولة دا بقى كتير؟ ان احنا نطمئن عليها .. كويسة؟ بتاخذ دواها واكلها؟ في البرد دا متدافية؟
مليون سؤال ومفيش ولا إجابة.. ولا رد يشفي قلوبنا لا كلام ولا كتابة.. وفي عيد ميلادك عاجزين
قليلي الحيلة لا سلام ولا كلام ولا رسالة ولا حتى نظرة من ورا قضبان كتير.. كل سنة وانتي معانا
ووسطنا مش متاخدة مننا .. كل سنة وانتي بسلامة وعافية وحررة جنبنا.. في وسط عيلتك واحفادك
اللي يدوب فاكرين شوية ذكريات ومالحقوكيش ولا لحقو يتهنو بدلعك زينا بناتك ياهدى .. ♥

<https://bit.ly/3AN4P72>

انهاردة كان معاد زيارة ماما اللي احنا مش مسموحلنا بدخولها بندخل بس شوية أكل وأدوية ..
بنحاول كل مرة اننا نكتب جواب نضمن فيه ماما علينا ونقولها آخر أخبارنا وبنحاول نستأذن انها
تكتبنا جواب بخط ايديها بس ولا مرة وافقوا .. وفي الأغلب الجواب بتاعنا بيفرض دخوله .
انهاردة كان نفسي اوي الجواب يدخل بس للأسف بردو مرضيوش أخذوا الجواب من بابا اول ما
وصل وفي آخر اليوم رجعوهوله وقالوله مش هيدخل ! انا عمالة أقرأ الجواب واشوف هو انا كاتبة
في حاجة غريبة مثلاً عشان يترفض ده انا بس بطمنها علينا .. انا بس بقولها رمضان كريم يا ماما كنت
بقولها ناقصنا وجودك معنا يا ماما وانك وحشتينا اوي اوي . كنت بقولها أخبار أحفادها اللي كبروا
اوي في ال ٣ سنين دول . مش كفاية انها ممنوعة من الزيارة كمان ممنوع تعرف أخبارنا عن طريق
جواب ! ماما حبيبتني انا عارفة انك حاسة بينا وعارفة انك بتستودعينا كل يوم زي ما بنعمل بناتك
لسة جامدين يا ماما ولسة كل يوم بنفتخر فيه اننا بنات هدى عبدالمنعم . ترجعيلنا بالسلامة يا أعظم
وأحلى وأغلى أم ♥ رمضان كريم يا ماما . هدى عبدالمنعم سجن القناطر للنساء - عنبر الدواعي /
العسكري

<https://bit.ly/3tRmIVR>

ماما امبارح وصلت في عربية الاسعاف بعد محاولات كثير من منعنا ان احنا نشوفها قدرنا نجتاز
الصعاب بفضل الله ونجري ورا الترحيلة ونشوفها من عربية الاسعاف طريق المعادي امبارح كان
صعب ومقفول من جميع الاتجاهات بسبب الاصلاحات فكنا في رعب اننا منلحقش الترحيلة اساسا
عشان دي اللحظة الوحيدة المضمونة بالنسبانا اللي بنشوف فيها ماما بعد ما ماما وصلت بتبدا
الرحلة محاولة حضور الجلسة عشان بس نفضل جنبها ونشوفها من ورا القفص اللي هو عازل للصوت
وعاكس للصورة فالموضوع بيبقى مرهق جدا جدا بعد محاولات كثير وبعد ما عدى تقريبا ٣ او اربع
ساعات عالرصيف سمحولنا بالدخول المشهد بيبنى بالنسبالي مرعب ماما جوة القفص شايفنها
بالعافية نفسنا نحضنها ومش عارفين نفسنا نفهم بتقول ايه نفسنا نفضل نتكلم معاها طب لو حاططها
في قفص مقفول من كل الاتجاهات بحديد من السقف للارض كذا طبقة ليه حاطط ازاز عازل
للصوت ليه نتحرم من حق الكلام حتى ! حق صوتها اللي وحشنا !!! ليه سجن جوة السجن ليه !!

كان نفسي اقولها حاجات كتير اوي اوي كان نفسي بس اقولها بصوت عالي كل ينة وانت طيبة ولما فشلت في ده استلفت ورقة من المحامين في القاعة كتبتلها كل سنة وانت طيبة ورسمتلها تورتة !
ماما اتأثرت اوي وشاورتلي انها بتحضني قعدت عالارض قدام القفص ببصلها وخلص منا مش فاهمة الكلام وهي مش فاهمة كلامي ماهو بينا الف سور وسجان وحاجات كتير بس مش مهم كفاية ابصلها بس ! عرفنا ان جالها اوميكرون وفضلت راقدة حبة حلوين قهر مش كدة احنا بنعرف بالصدفة ان
امنا كانت تعبانة والله اعلم كان ايه اللي ممكن يحصل؟! التخيل لوحده مرعب وعرفنا ان القاضي طلب انها تتحول على مستشفى المنيل الجامعي عشان اجراء فحوصات مهمة عشان قلبها كل ده
بنعرفه بالصدفة عن ماما عن امنا متخيلين القهر!! كل الكلام ابتدال عموما وكل الوجع مش هيكفي القهرة ووجع القلب والحسرة وماما جوة القفص واحنا برة ومش قادرين نعملها حاجة ! السجن قهر ..
قهر فعلا!! انا مش قادرة اكتب اصلا اكر من كدة هسيبكم للتخيل والورقة اللي كتبتهالها

<https://bit.ly/3JvG5Df>

يوم الاتنين الجاي ان شاء الله معاد جلسة ماما وعائشة .. الله أعلم هيكون القرار ساعتها بالتأجيل
لإمتي لشهر كمان مرة ولا لبعد او قبل كده ! نفسي بس يقضوا رمضان في بيوتهم عدى ٣ رمضان
وهم جوة محرومين من كل حقوقهم القانونية في كل حاجة ادعولهم بالفرج والصحة وانهم
يخرجوا على خير .. الشَّدَّة أُوْدَت بِالْمُهْجِ يَا رَبِّ فَعَجَّلْ بِالْفَرَجِ

<https://bit.ly/3MBfAP6>

ماما وصلت في عربية الإسعاف

<https://bit.ly/3tbZwLY>

كان نفسي مشهدنا انهاردة يتصور والناس كلها تتفرج الناس كلها تعرف ان اللي بيصدروه ان في عدل او اي حاجة قريبة منه ده اوهام في دماغهم احنا اقل حقوقنا محرومين منها حتى الحضن !
انهاردة المشهد كان في منتهى القهر والوجع سمحولنا ندخل نشوفها بس عشان يقهرونا داخلين

على عيد ام ورمضان وعيد ودخلونا يقهرونا بس دخلونا وحوالينا اكثر من ٩ طباط محاصرنا ومحصرين ماما من كل الاتجاهات بيتكلمو كلهم في نفس الصوت وبيزعقوا وبيقولوا يلا من قبل حتى ما نقربلها ونحضنها قلت للطباط اديني فرصة اسمعها بس مش عارفة اسمعها !! ماما قالتله احنا محرومين من الزيارة خليني احضنهم انا وهند وبابا واقفين في عجز وقهر ووجع يلا يلا ممنوع ممنوع متقربيش من ايدها مينفعش توشوشها متقربيش اوي متحضنهاش ممنوع انتوا الاتنين تقربوا كل حاجة ممنوعة حتى البوسة والحضن ! حصيلة اليوم قهر حذف الجلسة شهرين ! مقلنهاش حتى كل سنة وانت طيبة قهر ووجع وظرم وغضب وصريخ معشش جوانا عشان ممنوع حتى نصرخ ومعندناش رفاهية الانهيار انا قسما بالله ملحقت اشوف ملامحها حتى من كتر السرعة ! الله ينتقم من كل حد مشارك في الظلم ده وبحرمه من كل عزيز يارب وبحس بالنار اللي في قلوبنا دي يارب !!!

<https://bit.ly/3IghYaF>

ممر ضيق مقفول ومخنوق حوالي ٩ طباط واقفين كرسيين قلوبينهم عالارض عشان منقربش جريت احضنها وابوسها ممنوع تقربي كده ايه ده انت بتقوليلها ايه في ودنها ممنوع كده فدوى تيجي تقرب عليا وانا حضناها يزعقولها ويرجعوها جت فدوى تحضنها رجعوني ورا جريت احاول ابوس ايديها وهي فدوى حضناها زعقوا تاني وقالولي اتفضلي خلاص كده ممنوع ممنوع تقربي ممنوع تتكلمي ممنوع تحضني ممنوع تسلمي كل حاجة ممنوعة انا ملحقتش اشوف وشها ولا اسمع صوتها كويس صوتهم أعلى من صوتنا من ساعة ما دخلنا الممر ده وهما بيزعقوا ويقولولنا يلا ! قهر وعجز وظلم مش ممكن ٣ سنين و٤ شهور احنا ممنوعين من كل حاجة من كل حقوقنا الطبيعية ! بيتفننوا في قهرنا وظلمنا ! يارب انت شاهد ومطلع على كل لحظة يارب اشفي صدورنا ورد لنا حبايبنا يا رب ضاقت بما رحبت

<https://bit.ly/3u2wMo8>

عن هيثم العربي



مش لاقية سبب واحد للهيفة اللي حصلت من اسبوعين والأفورة الإعلامية اللي حصلت من انه الزيارات خلاص هتبقى مباشرة من غير سلك وهنرجع نزر زيارة طبيعية نقعد فيها مع بعض زي قبل الكورونا ومارس 2020 اللي انا شخصيا نسييت كانت عاملة ازاي الجرايد والبوستات تنشر الخبر...الأهالي والمساجين (جنائي وسياسي) تفرح وتتعشم والناس اللي مكنتش بتروح زيارات تقرر تروح واذ بالمفاجأة انه كل ده فشك...وانه الزيارات زي ما هي عادي بسلك


نفسى الاقي سبب واحد او مبرر للي حصل ولسه بيحصل

إسراء عبدالرحمن
زوجة المعتقل هيثم العربي

Haqum

<https://bit.ly/3wP6oBo>

عن وليد شوقي



تطوير السجن مش ببناء سجون جديدة وإدارتها بنفس الطريقة، التطوير هو تغير الطريقة نفسها!
انهارده وصلت عند سجن المزرعة 8 ونصف صباحا، لحد 2 الظهر واقفين قدام باب السجن، الدكك
المحطوطة مش مكفية الناس، ومفيش مكان أصلا ممكن نشترى منه مياة ولا شاي ولا قهوة ولا أي
حاجة، طول الوقت ده كان ممكن يختصر لو في نظام، وزى ما سجلنا من بدري ندخل من
بدري!! لسه الانتظار غير المبرر ده!؟

دخلنا السجن 2 ركبنا الطفطف اللي بنصح يغيروا الصور اللي عليه (مسجون بيتعالج)، ووصلنا لقدام
السجن وفضلنا قاعدين ل3 ونص، ساعة ونص كمان من غير مبرر، طيب دخلونا ليه، وبعدين دخلنا
الزيارة وطلعنا الساعة 4، وعلى مستنينا طفطف يرجعنا للبوابة تاني كانت الساعة 5 المغرب، والله كل
ده كان ممكن يختصر وقت كثير لو في شوية نظام، أنا راجعة مش شايفة قدامي وأنا معايا عربية
وبيني وبين السجن نصف ساعة، فأكيد الوضع أصعب بمراحل للي بيسافروا من محافظة لمحافظه
وبيتحركوا الفجر وقبله!

<https://bit.ly/3JU5fww>

وليد قال في الزيارة إنه محتاج بطانية وده معناه إنه سقعان وللأسف البطانية اترفض انها تدخل
ومش عارفة ليه المفروض يفضل سقعان في الجو ده؟! وده برضه من ضمن العقاب إنه بعد الشر
يموت من البرد!؟

<https://bit.ly/3GZS1w8>

عرفت دلوقتي إن وليد دخل في إضراب عن الطعام من يوم الجمعة، علشان تجديد حبسه لمدة ما
يقرب من 3 سنين ونص! في دايرة مفرغة من العذاب بلا نهاية! وأنا مقدميش أي قرار غير دعم قراره
اللي حتى مش قادرة أوصل له أو اتفاهم معاه فيه أو اطمن على صحته، وأول زيارة ليا يوم 21
فبراير، يعني هفضل من دلوقتي لوقتها معرفش أي حاجة عنه أو عن حالته الصحية! وطبعاً الكلام
اللي هيتقال ما بلاش هو هيستفيد إيه، بس هو إيه أكثر من كده ممكن يشوفوه بعد حبس وحرمان
من حياته وأهله وبنته الوقت ده!! ومش عارفة أصحاب القرار هيستنوا لحد إيه، لحد ميحصل له
حاجة، هل ده اللي هما عاوزينه!؟

<https://bit.ly/3rMnEUJ>

نعلن نحن أسرة الطبيب وليد شوقي، المحبوس احتياطياً منذ 14 أكتوبر 2018، قلقنا على حالته
الصحية والنفسية، بعد دخوله في إضراب عن الطعام منذ يوم الجمعة الماضي. وتطلب الأسرة من
النائب العام إخلاء سبيله بأي ضمان تراه النيابة، حفاظاً على سلامته الجسدية والنفسية. نخشى أن
نفقد وليد ويفقدنا دون ذنب أو ارتكاب جريمة تستحق وجوده تلك الفترة محبوساً على ذمة
قضيتين. ألقى القبض على وليد بتاريخ 14 أكتوبر 2018، وظل مُختفي حتى ظهوره بنيابة أمن
الدولة بتاريخ 20 أكتوبر 2018 على ذمة القضية رقم 621 لسنة 2018 حصر أمن دولة عليا، ووجهت
له النيابة اتهام بالانضمام لجماعة إرهابية، وتعتمد نشر بيانات وأخبار كاذبة. أخلي سبيله يوم 24
أغسطس 2020، وبدلاً من تنفيذ قرار المحكمة تم إخفائه للمرة الثانية ثم تدويره وعرضه مرة أخرى
علي نيابة أمن الدولة يوم 6 أكتوبر 2020، والتحقيق معه على ذمة القضية 880 لسنة 2020 المعروفة

بأحدث سبتمبر 2020، وحبسه مرة أخرى بنفس تهمة القضية الأولى، بالإضافة لتهمة التجمهر رغم عدم إطلاق سراحه بشكل فعلي وكان محتجز خارج إطار القانون لمدة أكثر من شهر بعد إخلاء سبيله في مكان غير معلوم، ولا توجد أي أدلة علي التهم غير محضر تحريات الأمن الوطني . وليد في أول ظهور له في النيابة بعد إختفائه لمدة شهر بعد إخلاء سبيله، وصف شهر الإختفاء بأنه أصعب 100 مرة من السنتين حبس، فتعرض لتعصيب عينيه وكلبشته في الحائط ونومه على الأرض في فترة إختفائه الأولي، وتعرض لنفس الانتهاكات في فترة إختفائه الثانية، وكان مسموح له بدخول دورة المياة مرة واحدة في اليوم، ومسموح بوجبة واحدة فقط في اليوم. تضامنوا معنا لحماية حياة وليد، وطالبوا بنيله حريته هو ومن معه من محبوسي الرأي غير المتورطين في أحداث عنف.

<https://bit.ly/3sDTCBR>

مش هيكون عندنا أي تطمينات عن حالة وليد الصحية أو أي تطورات فيما يخص تعامل السجن مع الإضراب قبل زيارة 21 فبراير.. كل رجائي من ربنا إنه منسمعش أي أخبار وحشه من هنا لوقتها! اللي عارف وليد كويس عارف إنه شخص عاقل وقراراته عمرها مكانت متهورة، فمعنى دخوله في إضراب إنه خلاص جاب آخره.

<https://bit.ly/3BqZxOD>

اليوم السابع لإضراب وليد وموكا وريجو عن الطعام.. وأنا حابة اتكلم شوية عن معارك الأمعاء الخاوية، وإيه اللي بيحصل في جسمهم: جسم الإنسان يحتاج يوميا 1200 سعر حراري من الطعام لكي تعمل أجهزة الجسم بكفاءة، ومع منع الطعام تتأثر تلك الأجهزة، وفي مقدمتها العضلات، وعند عدم وجود السعرات اللازمة لعمل جسم الإنسان يلجأ لاستبدال الدهون بها. تبدأ أعراض الإضراب عن الطعام بتقلصات في المعدة تختفي مع اليوم الثالث، وتنخفض نسبة الجلوكوز في الدم فيقل بالتبعية إفراز الإنسولين، عندها سيقوم الجسم بإنتاج الجلوكوز من البروتين في العضلات، وهو ما سيؤدي إلى فقدان تدريجي للدهون والبروتين والبوتاسيوم والفوسفات والمغنسيوم.

وبعد شهرين من الإضراب عن الطعام سيزداد الجسم في المزيد من الوهن والتعب، فيفقد الشخص القدرة على التحكم في حركة العين، ويشعر بدوار وقد يصاب بالقيء، مع صعوبة في بلع الماء وازدواج في الرؤية. استمرار الإضراب يؤدي إلى فشل أعضاء الجسم الداخلية وهو ما ينتهي بعد مدة بالوفاة. فهل السلطات المصرية، عاززة ده يحصل في 3 قرروا يواجهوا حريتهم في مقابل حياتهم، و3 مش مرتكبي عنف أو أعمال تخريبية، ووفقا للقانون في بدايل كثير لحبسهم الاحتياطي، فليه ميطلبش القانون، وده اللي كلنا بنطالب بيه؟! هل السلطات ومنتخذي القرار هيكونوا مرتاحين لو فقدنا حد منهم لقدر الله؟! ساعدونا كمصريين ومصريات، أرسلوا رسائلكم للنائب العام، و رئاسة الجمهورية ووزارة العدل للمطالبة بتحقيق القانون وإخلاء سبيلهم بأي ضمان تراه النيابة، أعيديوا نشر تلك الرسالة على صفحاتكم، ساعدونا حتى لا نفقد ذوبنا.

<https://bit.ly/3p26INU>

اليوم الثامن لإضراب وليد وموكا وريجو، ولا نملك أي معلومات عن حالتهم الصحية والنفسية أو شكل التعامل معاهم داخل السجن إيه.. خليني شوية أتكلم عن وليد علشان اللي مش عارفه واللي بيسأل ليه أضرب. وليد عنده 34 سنة، اتخرج من كلية طب أسنان المنصورة، في 2011 آمن بالثورة، والعدل والحرية، ودور على مكان يقدر من خلاله "يعبر" عن رأيه، وهدفه كله التعبير، انضم ل6 أبريل، وفي 2016 اتجوزنا، وجبنا بنتنا نور في 2017، ولقى وقتها إنه مفيش أي مجال لأي حراك سياسي، والأولى والأهم يشوف بنته وشغله، وده كان اتفاننا إنه مع وجود أطفال هيبقى حياتهم وتحسين حياتهم أهم، والتحسين ده مش هيحصل غير بالشغل، وعلى الجانب الأخر الحركة أصلا مبقاش ليها في الوقت ده أي وجود، وكل واحد انشغل بحياته. الكلام ده مهم لمنتخذي القرار، علشان يمكن يقرروا إنه وليد اتعاقب بكفاية على فترة انتهت من حياته، وكلنا في فترات بتنتهي في حياتنا. أما الكلام الجاي فهو للناس العادية، تخيلي كده لو انت أم وعندك ولد كبير وبقي دكتور، واتحرمتي منه 3 سنين ونص، وانت مش عارفه ليه، وهو لاقتل ولا سرق ولا حتى متاخذ من مظاهرة في شارع، وليد مقبوض عليه من عيادته، أو لو انت أب وعندك ولد كبيرته علشان يبقى جنبك في أيامك الأخيرة، بس بدل ميبقى جنبك انت اللي بتجري وراه في الزيارات، هتحس بإيه؟! الأب

والأم دول حاسين بمشاعر مش ممكن التعبير عنها في كلام، مرارة وحزن وألم، وكل ده ممكن ينتهي لو حد من متخذي القرار حط نفسه مكان الأب والأم دول، وزى مبنقول إن الإرهابيين مفيش في قلوبهم رحمة، فاكيد الدولة عندها رحمة بولادها صح؟! أنا زوجة مصرية وعندي طفلة عندها 4 سنين ونص مشافتش باباها غير سنة واحدة من عمرها، ممكن تساعدوني وتوصلوا صوتي لمتخذي القرار، وصلوا صوتي للنائب العام ورتاسة الجمهورية، ووزارة العدل ووزارة الداخلية، جوزي أضرب عن الطعام لأنه شاف إنه حياته انتهت في السجن، جوزي مقرر يموت، فممكن تلحقوه، ممكن تلحقوا أم وأب بيموتوا كل يوم على ابنهم! ووضع وليد مش مختلف كثير عن موكا وريجو، ممكن تطلعوا ولادنا يشوفوا النور، وتبقى دي بداية الانفراجة اللي دايمًا بتوعدوا بيها.. احنا مستنيين الوعد.

<https://bit.ly/3BFA83V>

مامت وليد خلصت زيارة وفي ١٢ واحد معاه مضرب عن الطعام ومحاولات أنها تخليه يفك الإضراب فشلت وطبعا مش محتاجة احكي عن حالته الصحية!

<https://bit.ly/3JNEoBe>

كفاية بقى ارجوكم وليد و١٢ واحد معاه معرضين للخطر

<https://bit.ly/3vcDAIlg>

اليوم ال ١٣ لإضراب ١٢ سجين في سجن المزرعة. محامين وليد توجهوا النهاردة للنيابة لإثبات الإضراب في محضر رسمي بعد رفض السجن إثباته ومتابعة حالتهم الصحية! الحرية ليهم كلهم

<https://bit.ly/3vajTe5>

اليوم ال ١٦ لإضراب ١٢ واحد في سجن المزرعة.. وأنا في انتظار تصريح النيابة علشان أقدر اشوف وليد واطمن عليه ومن هنا لوقتها مفيش في ايدي غير الدعاء ليهم كلهم بالحرية والنجاة! الحرية ليهم كلهم! <https://bit.ly/36zp0tR>

كفاية بقى ارجوكم وليد و١٢ واحد معاه معرضين للخطر. <https://bit.ly/3vcDAIlg>

اليوم ال20 تقريبا لأنني فقدت القدرة على حاجات كثيرة ومنها العد، على إضراب وليد وموكا وريجو وجلال البحيري و8 كمان منعرش مين هما في سجن المزرعة. ال12 حالتهم الصحية مش أحسن حاجة وممكن نتخيل ده لو فضلنا بي يوم واحد معتمدين على العصائر أو المياه بس، ولسه مكملين! وأنا لسه في انتظار تصريح الزيارة علشان أقدر أقنع وليد إنه كفاية كده وصحتهم مهمة لينا وليهم، ويا رب يوافقوا، ويكون كمان حصل ولو تحسن طفيف في أوضاعهم جوه!

<https://bit.ly/3IHPBDf>

قلبي مش جايني اكتب إن النهاردة اليوم ال ٢٣ لإضراب وليد عن الطعام.. ولسه عندي أمل إن ربنا مش هيخذلنا علشان ملناش غيره نلجأ له في كل الظروف القاسية دي.. يا رب!

<https://bit.ly/35BFCRF>

يا رب وليد يلحق يشتري فانوس رمضان لنور.. أنا هفضل عايشة بالأمل يا رب ومش هياس!

<https://bit.ly/3NwkVYs>

تجديد حبس وليد.. هما غالبا هيسبوه يطلع لما شعري يبيض أو أموت قبلها!

<https://bit.ly/3igqImD>

من المشايخ قسريا

عن خالد عز الدين



يعني ايه أحاول أتخيل ملامح خالد بعد ٩ سنين...أتخيل صوته كلامه ... أتخيل مواقف جمعتنا وكلام ضحكنا عليه بقي مندثر بحكم سرعة الحياة اللي بتبدل فينا كل يوم...ايد ماسكة هناك بكل حكاياته وايد ماسكة هنا عشان لازم تعيش وهنا بيجري مش راحم والروح بين الاتنين متجربة...يا رب أئذن لنا بلقاء تسكن إليه أرواحنا وتطمئن كأننا لم نري فراقا قط ... لقاء في الفضل والعافية يا رب.

<https://bit.ly/3Hth4aS>

في السجن كله يبقع رداء التكلف كله بيكون حقيقي حتي اللي ييمثل ما بيقدرش يكمل تمثيل للأخر... كل ما الضغط بيزيد عليك كل ما بتنزع عنك رداء التكلف والحسابات ... الخير اللي جواك بيظهر وحظ نفسك بردو بيظهر ولو انت انسان وبتحاول تحافظ علي انسانيتك وأخلاقك بتكون بتتعذب وفي صراع دائم بين قيمك ومبادئك وبين غريزتك في البقاء وإإن ما حدث يظلمك... الحقيقة علي قد ما السجن فيه صور رائعة من المشاهد الانسانية الصادقة

عن إبراهيم شاهين



((ابني الغالي إبراهيم كم اشتقت إليك .. إلى صوتك في البيت " ، كل يوم والله بدعيلك أن ربنا يحفظك ويوقفلك
ولاد الحلال .. أكيد بعد اختفائك كل المدة دي اتغيرت ملامحك ، قضيت أحلى سنوات عمرك وانت بعيد عمل في
المتعقل . كل ما أشوف اللي في سنك رايعين المدرسة افتكرك ، ياترى يابنى لسه فاكرنا ولا نسينا
حسبنا الله ونعم الوكيل في اللي كان السبب))

<https://bit.ly/32VcbbW>

عن أحمد وأسامة السواح



"أحمد حبيبي وقلبي
أسامة نور عيني وروحي
حبايبي سامحوني أنا مسمحاكم وقلبي وربي راضي عنكم سامحوني حبايبي أنا بكتب الكلام دا يمكن ما يكونش
لينا نصيب نتقابل في دنيا الناس
فيكون اللقاء عند الله الحكيم العدل الذي لا يظلم عنده أحد الذي أقسم بعزته وجلاله لينصرن دعوة المظلوم
وهل هناك ظلم أبشع وأكبر من أن تاخذ إنسان من بيته ومن وسط أهله إنسان برىء لم يرتكب أى جرم في
حياته وهولم يبدئ حياته فحين أخذه الظالم من بيته كان عمره 19 سنة
هل الجرم أنهم أولاد مجتهدين علمياً وخلقياً وعلي كل الأصعدة
هل هذا هو الذنب؟
أحمد حبيبي كان نفسك تكون دكتور شاطر قتلوا اللحم! حسبي الله ونعم الوكيل!!!
أسامة أحلى بشمهندس في الدنيا كلها يا قلب ماما
أولادى حبايبي أنا وأبوكم مسبناش أى وسيلة أو طريق يمكن يوصل ليكوا إلا وسلكناه ويعلم الله أننا لو كانت
حياتنا فداء لكما لفعلنا دون ذره تفكير
أصبحنا في بلاد يقال فيها أخرجوا ال. ()))))) اتسأل

كيف لمن حبسكم أن ينام قرير العين كيف لمن يظلم ويحبس ويقتل البراءة أنى له يعيش ويتمتع بحسب أنه يخلد في الأرض

ألم يخطر بباله أنه سوف يعرض علي جبار السموات والأرض أنه سوف يعرض علي نار وقودها الناس والحجارة ؟ أم أنه ضمن الخلود في دار الفناء!

حبايبي لا تهنوا ولا تحزنوا فعزاًؤنا أنها دنيا

رسالة الي كل من يري رسالتي

أحمد كليه الطب وأسامة كليه الهندسة قوات الأمن أخذتهما من بيتهما من 3سنيين ونص وحتى الآن لم نعلم عنهما شئ اختفاء قسري يعني مفيش وسيلة إلا وعملناها قضيه بحث في كل السجون وأماكن الاحتجاز ولا حد

بيدي معلومة ناس تشوفهم في أماكن احتجاز ونروح نسال؟؟؟؟ولا الهوا

يا تري عامل ايه أحمد عامل ايه يا أسامة لس فاكرين حد

أنتو أصلا لسه عايشين

نفسى أطمئن عليكمو أسمع صوتكم حتي

أنشروا رسالتي في كل مكان يمكن حد يكون شاف أحمد وأسامة يطمئنيهم ويطمئني

يا ريت توصل لاكبر عدد من الناس

عسي الله أن يجمعني بهما قريباً

كتبت رسالتي بدموع قلبي عسي الله يجعل فيها فرجاً ومخرجاً

ويستنبؤنك متي هو قل عسي أن يكون قريباً

<https://bit.ly/3nuwAvC>

عن هيثم البنا



(ظهر بعد أسبوع في نيابة أمن الدولة)

انا ما بكتبش ولا باشارك بقالي كتير بس النهاردة مش حاعرف اسكت.
هيثم البنا شاب مافيش الطف ولا اجدع منه. صاحب صاحبه. محترم. مؤدب. حنين. خدوم. دايمًا موجود لو اي حد محتاج اي حاجة. هيثم من الشباب اللي جريمتهم الوحيدة انهم آمنوا بثورة يناير وشاركوا فيها وانضم زي غيره لحزب الدستور علشان يحقق الحلم. بس زي كل الشباب بقاله سنين بعد عن السياسة وعن اي حاجة متعلقة بيها. انشغل بنفسه وبشغله وخدمة ورعاية مامته ربنا يديها الصحة .
هيثم كتب بوست الاسبوع اللي فات بيفتكر فيه بس ثورة يناير واياها. ماشتمش حد. ما حرض حد. ما دعاش حد يتظاهر ولا يعارض حتى. يوم الحد بالليل الباب خبط ففتح لقي قوة أمنية مسلحة بمدافع رشاش بتقتحم الشقة وداخلين على مامته اللي كانت على سجادة الصلاة. فتشوا البيت واخدوه.
من يومها هيثم ما ظهرش لافي قسم ولا في نيابة. هيثم مخطوف علشان كتب بوست على فيسبوك. هيثم مختفي وما حدش عارف له طريق. هيثم اتاخذ من امه اللي كان قاعد لوحده معاها وبيرعاها وبيخدمها وبيأخذ باله منها .
حرام حرام . حسبي الله ونعم الوكيل .

<https://bit.ly/3rmSYcq>

“أنا والدة هيثم البنا، اللي أخذوه مني بالليل، البوليس جه أخده مني بطريقة صعبة جدا وطريقة مهينة جداً، فتحوا الشقة واقتحموها.. خمسة منهم كانوا واقفين على الباب وتلاتة جوا الشقة وواحد منهم كان ماسك سلاح”

“خرجت من أوضة النوم لقيتهم في وشي، شئ مرعب، سألتهم عايزين منه إيه؟ هو عمل إيه؟ والله هيثم ما له صلة بأي حاجة وبقاله كتير جدا قاعد في البيت، ويوم الثورة دا بنحتفل بيه كلنا وهو كان عنده صور عن ذكريات الثورة ميقصدش بيها أي حاجة، أرجوكم رجعوا لي ابني، أنا والله العظيم ما ليا غيره، أنا ست مريضة ومليش غيره هو اللي شايلني.. طب أشوفه، طب اتظمن عليه.. ليه تحرقوا قلبي على ابني بالطريقة المهينة دي؟”

وقالت شيماء البنا، شقيقة هيثم، إن قوات الأمن ألقوا القبض عليه من منزله، منذ يوم الأحد 30 يناير وأخفته حتى موعد كتابة تلك السطور، بسبب منشور كتبه عن ثورة 25 يناير 2011 في ذكراها الحادية عشرة.

“قوة أمنية أخذته من بيته، من حضن أمه يوم الأحد الساعة 12 صباحاً، وحتى تلك اللحظة مختف لا نعرف عنه أي شيء، أمه حرقياً بتموت.. كل الموضوع أنه كتب منشورين على صفحته بيفتكر فيهم ثورة يناير.. هيثم عمره ما أذى أحداً. أحنّ وأجدع إنسان في الدنيا.. مسالم جداً يحب الخير للناس أكثر ما يبجبه لنفسه.”

<https://bit.ly/3sfV3GD>

عن مصطفى النجار



كان في صديقة كاتبة بوست حزينة انها مش بتشوف زوجها المعتقل غير دقائق معدودة ومن ورا أسلاك فلفت نظري تعليق بيقولها: "احمدى ربنا انك عارفة مكانه واحد زى مصطفى النجار اهله يتمنوا يعرفوا مكانه " على الرغم انى رافضة الفكرة دى تماما والفجر فالخصومة مش هيخلينا نرضى بظلم اقل ونقول انا ارحم من فلان فالحرية حق للمعتقل والمختفى

كل حد مفارق عزيز له بيبقى في قمة حزنه ومش مطلوب منه يقارن نفسه بالوضع الأسوأ.
على الرغم من كده بس التعليق خالانى افكر هو ممكن يكون في أسوأ من فكرة الإخفاء؟؟
بعد تفكير قليل وصلت لقناعة إن فكرة الإخفاء هي الاسوأ عالاطلاق اسوأ حتى من الموت ولولا لطف ربنا بينا وإيماننا إن امرنا بيد الله كنا فقدنا عقلنا من زمن.

وأكيد اللي اخترع الجرم ده شيطان واللى يتبعه وينفذه لا يقل عن مخترعه جرم وشيطانية وهتظل لعنات ضحاياهم تلاحقهم حتى يلاقوا وجه المنتقم العدل، إن تفكيرك يهديك انك تخفى إنسان فأنت مجرم عارف يعنى ايه تاخذ واحد لحم ودم من وسط ولاده ومراته واهله وتقرر إنك تخفيه خلاص مبقاش موجود ومحدث عارف عنه حاجة أنت مش بتكتفى بالانتقام منه لا انت بتنتقم من كل اللي حوالياه حتى الاطفال الصغيرة اللي فجأة صحت لاقبت مفيش بابا بدون اى سبب او مبرر يبقى حضرتك مجرم ولا لا!؟

لو هقعد اتكلم عالالم النفسى للإخفاء مش هقدر أوصل ربيع الواقع .
الربع النفسى ده جزء لا يستهان بيه لكن لو جينا للجزء المادى هيكون اكثر رعبا زوجة بين ليلة وضحاها لاقيت
نفسها مسئولة عن بيت وأطفال ومصاريف وحياة مش بترحم ولا هى عارفة هى زوجة ولا لا قدر الله أرملة كل ده
عشان واحد لا يعرف عن الانسانية شئ قرر يخفى إنسان وتناسى إن قوته و جبروته قادر ربنا يمحيها فى طرفة عين.

1160 يوم إخفاء

3سنين و4 شهور

<https://bit.ly/3tXiYgx>

1168يوم غايب عننا يا مصطفى

عايزة اقولك ان سهيل هو اللى حسب كام يوم

<https://bit.ly/32KnRye>

عن حسام سلام



مَن لهؤلاء الصغار من بعدك؟ مَن سيحنّ ويلعب، مَن سيمسح الدمع ويُرَبِّت على الأكتاف؟ مَن سيأتي لهم بكل ما تشتهيهم أنفسهم قبل حتى أن يطلبوه؟ مَن سيأتي محملةً روحه بالشوق إن غاب يوماً واحداً فقط عنهم؟ لَمَن سيفتحون أذرعهم الصغيرة حين يسمعون صوت مفاتيحك فيركضون إليك لتغمرهم بحنانك ولطفك، مَن سيحمل معي هذا الحمل الثقيل؟ بماذا عليّ أن أجيب حين يقولون لي "فين بابا"؟ أنس يستيقظ كل ليلة كعادته فرحاً يريدك ولا يريد شيئاً آخر، يطلب مني أن أتصل بك ليُحادثك؛ وأنا لا أملك من أمري شيئاً، أقف عاجزة أمتنع عن الرد والدموع تخنقني حتى شعرت أنني أوشكت على الهلاك! كنت في الفترة الأخيرة تقول لي كثيراً لقد صار حبهم داخلي أكبر من أي شيء، لقد صرتُ مستعد أن أضحي براحتي وبأي شيء في سبيل أن أرسم الضحكة على شفاههم الصغيرة.. أخبرتني وأنا أودّعك اصبري عليهم إلى حين عودتي ولا تضجري كثيراً، أعدك أن أحمل عنك كل هذا وأعوذك خيراً منه حين أعود.. لكنني الآن سأحتمل وحدي إلى أن يقضي الله أمراً كان مفعولاً. ها هو ذا اليوم الرابع ينقضي ونحن لا نعلم أين أنت، ولا أدري لماذا نُعايش كل هذا الألم!؟

<https://bit.ly/3rpqKNi>

السكنُ دونكَ موحشٌ، والليل طويلاً لا ينقضُ، والوقتُ عقاربُ تنهش بأوردة قلبي، والسير سيرُ قدمٍ عرجى بلا عكاز، والطريقُ شوكةٌ من الآلام، الروح هائمة لا تستقرّ والقلب مضطرباً لا يطمئن، تتوق نفسي إليك كنفس ظمآن في فلاء يرى الماء بعينه ولا يبلغه! اليوم الثامن وما زال حسام قيد الاختفاء القسري.

<https://bit.ly/3rLc7DU>

زوجي حسام منوفي محمود سلام خرج من مصر منذ خمس سنوات لأنه صاحب رأي ومضطهد في بلده.. بحثاً عن الأمان؛ استقر في السودان بشكل قانوني وحاول إيجاد فرصة عمل لتوفير حياة كريمة لي ولأطفاله الصغار، وعاش فيها سالماً مُسالماً ويشهد بذلك كل من تعامل معه .

يوم الأربعاء الموافق 2022/1/12 اتجه إلى مطار الخرطوم الدولي للسفر إلى اسطنبول على خطوط شركة بدر للطيران لرحلة عمل، تم إيقافه من قبل جوازات الخرطوم لمدة تزيد عن ساعة، ثم سمحوا له باستكمال الرحلة، عرفنا بعدها الرواية التي ادعتها شركة بدر للطيران والتي نشرت منشورين متناقضين يثيران القلق حيال حقيقة ما حدث .

*مرفق صور البيانات في التعليقات .

تواصل حسام بعدها معنا وأخبرنا انه حدث هبوط اضطراري بمطار الأقصر نتيجة إخطار من كابتن الطائرة بوجود إنذار حريق، ومن ثم أخبرنا أنه تم سحب جواز سفره وإجباره على التوقيع أنه دخل الأراضي المصرية بمحض إرادته، وانقطع الاتصال به من وقتها، وحتى الآن لم نستدل على مكان اختطافه وسط مخاوف من تعرضه لعمليات تعذيب قد تهدد حياته وسلامته .

أنا بحمل الأمن الوطني والسلطات المصرية سلامة زوجي وأطالبهم بمعرفة أسباب اختفائه في مطار الأقصر ومعرفة مكانه الآن والاطمئنان عليه.

<https://bit.ly/3LC1zjF>

عن إبراهيم أبو زيد



"أنا راضيه بأي حاجة ولو إنه يكون في سجن بس أعرف إنه لسه حي" .. بهذه الكلمات أطلقت والدة المواطن إبراهيم علي محمد أبو زيد صرختها لعلها تصل إلى من اعتقل نجلها وأخفاه قسرا في سبتمبر 2019. وثقت الشبكة المصرية لحقوق الإنسان الإخفاء القسري بحق الشاب إبراهيم علي محمد أبو زيد ، 27 عاما، والذي كان يعمل بأحد المطاعم الشهيرة بالإسكندرية، بعدما اقتحمت قوات الأمن المصرية شقته الكائنة بمنطقة العجمي بمحافظة الإسكندرية في 25 سبتمبر 2019. أسفر الاعتقال عن تكسير الباب الرئيسي للشقة وإتلاف محتوياتها من أثاث وأجهزة، لينتهي المطاف باعتقال إبراهيم واقتياده إلى مكان غير معلوم، ومنذ ذلك التاريخ انقطعت كل سبل التواصل به بعد إغلاق هاتفه المحمول. 28 شهرا على اعتقال إبراهيم، والمعروف بحسن السير والسلوك، رغم أنه لم يكن له أي انتماء لحزب أو جماعة أو مشاركة في أنشطة سياسية.

<https://bit.ly/3Gwfvry>

عن محمد بدر عطية



"في مثل هذا اليوم يوم ١٧ فبراير يوم السبت كان اصعب يوم عليا في حياتي. يوم ما اتخطف حبيب قلبي وقرّة عيني ابني محمد بدر . اربع سنوات يا حبيبي من عمرك ومستقبلك ضاعوا بين جدران السجون لا يعلم بحالك الا الله.. اربع سنوات منعرفشي عنك حاجه ولا اتصال ولا حس ولا خبر ولا حتي مكالمه تظمني عليك .. اربع سنوات الايام بتعدي علينا والشهور والسنين وانت الله اعلم بك .. اربع سنوات واحنا الفرح مدخلشي قلوبنا وحياتنا معدومة من غيرك يا حبيبي عايشين في الم الفراق ومرارة الفقد والحرمان غيابك يا حبيبي ألم ينمو في قلبي ان تحدثت عنه ابكاني وان كتمته اوجعني .. حبيبي وآله لقد اشتقت اليك حد السماء نفسي اشوفك واسمع صوتك نفسي احضنك يا حبيبي والله بطلب من ربنا اشوفك في المنام وربنا يستجيب مني وانشاء الله اشوفك في الحقيقه . بدعي لك ربنا يصبرك ويثبتك ويحفظك ويجعل اختفاءك ووحدةك في ميزان حسناتك .. وحرّم الله عليه الجنة من كان سببا في فراقك واذاقه لوعة الفراق ومرارة الألم.. حبيبي لاتحزن عزاؤنا انها دنيا وتنتهي وعند الله تجتمع الخصوم ... اللهم اجعل له فرجا قريبا تقر به اعيننا وتفرح به قلوبنا وتثلج به صدورنا يارب رده وكل الغائبين ردا جميلا واجمعنا به عن قريب وبلغنا رمضان وهو معنا .. يارب لقاء قريب باولادنا المختفين .. يارب لاتجعل للحزن مكان في قلوبنا وان ضاقت بنا الأحوال " بابتسامته المشرقة والتي كانت مليئة بالامل لمستقبل مشرق اخذت هذه الصورة له

<https://bit.ly/31617cA>

عن عبد الله محمد صادق



هل ترانا سنلتقي

إلى ابني وحببي وقرّة عيني وقلبي الأسير عبدالله الذي لم أراه منذ أربع سنوات وثلاث شهور وعشر ايام كيف
حالك يا كل حالي، هل انت بخير، وان كنت بخير لما هذا الغياب، اشتقت إليك وإلى سماع صوتك وللحديث
معك والنظر إليك، لما حرموني منك كل هذه السنوات ومن رؤيتك يا حبيبي ❣️ لما فرقوا بيننا هكذا، اكتب إليك
دوماً وأدعو الله أن يحفظك ويرعاك

اكتب لك وغصة تملأ قلبي ❣️ اكتب لك والدموع تفرق عيناه
كنت لي الابن والصديق ❣️ لن انساك ابد يا حبيبي من الدعاء
وأبلغ من يعرفك ومن لا يعرفك أن يدعوك في ظهر الغيب
لعل الله يستجيب الدعاء

أعلم أن كل هذا قضاء الله وقدره

واسأل الله ان يرزقنا صبرا وثباتا على كل هذا الغياب

ما الجرم الذي ارتكبه عبدالله كي تخفوه كل هذه السنوات، أطلقوا سراحه أو اظهروه نطمئن عليه

او قدموه للمحاكمة كفايه ظلم وجعتوا قلوبنا ❣️ ❣️

<https://bit.ly/3KkEsZJ>

"ابني وحببي وقرّة عيني وقلبي الأسير عبد الله الذي لم أراه منذ أربع سنوات وثلاث شهور وعشر أيام كيف حالك يا كل حالي، هل أنت بخير، وأن كنت بخير لما هذا الغياب، اشتقت إليك وإلى سماع صوتك وللحديث معك والنظر إليك، لما حرموني منك كل هذه السنوات ومن رؤيتك يا حبيبي، لما فرقوا بيننا هكذا، اكتب إليك دوماً وأدعو الله أن يحفظك ويرعاك

اكتب لك وغصّة تملأ قلبي، اكتب لك والدموع تفرق عينياه كنت لي الابن والصديق، لن انساك أبداً يا حبيبي من الدعاء وأبلغ من يعرفك ومن لا يعرفك أن يدعوك في ظهر الغيب لعل الله يستجيب الدعاء

أعلم أن كل هذا قضاء الله وقدره

واسأل الله ان يرزقنا صبرا وثباتا على كل هذا الغياب

ما الجرم الذي ارتكبه عبد الله كي تخفوه كل هذه السنوات، أطلقوا سراحه أو اظهروه نطمئن عليه أو قدموه للمحاكمة

كفايه ظلم وجعتوا قلوبنا"

<https://bit.ly/3HJGZuG>

عن أحمد حسن مصطفى




انا بقالي كام يوم وانا علقانه في فكرة ان ازاي الوقت بقي بيعدى كدا اذاي واحمد مش هنا بس هو بيعدى في الحقيقية لا مبيعدش واقف جوايا عند اللحظة الي احمد اختفي فيها واختفت معاها حاجات كتير احتفت معاها حتة من روحي واطفت من كام يوم كنت بتكلم مع حد وفجأة لقتني اتخنقت لان ببساطة كان السؤال عن احمد دخلت قضتي وقعدت اعيط اعيط بنهار لدرجة مكنتش متخيلها وخصوصا ان بقالي كتير دموعي مبتزلش عيطت بكل القهر والوجع وقله الحيلة الي جوايا وماليا قلبي عيطت لانني ببساطة دي الحاجة الوحيدة الي فايدى اعرف اعملها عيطت علي العمر الي بيعدى منه يا حبيبي وهو وحيد وفي غربة ووحشة الحقيقية ان مهما عملنا ومهما نجحنا ومهما حصلت حاجات كتير حلوة في الحقيقة بتفضل ناقصة وبهتة كل الي نفسي فيه دلوقت اني اشوف احمد واخدة بس في حضني حضن بس وعيني تتملي منه والله بسيطة

<https://bit.ly/35swX3Z>

مش عارفة المفروض أقول أي أو ازاي في الحقيقة ده ٣ رمضان أحمد مش معنا ٣ رمضان وفي مكان فاضي علي سفرتنا محدش ممكن يتخيل إحساس أول يوم ده عامل ازاي ازاي كل واحد فينا بيص لتاني وماسك نفسه بالعافية أنه معيطش عشان باقي العيلة متنهارش متخيلين إحساس أمي عامل ازاي وقلبها موجوع ومش كدا وبس لا حتي الأكل مبيتلعش ده لو أكلت أصلا، أنا حقيقي قلبي موجوع جدا لدرجة أنني مبقش بعرف أتكلم لوحد سألني عن أحمد وهل في أخبار جديدة ولا لا، لسه صديقة بتسألني عن احمد واتخضت لما عرفت أن عدينا ٣ سنين وداخلين

في سنة الرابعة ٣ سنين منعرفش حاجة، ٣ سنين محرومين من أخويا محرومين من وجوده في وسطنا ومحبتة محرومة أني أضمه لحضني احنا ربنا بس إلى عالم الأيام بتعدي علينا ازاي وازاي عايشين والله مش عارفة أقول أي ولا أقول لمين أصلا كل الي بتمناه من قلبي أن احمد يرجع ويكون معانا وفي وسطنا ادعولنا يا كرام ومنتسوش تدعوا لأحمد وانتوا بتفطروا ادعوله وادعولنا . رمضان ناقصه احمد

<https://bit.ly/3Lzpnnl>



بيان من رابطة أسر معتقلي سجن العقرب

تداولت وسائل الإعلام المصرية أنباء عن نقل معتقلي شديد الحراسة بمجمع سجون طرة إلى مراكز إصلاح وتأهيل التي تم بناءها حديثاً، كما ذكر "أحمد موسى" في برنامجه (على مسئوليتي) بتاريخ 28 ديسمبر 2021، أن جميع المعتقلين في سجون طرة بما فيه "سجن العقرب" سيتم نقلهم إلى سجون أخرى، وأن هذا ضمن "استراتيجية حقوق الإنسان" التي تتبعها مصر حالياً ..

ونحن "أهالي معتقلي سجن العقرب" لدينا بعض التساؤلات:

أولاً: هل أزمة المعتقلين السياسيين في مصر قاصرة على مسميات وأماكن؟! سواء العقرب أو سجن أو شديد الحراسة؟! أم في الانتهاكات الجسيمة المستمرة لحقوق الإنسان التي يكفلها القانون المصري من منع زيارة وتريض ودراسة وملابس، وحبس انفرادي لسنوات وإهمال طبي أدى لوفاة العشرات!

ثانياً: إذا كانت الحكومة المصرية صادقة فيما يُسمى بـ "استراتيجية حقوق الإنسان" فلماذا لا تبدأ فوراً بتطبيق القانون المصري وتسمح بالزيارة للمعتقلين داخل سجن العقرب الممنوع عنه الزيارة منذ أكثر من خمس سنوات؟! أو في أحد السجون الجديدة المسماه بمراكز الإصلاح والتأهيل!.

هل تحاول الحكومة استغلال نقل السجون، وتحويل الأرض التي شهدت ظلم وقهر وقتل الآلاف إلى (منطقة سياحية)، للهروب من السمعة السيئة لسجن العقرب بتغيير اسمه، والترويج المستمر للاستراتيجية التي لم نرها إلا في تصريحات المسؤولين فقط، والبدء في بناء عقرب جديد بمسمى مختلف؟!!

نأمل أن يقوم النظام الحالي في مصر بالرد علينا من خلال الأفعال بدلا من الاحاديث الاعلامية التي لا يثبت صحتها حتى الان، فنحن أول من نتمنى تطبيق القانون واستراتيجية حقوق الانسان التي تدعي الحكومة تبنيها !

[##انفذوا_معتقلي_العقرب](#)
[##العقرب_فكرة_وليس_اسم](#)

<https://bit.ly/3EJovsx>

و منذ خمس سنين أصبحنا نعرف اخبار أبي من الأخبار او من افواه الظالمين!

أبي و حبيبي و سندنا في هذه الدنيا لا نعلم عنه شيئا!

حاليا نقرأ في الاخبار عن نقلهم لسجون أخرى

هل صحيح!

متي تم نقلهم!

هل تم نقلهم حقا!

كيف حاله!

كيف صحته!

هل معه ما يكفيه ما يقيه البرد!

ولا نعلم اي شي

سوي أنه وديعه الله و أن الله لا تضيع ودائعه

<https://bit.ly/3zjPHNy>

شعور قاسي ومؤلم بالعجز..

مفيش زيارة مفيش أخبار ومنعرفش عنهم حاجه، جث بتتسلم واحنا قاعدين مش عارفين نتصرف..

طب هما هيخرجوا ؟ هنقدر نشوفهم تاني؟

حالتهم النفسية عامله ازاى وكل شويه حد وسطهم بيخرج على المشرحة؟

احنا نستحق نهاية للمعاناة دي..

<https://bit.ly/32P4rrW>



أوجعنا غيابك، والدمع محبوبسٌ ضير..
يارب احنا محتاجين معجزة علشان يخرج لنا، كفاية علينا 9 سنين، والله حياتنا بايظة ومتدمرة من غيره.
يارب اجعل له مخرجاً من حيث لا نحتسب .

<https://bit.ly/34AldKP>



<https://bit.ly/37tzLhM>

بمناسبة البرد في مصر السنادي ..
كان في بوست بيتكلم على ان البيوت في مصر اصلاً مش معزولة كويس عشان كده الناس بردانة حتى جوة بيوتها..

عمالة افكر في المعتقلين كلهم وفي أماكنهم وبالأخص العقرب اللي الناس فيه متعرفش حاجة عن العالم الخارجي أصلاً. الناس دي محرومين من الزيارة بقالهم سنين. محدش بيشوفهم ولا بيشوفوا حد. المرض مش سايب حد فيهم في ظروف حبس غير آدمية بتخلي الوضع يسوء أكثر محرومين ان يدخلهم اكل نضيف لبس نضيف وتقبل ممنوعين يدخلهم بطاطين . محرومين من أقل حقوقهم القانونية ! متنسوش معتقلين العقرب من دعاءكم

رنا يلف وينجيهم

<https://bit.ly/3nWSgRe>

عن الزيارات

أول مره أشوف بابا من سنة ونص ..بابا كبر أوي وشعره بقى أبيض والكلابشات في أيده ..حتى هو مكنش عارف نفسه لما شاف نفسه في المرآة

<https://bit.ly/3n70vtB>

أنا لو كنت بكره زياره طره قيراط فانا دلوقتي بكره زياره ابوزعل دي 24 قيراط من 9 الصبح لحد 8 العشا علشان اشوف أبي بس واطمن عليه بعد تعب قلب واعصاب ما بين مش هنا وامشي شوفيه فين وانه خلاص لبس □ازرق 🧑 وقمه ف القهر بجد..

يارب احنا خلاص تعبنا ومش قادرين نتحمل..

فرج عنا من حيث لا نحتسب يارب..

يارب فك أسر أبي يارب..

<https://bit.ly/3f8fNtD>

الزيارة في مجمع السجون تعذيب اضافي مضاعف لاهالي السجناء!! في السجن القديم كان قدام السجن شارع فيه عمارات وقهاوي بطول الشارع ممكن الواحد يستنى عليها ولو احتاج يدخل حمام، بيلاقي، لغاية ما يندهوا على اسمه، يدخل يتفتش ويزور!! صحيح، كنا بنقعد ننتظر ساعات طويلة في عز الحر والبرد، لكن بنلاقي مكان تقضي فيه ساعات الانتظار وممكن نشرب شاي او تفطرا!! هنا بقى، المكان ضيق وما فيش مكان محدد للتسجيل. كل شوية يطلع امين شرطة ينادي على سجن من السجون: "المزرعة، الزراعة، الاستقبال □" ويجري الاهالي عشان يلحقوا يبلغوه اسميهم!! وبعدين نقعد ملزقين في بعض وفي الشنط على مجموعة من الدكة الخشبية فوقها تاندة (ربنا يستر في الصيف) لغاية ما ينادوا علينا!! وبعدها تبدأ معاناة جديدة في التفتيش!! وبعدها تبدأ

معاناة اللي داخلين رؤية، يركبوا جرار زراعي اسمه طفطف ، يلف على السجون وينزل كل مجموعة زوار للسجن اللي فيه ابنهم. ونزل قدام السجن تقعد ثاني على شوية دكك خشب مغطيها تاندة..لغاية ما ينادوا عليك ثاني وتدخل السجن المقصود عشان تتفتش ثاني من اول وجديد انت والزيارة! ربنا يهون عليهم جوه ويقصر الأيام! وينتقم من الظالمين
<https://bit.ly/3nbjDGW>

استغاثة الى من يهمهم الامر:

مجمع سجون طرة يضم عدة سجون وله بوابة واحدة صغيرة، يصطف امامها زوار كل السجون في مظهر غير حضاري وغير صحي. وينتظر الكل عدة ساعات امام الباب ومنهم كبار السن والمرضى والاطفال، والقادمين من المحافظات الأخرى، بلا دورة مياه واحدة تخدم هذا التجمع البشري الذي لم يرتكب اي منهم جرما يستحق التعذيب بالحرمان من دخول الحمام في عز البرد! لا اعلم مدى امكانية ازالة البوابة، او تركها مفتوحة مع تأمينها لدخول كل الزائرين واستمرار خدمة الطفطف وكل مجموعة تروح تقعد قدام السجن اللي يخصها مع عمل دورة مياه عمومية لخدمة كل الزائرين وكافتيريا بسيطة يستطيعون الحصول منها على مياه الشرب او مأكولات خفيفة اثناء ساعات الانتظار ..وممكن الاحتفاظ على البوابة ببطاقات هوية المرافقين للزوار اللي يساعدوهم في حمل حقائب الزيارة، وممكن التفتيش بدقة قبل دخول كل سجن على حدة!
ما رايكم دام عزكم؟ ارجو ان يتبنى الفكرة اعضاء المجلس القومي لحقوق الانسان
<https://bit.ly/3nbqgZE>

من اسبوعين خاطبت المجلس الأعلى لحقوق الانسان..مش عشان اقول له ان حرية الرأي والتعبير من حقوق الانسان، والمفروض ما فيش مواطن يتحبس عشان عبر عن رأيه سلميا، عشان دي حاجة فوق قدراتهم!! كل اللي قلته ان مجمع سجون طرة يتكدر امام بوابته الامامية زوار اربع او خمس سجون في مساحة محدودة كفيلة بتخليق خمس او ست سلالات كورونا جديدة!!! وان

المكان مافيهوش دورة مياة لخدمة الزوار اللي منهم المرضى وكبار السن والاطفال، والاهالي القادمين من المحافظات. وان الانتظار يمتد لساعات.. "ناشدتهم" التدخل لدى من بيده الامر للسماح للزوار بالدخول والانتظار كل مجموعة امام السجن الذي بعثها، خاصة وانه يتم تفتيشنا مرة اخرى على بوابة السجن!! وتوفير دورات مياة متنقلة لا تكلف شيئاً يذكر! وياحبذا لو كشك صغير لبيع المياة والمشروبات والاكلات الخفيفة لخدمة الاهالي، اللي همهم ما ارتكبوش ما يدعو للتنكيل بهم وتعذيبهم! عرفت ان المجلس تفضل مشكورا بمخاطبة مصلحة السجنون في هذا الشأن!! والحقيقة مخاطبة مصلحة السجنون، وانتظار الرد اللي طال انتظاره اسبوعين حتى الآن، مسألة لا تحتاج لمجلس أعلى لحقوق الانسان!! كنت اتوقع ان يتكرم السادة اعضاء المجلس بالمرور - مجرد المرور - بسياراتهم الخاصة، من امام البوابة الامامية لمصلحة السجنون لمعاينة الامر ومشاهدة تكديس الزوار بأنفسهم، والا يكرر المجلس الجديد ما قام به المجلس القديم من دخول السجنون في ضيافة مأمور السجن والفرجة على الكفتة والكباب والمطبخ! أضعف الايمان انكم تروحوا تتفرجوا من برة على الاهالي الزائرين، ويا سلام بقى لو طلبتم دخول الزائرين، مش مكتب المأمور والتمتع بواجبات الضيافة! النهارده وبعد اسبوعين من المناشدة لم يتغير الا تعديل وضع الدكك الخشبية التي يتكدس فوقها الزوار!! بدل من رصها بالعرض بقت مرصوة بالطول!! والمسافة بين الدكك ضيقة لا يحتمل الجلوس عليها الاشخاص طوال القامة، وهي كفيلة بإصابة غضروف من يجلس عليها ساعات طويلة، فضلا عن سهولة العدوى وسط الزحام!! التطوير الاخر الذي تم، هو وضع يافطة كبيرة - منعت الشمس عننا - مكتوب عليها "تنبيه مشدد على اهالي النزلاء، ضرورة ارتداء الاقنعة الواقية ضد الأوبئة (كمامة طبية)"

يا مجلس يا أعلى لحقوق الانسان قدامك فرصة لعمل شيءٍ يتعلق بحقوق الانسان نفتكركم بيه!! مش منتظرين منكم تدافعوا عن حرية الرأي والتعبير - عشان ده مش عندكم في المقرر - على الاقل دافعوا عن حق الانسان في ان يعمل بيبي!! دي ابسط حقوق الانسان على فكرة!! او مال حتمعلوا ايه؟ حتقعدوا زي اللي قبلكم، منظر يعني! وتمشوا ما حدش يحس بيكم؟

يا مجلس يا أعلى لحقوق الانسان

<https://bit.ly/3nLz3Sv>

فجأة!! قرروا ان ماحدش حيدخل زيارة الا لومعاه شهادة تطعيم!! وبعد شوية، قالوا المرة دي سماح ، بس من بكره مافيش دخول الا بالشهادة، من شوية رجعوا قالوا مافيش دخول الا للي معاه الشهادة!

<https://bit.ly/3Au6Apg>

وصلت البيت ضهري واجعني من قعدة الدكة الخشب. ومصدعة طبعا لانني صائمة من الصبح ما شربتش بق مية ولا أكلت لقمة ولا اخدت الدوا؛ خشية ان احتاج للحمام!! وفوق كده الصداق والالم النفسي، لاننا واحنا في الانتظار شغنا عربية ترحيلات ناقلة شباب.. طبعا مش باينين من شبابيك العربية، لكن الناس فضلوا يشاوروا لهم عشان يدعموهم نفسيا!! بعد كده عرفنا انهم نازلين المحكمة، وبعد كام ساعة سمعت صوات من مجموعة ستات، وفهمت من كلامهم انهم شافوا على الموبايلات خبر الحكم باحالة اوراق عشرة شباب للمفتي! بعد اللي شفته طوال السنيتين ونص اللي فاتوا وبعد ادراج شباب زي زياد وعلاء ورامي وقصاص على قوائم الإرهاب، تأكدت من مقولة يا ما في الحبس مظالم، وتأكد رفضي لعقوبة الإعدام!! هو انتو ما بتشبعوش دم؟

<https://bit.ly/3s6Q9LQ>

((بعد انتظاري اكثر من ٥ ساعات عالبااب السجن دخلت فتشوا الاكل وجه دوري فالتفتيش دخلت الغرفه المخصصه لتفتيش السيدات لاقيت واحده بتفتش باسلوب قدر مش تفتيش طبيعي انا عدي عليا كتير ماشوفتش زي كده ودي مش اول مرة ليها اول مرة صدمتي خلتنني اسكت وفضلت اكثر من ٤ شهور بعاني من حالة نفسيه سيئه جدا، لكن المرة دي ماقدرتش اتمالك اعصابي احساسني بأديها عالجسمي وطريقتها خرجتني عن شعوري خلتنني أفقد اعصابي وانهارت ولما قولتها لاء ده مش تفتيش ورفضت قالتلي انتي فاكرة نفسك جاية ملاهي ده سجن. قولتها عارفه أنه سجن وده مش مبرر أن عملي كده وايدك تحط عالجسمي بالمنظر ده. طبعا هرتلت بكلام سخيف انا ما

كنتش سمعاها بتقول ايه من الحاله اللي وصلتها . قالتلي ماتزوريش وانفضلي روجي اشتكي وطلعت هي بكل وقاحه تشتكي لرئيس المباحث أني رافضه التفتيش . طبعا هو أيدها وعجبه كلامها لكن انا كل اللي كان عاللساني انا بطالب بحقي كإنسان ده انتهاك ده تحرش صريح مش تفتيش. انا انتهكت هنا فين حقوق الإنسان ، وطبعا رده عليا هو احنا كده وتفتيشنا كده ده مش راجل اللي فتشك دي ست مش عاجبك ماتزوريش انتي اللي جايلنا مش عاجبك تفتيشنا يalah امشي من هنا كاني بشحت زيارتي .))

<https://bit.ly/3uezA3o>

قدام باب مجمع السجون لقيت شابة شايلة طفل على ايديها ومعاها ست كبيرة، بتسأل " هو فيه عربية ترحيلات عدت؟" عرفت انها وغيرها بيجوا يوم ما يكون المسجون اللي يخصصهم نازل محكمة، واول ما يشوفوا عربية ترحيلات يجروا يقفوا يشاوروا . همه اصلا مش بيشوفوا مين في العربية لان الشبايك صغيرة وعالية وعليها سلك. بس بيكون عندهم امل الابن او الزوج هو اللي يشوفهم من الشباك ويرتاح نفسيا لرؤيتهم. لان المحكمة مش سامحة الاهل يحضروا الجلسات ويشوفوا ولادهم!! الست دي واللي زيها، مش جاينين زيارة ولا جاينين يوصلوا اكل. همه جاينين يوصلوا حب ومشاعر.. يدعموا اولادهم باللي في ايدهم، يقفوا يشاورنا كل ما عربية ترحيلات تخرج!!

يارب فرجك وعدلك

<https://bit.ly/3Lq5QH0>

صباح الخير ..

ماما بقالها 1199 يوم محبوسة ..

مشوفتش ماما خلال ال ٣ سنين و٣ شهور دول الا من بعيد او وانا بجري ورا عربية الاسعاف اللي

ازازها متفيم

او من ورا قضبان وازاز عازل للصوت

مجموع رؤيتي لماما خلال الوقت ده ميكملش ٦٠ دقيقة يعني ساعة!! ..
ماما شافت حليلة بنت هند مرة واحدة وهي عندها اسبوع
متعرفش اي حاجة بتحصل في حياتنا واحنا منعرفش عنها ولا عن صحتها اي حاجة ..

خلال الفترة دي ماما
جالها اشتباه في ذبحة
جلطة

مشاكل في القلب
توقف الكلى اليمنى
كفاءة الكلى اليسرى ٢٥٪

خرجو ماما تتعالج خرجوها تبقى وسطنا!

ماما عندها ٦٣ سنة فاضل ايه عشان تخرج وتبقى وسطنا ونخلي بالنا منها!؟
اكتبو عن ماما وانشروا عنها احنا محتاجين كل بوست وكل كلمة وكل حرف محتاجين ماما تبقى
وسطنا ..

<https://bit.ly/3BhZxkc>

وانا مستنية قدام بوابة السجن النهارده، شفت ست عرفت انها استاذة في الجامعة جاية تدخل اكل
لزوجها الممنوع من الزيارة بقاله سنتين!! ومعها اخته.. ما شغلتش نفسي اعرف هو متهم بايه ، بس
فهمت انه محبوس احتياطي، يعني مش محكوم عليه!! طيب يتمنع من زيارة اهله ليه؟ الراجل
فوق السبعين وزوجته قدي تقريبا في السن!! اكتشفت انهم بييجوا من اسكندرية عشان يدخلوا له
الاكل!! وعرفوا ان عنده جلسة النهارده .. فواقفين يا حرام كل ما يشوفوا عربية ترحيلات يشاوروا
لها لعل حبيبهم فيها. وبعدين. فجأة لقيت الزوجة بتصرخ وتقول شفته! هو! وشاور لي!.. وانفتحت
في العياط! لقيت اخته بتقول لها "لا، فيه واحد شبهه في العربية اللي وراها وشاور لي!!" وقعدوا
الاتنين يعيطوا!

المهم ان عربية الترحيلات البيضا الضخمة دي ماينفغش تشوف حد من شبابيكها العالية الصغيرة
اللي عليها شبك حديد! ممكن اللي جوه العربية يلحق يلحم حد من اللي بره العربية. لكن من بره
يكاد يكون مستحيل تعرف مين صاحب العينين اللي باينة من الشبك الحديد!
مهما كانت التهمة، اللي لسة لم يحكم فيها ..يعني المتهم (اللي فوق السبعين) بريء ولم تثبت
ادانته! لكن حتى لو ثبتت ادانته واتحكم عليه، بيتحكم عليه بالسجن.. يعني تقييد الحرية! مش
الحرمان من رؤية اهله؟
يارب عدلك وانتقامك

يارب اللي عنده تبرير للي بيحصل ده يدوقه عشان يحس!
آه! نسيت اقول لكم ان الاتنين ستات ببيجوا من اسكندرية يوم الزيارة صايمين عشان ما يحتاجوش
حمام!

<https://bit.ly/3LAomMH>

شهر رجب من الأشهر الحرم تعظم فيه الحسنات والسيئات
بدأت الشهر بزيارة عمر وأنا لظروف صحيه الدكتور مانعنى اقف لمدة ساعه متواصله لمشكله فى
رجلى ووقفت أكثر من أربع ساعات على رجلى مافيش مكان من شدة الزحام أقعد فيه وبعدين
خرج الأمين يقولى عمر مش هنا قولتله هو لسه جاى عندكم من شهر وانا زرتة هنالحق يروح فى
حته تانى من فضلك أتأكد ربما يكون تشابه فى الإسم دخل وخرج بعد مده تانيه قالى مش هنا
قولتله بعد انتظار اكثر من أربع ساعات واقفه على رجلى خارج تقولى مش هنا طيب راح فين طيب
أسأل مين قالى ما اعرفش وسابنى ودخل مشيت وأنا بعيط من وجع قلبى على ابنى اللي مش عارفه
فين ومن وجع رجلى وأخذت الطريق كله بحسبن وادعى ولما سألت عليه رجعونى تانى لنفس
المكان قالولى أنه موجود هناك ارجعى لهم تانى رجعت وفعلا دخلت وشوفته وزعل جدا لما
شافنى تعبانة وحزينه بالشكل ده وقالى معلىش يا ماما أنا بهدلتك معايا ورجعت من عنده بعد
المغرب ..ويوم الثلاثاء بعنولى أن بيجهزو عمر للعمليه روجت أجيب تصريح زياره أشوفه واطمن
عليه وأخذله أدويه وده حقى قانونا قالو تعالى بكره لمدة ثلاث أيام متتاليه كل يوم تعالى بكره
وأخر يوم قالو مافيش تصاريح وبدون أى سبب غير إنهم يتفننو فى طرق الظلم ولأن احنا فى شهر

من الأشهر الحرم وهما بدأو معايا الشهر من أوله لحد النهارده قهر واستنفاذ مادی ومعنوي ليتعظم لهم الذنب ويتعظم لنا الأجر إن شاء الله أسأل الله القبول والصبر والعون ..دعواتكم النهارده آخر محاوله .<https://bit.ly/36a4hwt>

اولا باعتذر لكل الاصدقاء اللي قلقوا عشان قلت امبارح اني تعبانة. الحمد لله انا زي الفل دلوقت 😊 ..المشكلة مش في اني قعدت اتناشر ساعة في الشارع معظمهم قاعداهم على دكة خشبية مصممة بطريقة تضمن تحطيم العمود الفقري!! المشكلة في الامتناع عن الاكل والشرب عشان ما أحتاحش للحمام طول المدة دي! والاضر اني طبعا ما اخدتش الدوا طول الوقت ده! وهو ده اللي سبب لي التعب الشديد على آخر اليوم !
والحقيقة مش انا لوحدي!! اكتشفت ان كل الستات تقريبا من كبار السن يمتنعوا عن الاكل والشرب في اليوم ده عشان ما يحتاجوش حمام!! عرفت الرجالة بيعملوا ايه!! بيروحوا يتصرفوا في الرمل اللي على الاوتوستراد!! رغم اني سمعت ان فيه قانون صدر بتجريم التبول في الشارع!!!!!! مش عارفة ازاى التجريم قبل توفير دورات مياه عمومية آدمية عشان الناس تلبى نداء الطبيعة!! والحقيقة مش عارفة ايه دور المجلس القومي لحقوق الانسان في مصر، اللي خاطبته وبعث له مذكرة بالمصيبة دي؟ اذا كان مش قادر يتدخل لتوفير ايسر حقوق الاهالي زائري السجناء؟ يعني مش عارفة.. ياريت حد من بتوع المجلس يشرح لنا بالضبط ايه دوره؟ وايه مفهوم المجلس لحقوق الانسان؟ وايه حقوق الانسان بالضبط اللي المجلس ده معمول عشانها؟، وايه دور اسماء لها وزنها دخلت المجلس في تشكيله الحديد والقديم؟ ايه بالضبط اللي عملوه؟ وياريت يفهمونا مفهومهم لحقوق الانسان يمكن احنا فاهمينها غلط؟ احنا لا سمح الله ما اتكلمناش في حرية الراي والتعبير السلميين، ولا حق المواطن المعارض في ابداء الراي مثلا!! ولا حق المواطن في توفير العلاج المناسب مجانا لغير القادرين ولا حق كل اطفال المصريين في تعليم حقيقي ولا حق السكن، ولا كل الحقوق البطالة دي!! احنا كل اللي طلبناه ايسر حق أساسي للإنسان، حقه في مكان آدمي لقضاء حاجته!! ومش محتاجة اقول ان اهالي السجناء (المتكدرسين في مساحة ضيقة امام مجمع

السجون اللي بيكم خمس او ست سجون في ظروف ملائمة لتخليق خمس او ست سلالات كورونا)

من كبار السن والمرضى والاطفال والقادمين من محافظات بعيدة!

المجلس القومي لحقوق الانسان.. انتي جاية تشتغلي ايه؟

<https://bit.ly/3t10zgD>

سنتان منذ عدم التلامس.

سنتان مرتا بعد آخر زيارة بلا حواجز.

أربعة أشهر دون رؤيته لأسباب مختلفة.

يوم طويل، وزيارة مرهقة كالعادة، وعودة بأحمال الكتب؛ هذه بضاعتنا ردت إلينا.

زوجة المعتقل المهندس أيمن عبدالرحيم

<https://bit.ly/3Nu7IQ3>